

Luk ma Peba

Lukimna Iriki God ma B'ogil Yirkokar Bage Yit

Isipkita Yitkak

Onggityam God ma b'ogil yirkokar bage yit peba irika riga re Lukte. I Luk re dokta riga na yibnonj dide yipa God ma obagendi kesa riga na. I ton onggityam peba yirikonj re “Teopilom” pilwa na, aji men ma wumir im yetemb ji iminjog riga. Si ton yama yirikonj re komkesa gar ke utkunda riga wa pilwa na yepiya re wekenonj Roma kantri wingirind. I ton yirikonj re yitkak dimdim olngika kena Yesumna yirkokar wimena gatab rina re yir ungata rigap yir ongong eyento.

I ket Luk pitapita yomeny Yesund da Ton re yirkokar okawayam riga e Israel riga wa dide komkesa yitam riga wa. I Luk pitapita yominy da Yonggyamimna Yinayina Wingawingat Yesund ara yemokonj God ma b'ogil yirkokar bage yit pitapita omnenam gasa kesa riga wa pilwa. I onggit kupka b'ogil yirkokar bage yit peba wingirind ukoijog danda kima yopureny re onggit gatab im, opi re yir opmita i Yinayina Wingawinga i kongga waina b'ingaena Yesumna wiko wingirind, i dide negir mile iraba gatab yit.

Otomapu Yitkak

1 ¹⁻²Kor riga, rigap kea otomapu ke towa yir ke yir angto mile rina re ririrkip aukito mera wingirind dide onggit mile gatab yitkak kea pitapita ammento. Si ma yipa kima rigapiya towa pilke onggityam yitkak akatento dide b'atonkena wuwenonj yitkak dimdim olngikam dide irikam odede wip it re ton akatento towa pilke. ³Ukoi riga Teopilo, koda kwa kea onggityam kupka yitkak b'auyaena nekenond otomapu ke. Si kon nony aen da itemb re kornim b'ogiljog e yitkak dimdim olngikam dide ririrkipjog e irikam mornim. ⁴Nokim da idenat man b'ogil wumir kima temjateninyit onggityam iminjog yitkak gatab rina re man b'auyaenot.

Baptiso Yoanimna Ukenda gatab Bage Yit

⁵Onggit winind re Erod Yuda kantri king yebim, yipa yina si riga yibnonj nyi da Jakariya, yet re Abiyamna si riga bobo wingirind yibnonj.^a I ti kongga re Aronimna kus ke b'usmureni b'igam pilke b'iga o, i ti nyi wibnau re Elisabetit. ⁶Si osiemb molkongga re negir kesa dimdimjog riga na ebnonda Godim wipind, dide ton komkesa Yonggyamimna b'ingawa yit dide yimak yit b'obogil yimta undoka eyeneninonda, si ton b'injawa kesa na ebneenonda. ⁷Aji towa makwa b'iga ebainy, nokip Elisabet re popam na webim. I ton osiemb re kea mid ake molegit akatonj. ⁸I yipa winind re Jakariyamna si riga bobo waina win akatawonj si omnikam, si ton si amnikinonj Yonggyamimna yinametind. ⁹I onggit winind ton towa wingirind Jakariyand yobagendo re towaina riga obagenda get ke mile kena so omnam ngirangngirang si gasa yinametind, si Jakariya ket b'igaronj yina pipmet wa ngirangngirang si gasa so omnam. ¹⁰I re itemb ngirangngirang si gasa embomb yiyenonj, komkesa riga bobo re yir opmita na yomniko bau ke. ¹¹Ngirpu yipa Yonggyamimna aneru pita awonj ti wipind dide onyitonj ngirangngirang si gasa embombpu kap yimjog yim tab ke. ¹²I re Jakariya tin yir yongonj, ton ket winga kesa na awonj dide mogat tin danda kesa yomnonj. ¹³Si onggit anerut tin yomnonj da, "Jakariya! Goro moga tawim! God kea moina yir opmita utkunj, si mor kongga Elisabet ita mor yipa leo b'iga mutkendau dem. Man tin nyi oeket dem Yoan. ¹⁴I mor pilind ita dem sam, i man ukoi jog sam e taet dem. I jogjog rigap kwa toda opima sam taukanj dem tina ukenda gatab map. ¹⁵Mop nokip ton ukoi jog riga e tainy dem Yonggyamim wipind. I ton makwa ita wain^b dide danda ik onaya teyeniny dem. I God tin get kae Yinayina Wingawinga ke yindangir ominy dem ti mogimna komind. ¹⁶Si ton jogjog Israel riga tengenjiny dem towa God Yonggyamim pilwa. ¹⁷I ton kwa Yonggyamimna naska nya wa e yik dem Godimna Wingawinga kima dide danda kima odede yipa wip it re Eliya re dide. Si ton b'uwar waina gar tengenjiny dem towaina b'igawar wa pilwa b'ogil b'ubigawarind wimenam, dide kwa tengenjiny dem utkunda kesa riga de negir kesa dimdimjog rigaina b'ogil nony menamena wa. I dide ton tangonjeniny dem God ma obagiki Israel riga, nokim da idenat ton Yonggyamind gar ke okatenyi dem." ¹⁸Si ket Jakariya anerund yomnonj da, "Ridede e kon moina yit iminjogim omnyin? Mop nokip kon re mid en, dide kor kongga toda kwa tina b'iga ukuka win re kea yiukitonj." ¹⁹I anerut ket tin yismonggawonj da, "Kon Gabriyel ten yete re kon Godim wipind onyiti nibnenenyin. Si Godit ken

^a 1:5 Ju riga wingirind komkesa re twenti powa (24) si riga bobo na wekenenonj.

^b 1:15 Wain re yipa ikjog e rinsim re rigap amnikenenanj greip kip ke.

nitmikis mor pilwa men wumir omnam dide onggityam b'ogil bage yit mornim pitapita omnam. ²⁰Si yir de, man ita yit kesa taet. I man ma ririr e yit tapureninyit, ngirpu ra onggityam gasa iminjog tainy dem, mop nokip man maka koina yit iminjogim amneninyit. Aji ra onggityam win okas dem, koina yit opima ririrkip taukanj dem.”

²¹I onggit winind rigap Jakariyand kasar yomniko, dide ton kid kesa auto, mop nokip ton pinjog na yibnonj yinamet wingir wa. ²²Aji re ton bau wa opendonj, ton ma ririr na yit opurenam awonj towa pilwa. Si rigap ket wumir yokato da ton kea liyalliyal gasa yir yong yinamet wingirind. I ton itaikena kena ten yit amninonj, dide ton ma ririr na yit opurenam. ²³I re tina si omnika win yundwatonj, ton ket tina met wa yikonj. ²⁴I onggit win kak ke ti kongga Elisabet kom kima awonj, si ton paib (5) mobi kima tinta wibnenenonj dea ta tina met wa dide ton ket odede windenonj ²⁵da, “Oo, nomae kor Yonggyam! Yu ke odede b'ogil wiko nomnikau. Si yu itemb, kor Yonggyam yim nokau koina ingar awir omnam riga wa wingirind.”

Yesumna Ukenda gatab Bage Yit

²⁶I re Elisabet siks (6) mobi kima kom yowamonj, God yipa aneru nyi da Gabriyel yitmikitonj yipa taun wa ogenaya da Najaret Galili eriya wingirind. ²⁷Si onggit anerut yikonj de yipa pil esopai kesa ngimngayim pilwa, yet re tirir yomnonj Dawidimna kus ke riga Yosep kima molkongga awowim. I itomb pil esopai kesa ngimngayimna nyi re Mariyat. ²⁸I ket anerut tin wodarongj tina met wa, i womnonj da, “Sime! Man Godimna wurar okai kongga et. Si Yonggyam ita man kima.” ²⁹Aji Mariya onggityam yitkak map nony bebig kima nonsipsip na awonj, dide ton nony ke windenonj da, “Ridede wip e ji onggityam sime yitkak?” ³⁰I anerut ket tin womnonj da, “Mariya! Goro moga tawim! Mop nokip God kea Tina wurar mor mokau. ³¹Si man yir de, man ita kom kima taet dem, i ket leo b'iga e ukenjit dem. I man Tin nyi oeket dem Yesu. ³²I Ton ita ukoijog riga tainy dem, i rigap Tin nyi ogenai dem pumbjog Godimna b'iga, i dide Yonggyam God ita Ti okau dem Ti b'u Dawidimna king pipmet. ³³I Ton wip tamniny dem Yakobimna b'usmureni b'iga ngirpu kesa, dide itemb Tina pumb tungg makwa ita b'etpau dem.” ³⁴Aji kwa Mariya ket anerund yismonggawonj da, “Ridede e onggityam yit iminjogim tau dem, nokip kon get ke ma riga kima pil b'asopai e nibnyin?” ³⁵I anerut ket tin wismonggawonj da, “Ita Yinayina Wingawinga tinik dem mor kumbind, dide pumbjog God ma dandat ita kukum motiny dem. Si onggit paemb onggit yinayina ukendi B'igand ogenai dem da Godimna B'iga. ³⁶Si man yir de, mor kus ke kongga Elisabet, ton re molegjog o, aji ton ti ita leo b'iga kom borand. I rigap wogenaeneno da ton re popam o, aji ton ke siks (6) mobi kima e kom yowam. ³⁷Mop nokip Godim Ti ita danda

komkesa gasa ririrkip omniam.”³⁸ Si Mariya ket windonj da, “Si b'ogil e, kon re Yonggyamimna wiko ngimngai en. Toko moina opureni yitkak ririrkip raukinem kor pilind.” Seg ket anerut tin wiraronj.

Mariya Elisabetind Wesmaronj

³⁹Si ket onggit winind Mariya b'angonjenonj dide ket mukupmukup menon yokatonj de dor tungg wa, i dide ket opendonj de yipa taun wa Yuda eriya wingirind. ⁴⁰Ngirpu ton b'igaronj Jakariyamna met wa dide Elisabetind simesime womnonj. ⁴¹I re Elisabet utkundonj Mariyamna simesime yitkak, odenja tina kom borand b'iga b'arurkitonj, i ket God Yinayina Wingawinga ke Elisabetind yindangir womnonj. ⁴²Si Elisabet ket ukoi ara kima obailitonj gar sam kima, i ket Mariyand womnonj da, “Man re b'ogil omni kongga et komkesa kongga wa wingirind. Dide moina komind b'iga toda kwa b'ogil omni e. ⁴³Nangga pae onggityam b'ogiljog mile awik kor pilind, ite re kor Yonggyamimna mog tik kor pilwa ken esmaram? ⁴⁴Mop nokip re moina simesime nonykok b'igar koina yipya bora wa, odenja komind b'iga ma sobijog sam kima na b'arurkis. ⁴⁵Si ton b'ogil omni omb ji yeto re yitkak gar ke akateniny rina re Yonggyam tin wumir womnonj, mop nokip opimemb Tina yitkak opima iminjogim taukanj.”

Mariyamna Esourena Ger

- ⁴⁶I ket Mariya windonj da,
 “Koina kukipit kor Yonggyamind nyi pumb wa yurowateneny.
⁴⁷ I koina wingawingat ita koina yirkokar okawayam Godim pilind ukoi sam yomnikeneny.
⁴⁸ Mop nokip kon re goujog wiko kongga en, aji Godte b'obogil yir ipka niyeny.
 I mop nokip kwa komkesa riga yepim re yu wekeny dide tekenkeneny waritawarita onggit gowukoyind, ton opima ken b'ogil notinenenyi yu ke dide naska nya wa.
⁴⁹ Mop nokip dandayam God kea ukoi jog gasa nomnikainonj.
 I Tina nyi re yinayina e.
⁵⁰ I God tena kear amnikeneniny yepim re Tin moga kima yesourenenyi komkesa yunim dide warim b'usmureni riga wa wingirind.
⁵¹ God Tina yim ke danda wiko amnikeneniny, si Ton ket b'asourena riga erenjaeneniny yepim re towaina garind b'asourena nony menamena amnikenenanj.
⁵² God ukoi wip iyoi riga gou wa amnikeneniny towaina pipmet ke, aji Ton riga pumb wa urowatenenyiny yepim re towalenggyam gou wa aukenenanj.

- 53 God owoupa riga ngor amnikeneniny b'ogil gasa ke,
aji jogjog gasa kima riga yimkak nena etmikeneniny.
- 54-55 God kea yim akaeneninonj Tina wiko riga Israelind,
odede na it re ringmena re Ton tirir yit amninonj mera b'uwar.
Si onggit penaemb Ton ngirpu kesa nonyind awameneninonj
kear omnenam Abraamim pilwa dide tina komkesa b'usmureni
b'igawar wa pilwa.”
- 56 Si Mariya ama rika nowa mobi kima na Elisabet kima wibnonj, i ket
ton itendonj ti tungg wa.

Baptiso Yoanimna Ukenda Yit

57 I Elisabetim ket win wokatawonj b'iga ukendam, i ton ket leo b'iga
yukendonj. 58 Si ti wuswus rigap dide tina kus rigap utkundo da kea
Yonggyam tin ukoi kear wominy. Si ket ton tuwonj ti pilwa, dide yipand
gilgil sam yomniko ton kima. 59 I re b'iga eitim (8) bibir awonj ukendi
kak ke, ton b'usaya tuwonj Jakariyamna met wa onggit b'igam pilind
God ma obagendi tirir omni mal wugim ipka mile omniam. I ton pop
ti nyi oekam yomno re ti b'uimna nyi, Jakariya kena. 60 Aji ti mog ket
esmonggainonj da, “Nayi, Yoante ti nyi ibnau.” 61 I todaka tin womno da,
“Moina kus riga wa wingirind makwa ita riga yete odede nyi ke oeki.”
62 Aji ti b'u re yipya dum dide yit kesa na yebim. Si onggit penaemb ton
ti b'und yerkiti itaikena kima da, “Ringgityam nyi e man singi yomnyit
tin nyi oekam?” 63 I ton ket egekisinonj yipa irikapu wulpagim iyoyim,
dide ket yirikonj da, “Tina nyi re Yoante.” Si onggit map komkesa rigap
kid kesa aukito. 64 I odenja ket tina tugim ake weyat b'ogil awonda
yit opurenam. I ton ket Godind esourena yiyenonj. 65 I re komkesa ti
wuswusam rigap onggityam mile yir yongo, ton moga na aukito. I dide
kea komkesa rigap kupka dor tunggind Yuda eriya wingirind yit b'ataya
yiyeno onggityam mile gatab. 66 Si komkesa utkunda rigap kea onggityam
mile gatab nonyik b'amdena wuwenonj towaina garind, dide ton ket
b'igekena wuwenonj da, “Itemb b'iga ridede wip riga e ibim dem wari?”
Mop nokip ton kea yongwato da Yonggyamimna danda yim kea omanda
ton kima yibnenenonj.

Jakariyamna Esourena Ger

67 I ket God Yoanimna b'u Jakariyand Yinayina Wingawinga ke
yindangir yomnonj, si ton bage yit apureninonj da,
68 “Yesoulita Yonggyamind, Israel rigaina Godind,
mop nokip Ton kea Tina riga eskena eyeneninonj dide ket towaina
negir mile erabinonj ten itraram negir milem pilke. 69 I Ton
kea yirkokar okawam danda pita yomnonj meranim
Tina wiko riga Dawidimna b'usmureni riga wa wingirind.

- 70 Odede na it re ringmena re Ton get ke tirir omni yit akainonj Tina yina bageyam waina tugimind pitapita omnenam.
- 71 Onggityam yirkokar okawa dandate men yirkokar okawam nitrarkeniny meraina geja riga wa pilke dide komkesa rigaina danda yim wa pilke yepim re singi kesa nomnenanj.
- 72 Si onggit penaemb God kear amnikeneninonj mera b'uar, i onggit paemb kwa Ton nonyind yowameneny Tina yina outinti tirir omnijog yit.
- 73-75 God kea danda kima Tina nyi kima yindonj onggityam tirir omni yit mera b'u Abraam pilwa.
I ket mera daka nokainonj itringendam geja rigaina danda yim wa pilke.
Nokim da idenat men meraina komkesa yirkokar wimena wingirind moga kesa Ti wiko omnikaindam
Ti wipind yina b'amnena milend dide negir kesa dimdimjog milend.
- 76 Kor b'iga! Man ita pumbjog rigamna bageyam nyi okasit dem.
Mop nokip man naska e meket dem Yonggyamimna nya ongonjenam,
i Ton ket mor kak kae yik dem.
- 77 Mante dem Tina riga wumir tamneninyit dem da God opima towaina negir mile awir tamnikiny dem,
i ingkaimemb ton ket yirkokar okateny dem.
- 78 Onggit mop paemb ji da mera God re kid ke kear b'amnena riga e.
Si ra win okas, yirkokar okawa riga opima men netismariny dem odede wip it re lomkongga ringma ra tilis sibibind.
- 79 Nokim da idenat Ton tunyomareniny riga yepim re sibibind dide ujimna danda wirand wekeny,
i ingkaimemb Ton men wang nitiyeniny dem de ngimbla nya wa meraina menon wingirind.”
- 80 I ngirpu ket b'iga onyitonj dide wingawinga ke danda awonj. I ton ket yibnenenonj dea ta wul kesa tungg wa, ngirpu ton ket Israel riga wa wipind pitapita awonj.

Yesumna Ukenda Yit

(Mat 1:18-25)

2 I onggit winind, Roma mopyam king Kaisa nyi da Augusto, kea b'ingawa yit yoramitonj Roma kantri riga komkesa nyi b'aramkam gabmani peba wa. ² Si re onggityam naskajog nyi b'aramka win awonj, Kwireniyot Roma gabmani mopyam yebim Siriya eriya wingirind. ³ I komkesa riga itendentowainajog ukendipu taun wa nyi b'aramkam. ⁴ I

Yosep toda yiwatonj Najaret taun ke Galili eriya wingirind de Dawidimna taun wa nyi yogenayo da Betleem Yuda eriya wingirind, mop nokip ton re yipa Dawidimna b'usmureni b'iga na. ⁵I Yosep yikonj Betleem taun wa re Mariya kima na yana kima re ton tirir yomnonj molkongga awowim. Aji Mariya re kom kima na momta B'iga ukendam. ⁶I re ton dea de Betleem wa ebnonda, ti ket win wokatawonj B'iga ukendam. ⁷Si ton ket ti naskajog leo B'iga pita yomnonj, i B'iga kukum yomnikonj kobirgim ke, ngirpu yoramitonj b'angga ongenapu wul iyoki bora wa. Mop nokip komkesa obai met re yindangir na wekenonj, si towa maike ket pipmet awonj wimenam.

Mamoi Yir Ipka Riga dide Aneru

⁸I onggityam taun bau ke yap nata ninda mamoi yir ipka riga wungawungapu pipmetind wekenonj. I yipa siwinyind ton towaina mamoi yirgong omnika eyento. ⁹I onggit siwinyind Yonggyamimna aneru pitapita awonj towa wipind, i ket Yonggyamimna b'ogil inyomarenat ten anyowainonj. Si ton ma sobijog moga na aukito. ¹⁰Aji anerut ket ten amninonj da, “Goro moga tainam! Mop nokip kon ukoi jog sam kima God ma b'ogil yirkokar bage yit e pitapita omnyin wa pilwa rinte ra dem komkesa riga wa tainy. ¹¹Si yu ke wanim yirkokar okawayam pita ainy Dawidimna taunind. Ton re Kerisote yete re Yonggyam. ¹²I ija emb ji win iminjogim imjasya koina yit. Ra win wuyit, win ita odarya yipa b'iga kobirgim ke kukum omniki dide oramiti b'angga ongenapu wul iyoki borand.” ¹³I yir kesa borand pumb tungg ke ukoi geja aneru bobo yipand aukito onggityam yipa aneru kima dide Godind yesoureno i dide endento da,

¹⁴ “B'ogil inyomarena Godim pilwa pumb tunggind,
dide God kea ngimbla yoramis gowind riga wa pilwa yena re God
sam kima singi eyeniny!”

¹⁵I re anerup ten erarkito i itekto de pumb tungg wa, mamoi yir ipka rigap towalenggyam towalenggyam aena wuwenonj da, “Si b'ogil e, mabe wuyin Betleem taun wa, i yir ongongim yapu onggityam auki gasa rina re Yonggyam men wumir nomniny.” ¹⁶Si ton ket mukupmukup wuwonj dide adarto Mariya i Yosep i dide b'iga sobijog oramiti b'angga ongenapu wul iyoki borand. ¹⁷I re ton b'iga sobijog yir yongo, seg ket ton kea riga wumir ammento onggityam yitkak gatab rina re aneru towa usekainonj onggit b'iga gatab. ¹⁸I re rigap utkundento mamoi yir ipka rigaina opureni yitkak, ton komkesa riga kea kid kesa aena wuwenonj towaina opureni yit gatab. ¹⁹Aji Mariya re kea komkesa onggityam yitkak angapinonj ipindena kima tina gar wa. ²⁰I mamoi yir ipka rigap Godind b'ogil inyomarena yokaeno dide esourena yiyeno onggityam komkesa mile gatab rina re ton utkundento dide yir angto odede yipa wip rija na re anerut towa usekainonj. I ton ket odede esourena kima itekto.

Yesu God ma Obagendi Tirir Omni Mal Wugim Ipka Mile Yokatonj

²¹I re b'iga eitim (8) bibir awonj ukendi kak ke, Ton kea God ma obagendi tirir omni mal wugim ipka mile yokatonj. I ket Tin nyi yoeko da Yesu, itemb nyi inta it re rija na re aneru Mariyand wingawonj Tin nyi oekam, re ton maka Tin komind yowamonj.

²²I Mariya ake Yosep towaina iseka mile omniam bibir awonj rina re Mosemna gog yitit Ju riga engaeninonj b'iga ukendi kak ke omniam. Si ton Yesund yiyonda Yerusalem wa Yonggyamim okawam. ²³Mop nokip ton singi na Yonggyamimna gog yit ririrind omniam it re iriki yibim da, "God b'ingawa yit yoramitonj da win komkesa naskajog ukki leo b'iga nyi taekindam dem da ton re Yonggyamim yina omni im." ²⁴I kwa ton singi awonda Godim pilwa si gasa okawam Yonggyamimna opureni gog yit ririrind it re da nimog gimai o nimog sisilyam kimik.

Simeonimna Esourena Ger

²⁵I onggit winind yipa riga yibnonj Yerusalem taunind nyi da Simeon. Ton re negir kesa dimdimjog riga na dide Godind moga kima ewangaya riga na. Si ton yir yungaukenenonj re Keriso na yet ra Israel riga wa yirkokar takainy dem. I Yinayina Wingawinga kea ton kima yibnenenonj. ²⁶I Yinayina Wingawingat ket nonony yit pitapita yommenainonj da, "Man ma ita uj yir onget dem ngirpu ama ra dem man yir onget dem Yonggyamimna Keriso." ²⁷I Yinayina Wingawingat tin ket wip yomnonj menonim de yinamet wa. I re ket ton yinamet aba wa opendonj, odedend ket molkonggap todaka towa B'iga Yesund iyonda onggit pipmet wa gogimna b'ingawa ririrind mile omniam Ti pilind. ²⁸Si Simeon ket onggit B'igand yokatonj dide yim kumbind yowamonj. I ton ket Godind b'ogil yit kima yesoulitonj odede da,

²⁹ "Yonggyam! Kon re moina wiko riga en, i yu man kea koina gar bebig awir yomnyit moina tirir omni yit ririrind, si kon ket ririr e ngimbland gowukoi iraren.

³⁰ Mop nokip kon kea koina yirkipjog ke yir yongen moina Yirkokar Okawa Riga.

³¹ Man kemb onggityam Yirkokar Okawa Riga yongonjenyit komkesa gowukoi riga wa wipind.

³² Ton re inyomarenam ngaya e God ma obagiki kesa riga wa, i Ton re b'ogil inyomarena e moina riga, Israelim."

³³Si ket Ti b'u ake Ti mog re kid kesa na awonda onggityam Ti gatab opureni yit map. ³⁴I Simeon b'ogil amnonj Ti b'u ake Ti mog, i ket Ti mog Mariyand womnonj da, "Yir, God yoramitonj onggit B'igand re Israel wingirind jogjog riga negir wa sap otenda mana dide b'ogil wa utnyita mana. I kwa Ton re yipa ongwatam mal e tainy rinte ra dem rigap Tin

isaenenyi. ³⁵Si onggit paemb man ita okasit dem ukoi gar kopa odede ringma ra ukoi girit moina kukip b'itpaukis, mop nokip ingkaemb jogjog rigaina negir nony menamena pita taukanj dem towaina gar ke.”

Anamna Bage Yit

³⁶I onggit winind yipa kongga bageyam wibnonj re nyi da Ana. Ton re Panuwelimna ngimngai b'iga na, Aser gu wingirind. I ton re molegjog na. Si re ton leo kima awonj, ton seben (7) kemag kima na yipand ebnonda. ³⁷Onggit kak ke ton mik na rain ngirpu re ket eiti powa (84) kemag awonj. Ton makwa yinamet yirarenenonj, aji ton ita siwiny dide ita bibir Godind yewangaenenonj owou uwabika kima dide yir opmita kima. ³⁸I onggit winind odedend ton ket tikonj yinamet wa, dide Godind siteket yit yomnonj. Seg ket ton onggit B'igam gatab apureninonj komkesa riga wa yepiya re yir ungauka yiyeno da Keriso ita Yerusalemimna negir mile irab dem.

³⁹I re Yosep ake Mariya komkesa mile endwasinonda Yonggyamimna gog ririrind, ton ket itendonda towainajog Najaret taun wa Galili eriya wingirind. ⁴⁰I ademb de itemb B'iga Yesu inika yikonj dide kak seo auka yikonj. I Ton b'ogil multekip ke yindangir omni na yibnonj dide Godimna wurar re omanda Ton kima yibnenenonj.

Kewar B'iga Yesu Yinametind

⁴¹I Yesu ma b'u ake mog re ita kemagind Yerusalem taun wa menon yokatenenonda Ju riga waina Uj Igwanti Nony Iyena Diyamdiyam Winind. ⁴²Si ton onggityam diyamdiyam omnika mile ririr nat wuwonj Yerusalem taun wa, re Yesu twelp (12) kemag rain. ⁴³I re ket onggityam diyamdiyam win b'undwattonj, molkonggap tungg wa yiwatonda riga bobo kima, aji kewar b'iga Yesu omanda Yerusalem taunind itendonj. Aji Ti b'u ake Ti mog re maka wumir awonda Tina itenda gatab. ⁴⁴Si ton towaina menon wingirind ija na nony awonda da towa B'iga re ita yipand ik towa bobo wingirind. I re ton yipa bibir kima pinjog menon yokatonda, ngirpu ton ket towa B'igand oraka yiyenonda towaina kus riga wa wingirind dide towa rigawar wa wingirind. ⁴⁵Aji re ket Tin maka yodaronda, ton ket nyatnyata Tin oraka yiyenonda ngirpu itendonda Yerusalem taun wa. ⁴⁶I re ton oraka yiyenonda nowa bibir kima, ton ket Tin yodaronda yinamet aband omi gog ouyaena riga ganggand. Si Ton towaina opureni yitkak na utkundeninonj, i dide Ton b'arkena aramiteninonj towa pilwa. ⁴⁷I re Ton mira amneninonj, komkesa riga yepiya re Tina yit utkudento, ton kid kesa na aena wuwenonj Tina b'ogil multekip dide Tina ismongga yit gatab. ⁴⁸I onggit winind re Ti b'u ake Ti mog Tin yir yongonda, ton kea winga kesa awonda. Si ket Ti mog Tin yomnonj da, “Kor b'iga! Nangga pena Man sin odede isnawa kesa

nomnennyimit? Yir de, kon dide Mor b'u ma sobijog gar bebig kima na sin Men oraka miyenyima.” 49I ket Yesu ten amnonj da, “Nangga ma win Ken oraka niyanya? Win ma wumir i da Kon b'ogla Kor B'uimna metind nitibnyin?” 50Aji ton maka nony aukonda Tina opureni yitkak gatab rina re ten amnonj. 51I ket Yesu yikonj Ti b'u ake Ti mog kima de Najaret taun wa. I re ton Najaret taunind wekenenonj, Ton kea towaina yit akatenenainonj. Aji Ti mog Mariya re kea komkesa Tina opureni yitkak angapeninonj tina garind. 52I Yesu kea Tina b'ogil multekip ke dide Tina uski ke inika yikonj. I Godim pilke dide riga wa pilke singi b'iyena kea ukoi warabag auka yikenonj.

Baptiso Yoan Pitapita Amninonj Engendam Yitkak

(Mat 3:1-12; Mak 1:1-8; Yoan 1:19-28)

3 1-2I Godimna bage yit ikonj Jakariyamna b'iga Yoanim pilwa wul kesa tunggind onggit win nat re piptinim (15) kemag rau Tiberiyom yet re Roma mopyam king Kaisamna pipmetind yibnonj, i kwa re Pontiyo Pilato Roma gabmani mopyam yebim Yuda eriya wingirind, i kwa re Erod king pipmetind yebim Galili eriya wingirind, i kwa re Erodimna yipa mog ke nany Pilip king pipmetind yebim Ituraya eriya dide Trokoniti eriya wingirind, i kwa re Lisaniyo king pipmetind yebim Abilene eriya wingirind, i kwa re Ana dide Kayapa yina mopyam si riga pipmetind rebna. 3I Yoan ket yikenonj komkesa Yordan kilim wuswus tungg nata, i ton pitapita omnena yiyenonj re engenda baptiso na negir mile ewaikitam gar ke. 4Ija naemb ji ton onggityam yitkak ririrkip omnam pitapita yommenonj rinsim re bageyam Isayamna peband iriki wekeny odede da,

“Ita ukoi ara b'emoka pita tainy dem wul kesa tunggind da,
win Yonggyamim nya ispihindam,
i Tina menonpu nya dimdim omnihindam.

5 Si komkesa kipkip pipmet b'ogla imanggurki waken,
i komkesa dor dide sukak pipmet irinjip kesa iporki waken.
I kaokao nya dimdim auki waken,

dide komkesa negir b'uowombenapu gasa ewaikuri waken nya ke.

6 I ita ket komkesa rigap yir ongi dem Godimna yirkokar okawa mile.”

7I Yoan riga bobo yit amninonj yepiya re wuwenonj ti pilwa baptiso okatam da, “Win, negir guda kima girem waina b'igawar! Yet wen wumir amninonj da win b'ogla b'itkenindam Godimna ukoi soro kima b'isagikam pilke rinte ra ik dem? 8Si onggit paemb ra win singi engenda baptiso okatam, si win b'obogil garjog ke iminjog engenjinam waina negir milem pilke de Godim pilwa, dide ket onggit engendi mile ririrind kip kima milend wimena tuwenyit. I win goro odede nonyik b'atimdeninam da, 'Sin re Abraamimna b'iga im.' Mop nokip kon kea wen amninyin da God

ririr e onggit gimo wa pilke Abraamimna b'iga tawinkiny. ⁹Si yapa re kea wul mop wus nate yibim igogim. Si yonggyam ita onggit yapa ke komkesa wul igka teyeniny rinsim re maka b'ogil kip ejagikanj, dide ton ket wul wa teskokiny so omniam.” ¹⁰Si riga bobop tin yerkitoda, “Nangga e ket omniku?” ¹¹Si Yoan ten mira amninonj da, “Ya mana ra nimog kobirgim ibnau, ton b'ogla weweyam yakau tinim yet ra kobirgim kesa ibim. I ya mana ra owou ibnau, toda ija na yipa wip mile yamnik.” ¹²I teks imdayam riga todaka tuwonj Yoanim pilwa baptiso okatam, i ton ket tin yigekitoda, “Ouyaena riga! Nangga e sin omniku?” ¹³Si ton ten amninonj da, “Win b'ogla b'ingawa ririrind teks imda teyenindam, aji goro kwa onggit tumind wewe imda teyeninam!” ¹⁴I ninda geja rigap todaka tin yigekitoda, “Nangga e sidaka omniku?” Si ton ket ten mira amninonj da, “Goro win isanikesa waina danda ke rigaina wulkip imda teyeninam. I goro riga b'isagikand oramitena teyeninam b'anyginena nya ke. Aji win b'ogla nony sam taukindam waina mira wulkip gatabim.”

¹⁵Si komkesa riga yepiya re Kerisond yir yungaeneno, ton towaina garind Yoanim gatab ikalnena yiyeno da, “Rika ton amaya Kerisote?” ¹⁶Si Yoan komkesa riga mira amninonj da, “Kon nyi kaim wen baptiso amnikinyin, aji ukoijog danda riga ita ik dem yaina danda e re Ti pumbjog wa e aji koina re goujog wa e. Si kon ma ririrkipjog riga en Tina yonginkak kai itreka wiko omniam rina ra goujog wiko rigat mile omniam. I Ton wen baptiso omniam teyeniny ra Yinayina Wingawinga kae dide wul dimil kae. ¹⁷I Ton ita Ti yimind owoukip iukapu sabol yowam, si Ton ita Tina owou erngokapu pipmetind komkesa uwakurki owoukip sabol ke ouroka teyeniny dide ket pumb wa b'itiskeniny ribim uturenam. Nokim da idenat Ton b'ogilyam owoukip tekalnenniny mogji kesa kip dide au wa pilke. I ra Ton onggityam wiko seg ominy, Ton ita ket b'ogilyam owoukip taramkiny owoukip ongapapu met b'iga wa, aji Ton ket mogji kesa kip dide au so tamnikiny osouka kesa wul ke.” ¹⁸Si Yoan God ma b'ogil yirkokar bage yit riga wa pitapita amnenainonj re jogjog b'engabenga b'ugowa yit kima na. ¹⁹Aji Yoan samany yit kima pitapita yomnenainonj king Erodimna^c negir mile rina re ton amnikinonj ti yingganimna kongga Erodiya kima dide komkesa tina negir mile gatab. ²⁰I re Erod Yoanind sibibmet wa yoramitonj, si ton ingkenaemb kwa tina negir mile b'usaya yangitonj komkesa tina negir mile tumind.

Yesu Baptiso Yokatonj
(*Mat 3:13-17; Mak 1:9-11*)

²¹I re komkesa rigap baptiso yokateno Yoanim pilke, Yesu toda kea baptiso yokatonj, dide yir opmitonj. I onggit winind wub ipangendonj,

^c 3:19 Itemb king Erod ti nyi re Erod Antipat yet re king pipmetind yebim Galili eriya wingirind.

22 dide Yinayina Wingawinga eouka ikonj Ti pilwa ija na it re gimai re dide. I ket ara ikonj wub kumb ke da, “Man re Koina B'iga et yena re Kon singi miyenyin. I Kon ukoi sam en Mornim.”

Yesu ma B'usmureni Nya

(Mat 1:1-17)

- 23 I Yesu Ti wiko yotomonj re Ti teti (30) kemag nat. I rigap ija na wumir yokateneno da,
 Ton re Yosepimna b'iga e, i Yosep re Elimna b'iga e, 24 i Eli re Matatimna b'iga e,
 i Matat re Lebimna b'iga e, i Lebi re Melkimna b'iga e, i Melki re Yanaimna b'iga e,
 i Yanai re Yosepimna b'iga e, 25 i Yosep re Mattatiamna b'iga e, i Mattatiya re Amosimna b'iga e,
 i Amos re Naumimna b'iga e, i Naum re Eslimna b'iga e, i Esli re Nagaimna b'iga e,
 26 i Nagai re Maatimna b'iga e, i Maat re Mattatiamna b'iga e, i Mattatiya re Semeinimna b'iga e,
 i Semein re Yosekimna b'iga e, i Yosek re Yodamna b'iga e, 27 i Yoda re Yoananimna b'iga e,
 i Yoanan re Resamna b'iga e, i Resa re Jerubabelimna b'iga e, i Jerubabel re Salatiyelimna b'iga e,
 i Salatiyel re Nerimna b'iga e, 28 i Neri re Melkimna b'iga e, i Melki re Adimna b'iga e,
 i Adi re Kosamimna b'iga e, i Kosam re Elmadamimna b'iga e, i Elmadam re Erimna b'iga e,
 29 i Er re Yosuwamna b'iga e, i Yosuwa re Eliyejerimna b'iga e, i Eliyejer re Yorimimna b'iga e,
 i Yorim re Matatimna b'iga e, i Matat re Lebimna b'iga e, 30 i Lebi re Simeonimna b'iga e,
 i Simeon re Yudamna b'iga e, i Yuda re Yosepimna b'iga e, i Yosep re Yonamimna b'iga e,
 i Yonam re Eliyakimimna b'iga e, 31 i Eliyakim re Meleamna b'iga e, i Melea re Menamna b'iga e,
 i Mena re Matatamna b'iga e, i Matata re Natanimna b'iga e, i Natan re Dawidimna b'iga e,
 32 i Dawid re Yesaimna b'iga e, i Yesai re Obedimna b'iga e, i Obed re Boasimna b'iga e,
 i Boas re Salmonimna b'iga e, i Salmon re Naasonimna b'iga e, 33 i Naason re Aminadabimna b'iga e,
 i Aminadab re Adminimna b'iga e, i Admin re Arnimna b'iga e, i Arni re Esromimna b'iga e,

i Esrom re Peresimna b'iga e, i Peres re Yudamna b'iga e, ³⁴i Yuda re Yakobimna b'iga e,
 i Yakob re Isakimna b'iga e, i Isak re Abraamimna b'iga e, i Abraam re Teramna b'iga e,
 i Tera re Naorimna b'iga e, ³⁵i Naor re Serukimna b'iga e, i Seruk re Riumna b'iga e,
 i Riu re Pelegimna b'iga e, i Peleg re Eberimna b'iga e, i Eber re Selamna b'iga e,
³⁶i Sela re Kainanimna b'iga e, i Kainan re Arpaksadimna b'iga e, i Arpaksad re Semimna b'iga e,
 i Sem re Nowamna b'iga e, i Nowa re Lamekimna b'iga e, ³⁷i Lamek re Mutuselamna b'iga e,
 i Mutusela re Enokimna b'iga e, i Enok re Yaretimna b'iga e, i Yaret re Maalalelimna b'iga e,
 i Maalalel re Kenanimna b'iga e, ³⁸i Kenan re Enosimna b'iga e, i Enos re Setimna b'iga e,
 i Set re Adamimna b'iga e, i Adam re Godimna b'iga e.

Satana Yesund Otonkena Yiyenonj

(*Mat 4:1-11; Mak 1:12-13*)

4 ¹I Yesu Yinayina Wingawinga ke yindangir omni na yiraronj Yordan kilim. Si Yinayina Wingawingat Tin wip yomnonj wul kesa tungg wa. ²Onggit wul kesa tunggind Ton otonkena yokatenonj Satanam pilke poti (40) bibir kima. I Ton makwa nangga na awinonj onggit bibir wingirind. Si re ket Ton onggityam bibir undwasinonj, si Ton ket owoupa awonj. ³I ket Satana Tin yomnonj da, “Rada Man Godimna B'iga et, Man ingaet onggityam gimo engendam yipa sana kipolim.” ⁴Aji Yesu tin mira yomnonj da, “Yina peband ija emb ji iriki yibim da, ‘Rigat ma owou nena kae yilo yibim.’ ” ⁵I ton ket Yesund yiyonj yipa pumbpumb pipmet wa, i Tin ket youyainonj gowukoi komkesa kantri gatab sobijog winind. ⁶I ket Satana Tin yomnonj da, “Kon Mor motkainyin onggityam komkesa gowukoi danda dide komkesa kantrimna b'ogil inyomarena. Mop nokip onggityam komkesa re kor manaemb nagoninonj, si kon ririr en ti ogonam yena ra kon singi omnyin. ⁷Si onggit paemb ra Man ken kumsos netimket, komkesa gasa ra ket Mor mima taukanj.” ⁸Aji Yesu tin mira yomnonj da, “Ija emb ji yina peband iriki yibim da,
 ‘Man moina Yonggyam Godind kumsos emkenenyit,
 i Ti nena mana emb wiko omnikaenenyit.’ ”

⁹I kwa ket Satana Yesund wip yiyonj de Yerusalem taun wa, dide Tin yonyitonj yipa yinamet papkak kumbind. I ton ket Yesund yomnonj da, “Rada Man Godimna B'iga et, ingkek Man Molenggyam b'atiyakite de gou wa! ¹⁰Mop nokip yina peband ija emb ji iriki yibim da,

‘God opima Tina aneru tengainy dem
Men b'obogil yir engendam.’

11ƒ kwa iriki yibim da,

‘ƒ ton ket men towaina yim kumbind motowami.

Si onggit paemb man ma ita ket moina pis taskisit motir kumbind.’”
12 Aji Yesu tin mira yomnonj da, “Yina peband kwa ija emb ji yindenya da,
‘Man goro moina Yonggyam Godind otonkena milend oramitenim!’” 13ƒ
re ket Satana onggityam komkesa otonkena mile undwasinonj, ton ket
Yesund yiraronj, ngirpu rokate ra kwa yipa b'ogil win okas otonkenam.
14ƒ ket Yesu Yinayina Wingawingamna danda kima na itendonj Galili
eriyawa, si Ti gatab yidir yit re kea kupka eriyawa nata yikenonj. 15ƒ Ton
kea riga ouyaena eyeninonj towaina yir opmitenapu met nata, i kea ket
komkesa rigap Tin daka esourena yiyeno.

Rigap Yesund Yisayo Najaret Taunind
(*Mat 13:53-58; Mak 6:1-6*)

16ƒ ket Yesu itendonj Najaret taun wa rikind re Ton ukoi awonj. ƒ re
Ju riga waina wiram dide yir opmitena bibir awonj, Ton kea ket yikonj
Ju riga waina yir opmitenapu met wa Tina get ke mile ririrind, dide ket
b'igaronj wingir wa, i ket onyitonj yina peba ogenkam. 17Si re yina peba
owama rigat Ti yokawonj bageyam Isayamna eoromki peba, Ton ket peba
yobgokonj dide oraka yiyonj onggityam pipmet rikind re odede yitkak
iriki yebim da,

18 “Yonggyam Godimna Wingawinga ita kor pilind,
mop nokip Ton kea ken gaya ke neaukonj

Tina b'ogil yirkokar bage yit pitapita omnenam gasa kesa riga wa
pilwa,

i Ton kea ken nitmikitonj pitapita omnenam Tina mile,
opi re da ijobiki riga itrinkam i yirdidi riga yir ipangkam,

i dide bebig awir omnam towa pilke yepim re bebig wirand
wekeny,

19 i kwa pitapita omnenam onggityam kemag ridenasim ra Yonggyam
riga kear tamneniny.”

20ƒ Ton ket peba yeoromkonj, i peba owama rigam yokawonj. ƒ re ket Ton
omitonj yitkak pitapita omnenam, komkesa riga yepiya re wekenonj onggit
Ju riga waina yir opmitenapu metind, adea de Ti pilwa yir isokto. 21ƒ ket Yesu
b'atomonj opurena, i ten amninonj da, “Yu kemb itemb Isayamna iriki yitkak
ririrkip ainy onggit opureni yitkak ke rina re win utkundenya waina yipya ke.”
22Si komkesa rigap sam kima yit yimjateno Ti gatab, i ton ket kid kesa aena
wuwenonj Tina tugim ke opureni wurar kima yitkak gatab, i ton b'igekento da,
“Ringma, ma inte ji Yosepimna B'iga?” 23Si Yesu ten ramnin da, “Win opima
Kornim onggityam tendam gatab yit tendenindam da, ‘Dokta! Man naska

molenggyam moina kopa ke b'isakende!' Win kwa tendenindam da, 'Sin kea utkundentondam komkesa mile rina re man amnikinot Kaparnaum taunind. Si onggit paemb man b'ogla kwa dikind moinajog tunggind tamnikinyit onggityam komkesa mile.'” 24I kwa Ton ten amninonj da, “Kon iminjog wen tamninyin da rigap makwa ita bageyam simesime yomnikenenyi tinajog tunggind. 25I Kon kwa iminjog wen tamninyin da Eliyam winind re piro kesa win awonj nowa kemag dide siks (6) mobi kima dide ukoi sou aukonj komkesa Israel gowind, ma yipa kima mik kongga na wekenonj Israel wingirind. 26Aji onggit winind God maka Eliyand yitmikitonj towa pilwa, aji atata b'enga kantri wa, yipa mik konggam pilwa de Sarepta tungg wa Sidon eriya wingirind. 27I kwa ma yipa kima leprosi kopa riga na wekenonj Israel wingirind onggit winind re Elisa bageyam yebim. Aji makwa yipa riga kilkip kesa awonj towa wingirind, aji ina yipaina Siriya riga Naaman nenat.” 28I re komkesa rigap onggityam yitkak gatab utkundento onggityam Ju riga waina yir opmitenapu metind, si ton ma sobijog na soro aukito. 29Si ton ket owinkito, i ket Yesund otoukena yiyo de taun bau wa, ngirpu ket Tin yiyo de ekliti dor yiu wa rikind re onggityam taun orange yibnonj, nokim da Tin iski de paga wa. 30Aji Yesu yikonj re riga bobo inyiny nat, dide ket Ti menon yokatonj.

Negir Wingawinga ma Okati Riga

(Mak 1:21-28)

31I re Yesu yikonj de Kaparnaum taun wa Galili eriya wingirind, ademb de Ton ket riga ouyaena eyeneninonj ita Ju riga waina wiram dide yir opmitena bibir wingirind. 32Si riga re kid kesa na aena wuwenonj Tina ouyaena gatab, mop nokip Tina opureni yitkak re danda kima na wuwenonj. 33I onggit Ju riga waina yir opmitenapu metind omanda yipa Satanamna negir kilkil wingawinga ma okati riga yibnonj, i ton ket ukoi ara kima obailitonj. 34“Yaaa! Yaaa! Yesu Najaret tunggam! Nanggamog e Man sowa pilind singi yomnyit? Ringma Man negir omna mim sin notupinyit? Kon wumir en yetet Man. Man re Godimna yinayina B'igatet.” 35Aji Yesu itemb ji negir wingawinga samany yiyowonj da, “Muma kesa ae! Or opende ti pilke!” I ket onggit negir wingawingat onggit rigand gou wa sap yotendonj riga wa wingirind, ngirpu ton ket opendonj ti pilke, aji ton makwa yipa ti kipear negir yomnawonj. 36Seg ket komkesa riga re kid kesa na aena wuwenonj, i dide ket towalenggyam towalenggyam b'arkena wuwenonj da, “Nangga yitkak e ji? Ton jijab kima dide danda kima e negir kilkil wingawinga yingau, i ton ket openj.” 37I ket Yesum gatab yidir yit re kea warabag auka yikenonj komkesa wuswus tungg nata.

Yesu Jogjog Riga Kopa ke Esakenjinonj

(Mat 8:14-17; Mak 1:29-34)

38I Yesu ket Ju riga waina yir opmitenapu met yiraronj, dide ket yikonj Simonimna met wa. I Simonimna konggayam jeam re omanda ukoi juwar

kima wibnonj. Si rigap ket Yesund wumir yomno ti gatab. ³⁹Si Yesu ti wusind onyitonj dide ket samany yit kima juwar weaukenawonj, si ket juwarit tin wiraronj. I ton ket odenja utnyitonj, i ton ket Yesu dide Ton kima meni riga yim akainonj. ⁴⁰I re lom ipanjika yikonj, rigap eyento komkesa b'engabenga wip kopa kima riga Yesum pilwa. Si Ton yipayipa kopa riga wa pilind yim aramiteninonj, i ket kea ten esakenjinonj. ⁴¹I re kwa negir wingawinga todaka opekto jogjog riga wa pilke odede ukoi ara kima da, “Man re Godimna B'iga et.” Aji Ton ten samany eyowinonj dide ten eswanginonj yit opurenam, nokip ton wumir na da Ton re Kerisote.

Yesu Ninda Tungg nata Yikenonj God ma Yit Pitapita Omnenam
(Mak 1:35-39)

⁴²I re ket yisparonj, Yesu taun ke opondonj dide yikonj tintawar wa. I re riga bobop Tin oraka yiyeno, ton kea Tin yodaro, ngirpu ton ket Yesund yogoko da, “Goro sin nitrarinim!” ⁴³Aji Yesu mira amninonj da, “Kon b'ogla God ma pumb tungg gatab God ma b'ogil yirkokar bage yit pitapita omnena iyenyn deta kwa ninda taun nata, mop nokip God onggit ril mapenaemb Ken nitmikitonj.” ⁴⁴Si Ton ket kea God ma b'ogil yirkokar bage yit pitapita omnena yiyenonj Ju riga waina yir opmitenapu met nata komkesa Yuda eriya wingirind.

Yesumna Naskajog B'auyaena Riga
(Mat 4:18-22; Mak 1:16-20)

5 ¹I yipa winind re riga bobo Godimna yitkak utkundeno Yesum pilke, ton pipmet b'isatena kima Yesund yiwatinto. Si Ton re onyiti na yibnonj Genesaret sipa yurund. ²I Ton nimog giga yir angonj rina re sipa yurund gil wa isonati ebnonda. Aji kabum iwika rigap kea onggit giga ke gil ipkito dide ket ton gir iseka nat wekenonj. ³I Yesu yipa giga kumb wa angitonj, it re Simonimna giga. Si Ton ket Simonind yerkitonj gil ke giga isonatam sobijog ngai de nyi wa. I re rigap giga yisonato nyi wa, Yesu ket omitonj giga kumbind, i ingkenaemb ket Ton riga bobo auyaeninonj. ⁴Re ket Ton ouyaena seg awonj, Simonind yomnonj da, “Giga yiya kuninkunin kubol wa, i amaemb de win ket kabum iwikam gir tekoukindam!” ⁵Si Simon mira yomnonj da, “Ukoyam! Sin ke pop b'asoindam siwiny pinpin, aji makwa ngai nangga na ewikindam. Aji ke man mindenyit, si b'ogil e kon opima gir tekoukinyin.” ⁶Re ket ton Yesumna yit ririrind wiko yomniko, si ton ket ma yipa kima kabum na ewikto opimemb da jogjog, ngirpu towaina gir ipka wuwenonj. ⁷Si ton ket yim ke ara eauto towa wikomadwar yepiya re yipa gigand wekenonj da, “Tuyim yim okawam!” Seg ton ket tuwonj, i ket nimognimog giga yindangir amno, si osiemb re giga kea itwa ekonda momta iuyongam. ⁸I re Simon Petro onggityam mile yir yongonj, ton ket sap otendonj Yesum

wipind ukoi b'isnawa kima, i yindonj da, “Yonggyam! Ewaikite kor pilke! Nokip kon re negir mile riga en.”⁹ Mop nokip ton dide komkesa riga yana kima re ton yipand wiko yomniko kabum iwikam, kid kesa na auto onggityam jogjog kabum map rina re ton ewikto.¹⁰ I Jebedaimna b'iga Yakobo ake Yoan yesi re Simonimna wikomad, toda kwa odede yipa wip na kid kesa awonda. Si ket Yesu Simonind yomnonj da, “Goro moga tawim! Man yu bibir ke taet ra ket riga iwikayam et.”¹¹ Seg ton ket giga gil wa esoneno, dide ket komkesa gasa erarkito, ngirpu Yesund yimta yundoko.

Yesu Leprosi Kopa Riga Yisakendonj

(Mat 8:1-4; Mak 1:40-45)

¹²I re Yesu yipa taunind yibnonj, adea de yipa leprosi kopa ke ikangindi riga yibnonj. I re ton Yesund yir yongonj, ton as eamanta kima sap otendonj Ti wipind, dide ket Tin il yongkonj da, “Yonggyam! Ra man singi taet, Man ririr e ken kilkip kesa notinyit.”¹³ I Yesu ket Tina yim b'itnikonj dide ket tin yesopayonj odede yit kima da, “Kon ita singi. Kilkip kesa ael!” Si odenja it ra leprosit tin yiraronj.¹⁴ I Ton ket tin yingawonj da, “Goro yena wumir omnim! Aji dimdim na meket moina ji ouyawam de yina si rigam pilwa. Ra ton imjas dor da kea man iminjog kilkip kesa aet, man ket Godim si gasa tanggikinyit dor, i eyinyit de yina si rigam pilwa si omniam Mosemna b'ingawa yit ririrind. Nokim da idenat ton mitimjas riga wa wipind da, ‘Man kea b'isakenjit dide kilkip kesa aet.’”¹⁵ Aji Yesum gatab yidir yit re kea b'usaya warabag auka yikenonj. I ket jogjog riga bobo yipand wuwenonj Ti pilwa yit utkundam dide towaina kopa ke isakendam.¹⁶ Aji Yesu kea towa pilke ewaikenonj dide yikenonj riga kesa tungg nata, i ket ademb ta yir opmitenenonj.

Yesu Dimir Kopa Riga Yisakendonj

(Mat 9:1-8; Mak 2:1-12)

¹⁷I yipa winind re Yesu riga ouyaena eyeninonj, Parisai riga dide gog yit ouyaena riga omanda omniki wekenonj yepiya re wuwenonj komkesa tungg ke Galili eriya wingirind i Yuda eriya ke i Yerusalem taun ke. Si Yonggyamimna danda kea dikind Yesum pilind yibnonj kopa riga isakendam.¹⁸ I onggit winind ninda rigap yipa dimir kopa riga titind iyo, i ton ket nya oraka eyento tin met wingir wa igaram dide oramitam Yesum wipind.¹⁹ I re ket maka re nya yodaro tin igaram wingir wa riga bobo map, si ton ket bau ke tit na ijo, i wuwonj de ket met papkak kumb wa, ngirpu ton ket tumind ouki gasa yotorko. Seg ton ket onggit borand tin inka yiyo tit kima de Yesum tunkipjog wa, i ket yoramito Ti wipind.²⁰ I re Yesu towaina gar ke utkunda yir yongonj, Ton yomnonj da, “Kor riga! Moina negir mile kemb awir auranj.”²¹ I re Ju riga waina

gog ouyaena riga dide Parisai rigap onggityam yit utkundo, ton kea yit b'iklawa yiyeno da, “Yete ji riga it re Godind yisadreny? Yete ririr e negir mile awir omnikam? Aji Godta tinta yipaina.” ²²Si Yesu re kea wumir yokatonj towaina b'iklawa yit gatab, i Ton ket ten amninonj da, “Nangga pae win yit b'iklawa yiyenya waina garind? ²³Rinte yit opulitam wewa ainy it re da, ‘Mor negir mile kemb awir auranj’ o da, ‘Utnyite, i menon yokate?’ ²⁴Aji Kon yipa gasa e omniken wen ouyawam da Rigamna B'igam ita Ti danda gowukoyind negir mile awir omnikam.” I Ton ket itemb rigand yomnonj yet re dimir kopa kima yibnonj da, “Kon motinyin. Utnyite, moina tit yuwowate, i moina met wa meke!” ²⁵Seg re ket odenja ton utnyitonj towa wipind, i tit yuwowatonj rikind re ton yutungi yibnonj, i ket yiwatonj tina met wa Godind esourena kima. ²⁶Si komkesa riga kea winga kesa auto, i ket Godind esourena yiyeno, i dide ukoi mogat kea ten akasinonj. Si ton ket endento da, “Yu men kid kesa kima e yiyata b'ogil mile yir yongu.”

Yesu Teks Imdayam Lebind Ara Yemokonj

(Mat 9:9-13; Mak 2:13-17)

²⁷I onggit kak ke ket Yesu opendonj, Ton kea yipa teks imdayam riga omi yir yongonj teks imdapu metind, nyi da Lebi. Si Yesu ket tin yomnonj da, “Yimta nundoke!” ²⁸Ngirpu ton ket utnyitonj, i ket komkesa gasa erarkinonj, dide ket Yesund yimta yundokonj. ²⁹Seg Lebi ket ukoi owou yomnikonj Yesu kima diyamdiyam awowim tina metind. Si ma yipa kima teks imdayam riga bobo i kwa ninda riga yipand diyam awowind wekenonj Yesu dide Tina b'auyaena riga kima. ³⁰Aji re Parisai riga dide towa gatab ke gog ouyaena rigap onggityam mile yir yongo, ton kea Yesumna b'auyaena riga ugagto dide egekito da, “Nangga mop paim win diyam aindam dide nyi anaikindam yipand teks imdayam dide negir mileyam kima?” ³¹Seg ket Yesu ten mira amninonj da, “Ma kopa kesa rigapim dokta singi omnyi, aji kopa kima rigapim. ³²Kon ma negir kesa dimdimjog riga na tatupinond engendam negir milem pilke de Godim pilwa, aji Kon ara emokam tatupinond re negir mile kima riga na towanim engendam negir milem pilke de Godim pilwa.”

Owou Uwabika Win Okata gatab Yit

(Mat 9:14-17; Mak 2:18-22)

³³Seg ton ket Yesund yomno da, “Yoanimna b'auyaena rigap opima ita winind owou uwabika dide yir opmita win akatenenanj, i toda Parisai riga waina b'auyaena riga kwa odede ima aukenenanj. Aji Moina b'auyaena riga wuweny re owou dide onaika nasim.” ³⁴Si Yesu ket ten amninonj da, “Ringma, win ririr im sisil kongga kima rigamna rigawar owou uwabika win okatam tamnindam, ra ton sisil kongga kima riga

dikinda towa wingirind ibim? ³⁵Aji ita win ik dem, ra sisil kongga kima rigat tewaikis dem towa pilke, si onggit win nasimemb dem ton ket owou uwabika win okatenyi dem.” ³⁶Ɔ Ton ket towa tendam yit usekawonj da, “Makwa yipa rigat ita sisil kobirgim ipik sobijog kib okatam dide onggit sisil kobirgim kib ke kesam kobirgim pasi ominy. Ra ton odede omnik, ton ita inyowik sisil kobirgim. Aji onggityam sisil kobirgim kib re ma ita b'itinkis onggit kesam kobirgimind. ³⁷Ɔ dide makwa yipa rigat ita sisil ik tangjikiny kesam b'angga gim ke omniki ik ga wa. Mop nokip sisil ik ita inika ik, aji kesam b'angga gim ke omniki ik ga ra ma ita warabag tawik. Si ra ton odede omnik, onggit sisil ikit opima onggityam kesam b'angga gim ke omniki ik ga temkiny. Si ik ket tokombarik, i onggityam b'angga gim ke omniki ik ga kwa da opima negir taukanj. ³⁸Aji ton b'ogla sisil ik tangjikiny de sisil b'angga gim ke omniki ik ga wa. ³⁹Si makwa yipa rigat ita singi tainy sisil ik onayam kesam ik onai seg ke, mop nokip ton ija e indeny da, ‘Kesamyam re otomanti e.’ ”

Ju Riga waina Wiram dide Yir Opmitena Bibirim Yonggyam Yesu
(*Mat 12:1-8; Mak 2:23-28*)

6 ¹Ɔ yipa Ju riga waina wiram dide yir opmitena bibirind Yesu Tina b'auyaena riga kima wit sopapu yuru nata yikonj. Ɔ Tina b'auyaena rigap kea wit kolkak utouka eyento dide yim ke iimika eyento gim uwakurkam, ngirpu ton wit kip auto. ²Si ninda Parisai riga endento da, “Nangga pae win onggityam mile yomnikya rinte re ma yiyag e omnikam meraina wiram dide yir opmitena bibirind?” ³Ɔ Yesu ten mira amninonj da, “Ma ke win yina peba yogenkonda onggityam yitkak gatab rina re Dawid Mosemna gog yit yerbekonj, re ton dide ton kima meni riga owoupa wekenonj. ⁴Si ridede na ton b'igaronj Godimna yinamet wa? Ɔ ridede na ton yina sana awinonj rina re gog yibnonj komkesa riga wanim owowim aji yina si riga wa nena ma owou? Ɔ kwa daka ridede na ton onggityam yina sana ninda ton kima menonam riga wa akainonj?” ⁵Dide ket Yesu ten amninonj da, “Rigamna B'iga re Ju riga waina wiram dide yir opmitena bibirim Yonggyam e.”

Yesu Ju Riga waina Wiram dide Yir Opmitena Bibirind
Kopa Riga Yisakendonj
(*Mat 12:9-14; Mak 3:1-6*)

⁶Ɔ kwa yipa Ju riga waina wiram dide yir opmitena bibirind Yesu Ju riga waina yir opmitenapu met wa b'igaronj, dide ket riga auyaeninonj. Aji omanda yipa yimjog yim b'ikiki kopa riga yibnonj. ⁷Aji Ju riga waina gog ouyaena riga dide Parisai rigap Tin wuswus yir ipka yiyeno da, “Ita yama dor meraina wiram dide yir opmitena bibirind Ton onggit kopa

rigand isakenj.” Nokim da idenat ton ril odarai Yesund kot wa oramitam. ⁸Si Yesu kea wumir awonj towaina nony menamena, aji Ton yomnonj onggit yim b'ikiki kopa rigand da, “Utnyite! I onyite de wip wa!” Ngirpu ton ket utnyitonj dide onyitonj. ⁹I Yesu ket ten amninonj da, “Kon mobe wen rarkisinin. Ringma, meraina wiram dide yir opmitena bibirind nanggamog gog e b'ogiljog tainy, gasa b'ogil omniam o minda negir omniam? Ringma, yirkokar okawam o minda yirkokar negir omniam?” ¹⁰I Ton ket komkesa riga yirik unjomkena eyeninonj, i ket kopa rigand yomnonj da, “Moina yim b'itnike!” Si ton ket tina yim b'itnikonj dide ket itemb tina yim kupkakupka b'isakendonj ija na it re yipa tab yim re dide. ¹¹Aji gog ouyaena riga dide Parisai riga ma sobijog na soro aukito, dide ket towalenggyam towalenggyam yit iglenena yiyeno nangga mile e ton b'ogla omniki Yesum pilind Tin negir omniam.

Yesu Twelp (12) Itmikitijog Riga Abagenjinonj

(*Mat 10:1-4; Mak 3:13-19*)

¹²I onggit win wingirind Yesu yikonj yipa dor wa yir opmitam, i adem de Ton siwiny pinpin Godim pilwa yir opmitenonj ngirpu yisparonj. ¹³I re bibir pitapita auka yikonj, Yesu Tina b'auyaena riga ara emokinonj, towa wingirind twelp (12) riga abagikinonj, i kwa ten nyi aekinonj da Tina itmikitijog riga. ¹⁴Simon ya mana re Yesu kwa yipa nyi yokawonj Petro, i ti yinggan Andrea, i Yakobo, i Yoan, i Pilip, i Batolomeo, ¹⁵i Matayo, i Toma, i Alpayomna b'iga Yakobo, i Simon yena re yogenayo Jalas Riga Bobo ke,^d ¹⁶i Yakobomna b'iga Yudas, i Yudas Iskariyot yet re Yesum tib iyoyam awonj.

Yesumna B'ogil Omna Yit dide So Erka Yit

(*Mat 4:23–5:12*)

¹⁷I Yesu ket Tina itmikitijog riga kima paga etaeta yikonj. I re ket Ton ket onyitonj wawa pipmetind, ma yipa kima Tina b'auyaena riga bobo na de wekenonj, i dide ma sobijog rigata rigata na wuwenonj komkesa Yuda eriya ke, i Yerusalem taun ke, i dide sipa gatabind Tiro ake Sidon eriya ke. ¹⁸I riga wuwenonj re Tina yit utkunda mana i dide towaina kopa ke isakenda mana. I kwa yepiya re negir kilkil wingawinga ke b'idgotnena yokateneno, Yesu kea ten Tina danda ke esakenjinonj. ¹⁹I dide kwa komkesa rigap re kea il ongka yiyeno Tin esopayam, mop nokip danda Ti pilkena opeka yikenonj dide ket kea komkesa esakenjinonj.

²⁰I Yesu Tina b'auyaena riga yirik unjomkeninonj, i yindonj da,

^d **6:15** Onggit winind Ju riga wingirind ninda rigap Roma gabmanind singi kesa yomneno dide Roma gabmani kima soro dide b'ipowa wuwenonj. Si rigap itemb riga bobo yogenayo da Kanana riga o Jelot Pati. Yir de Mat 10:4, Mak 3:18, Itai 1:13.

“Win b'ogil omni riga im ji yepim re win gasa kesand wekenyit,
mop nokip God ma pumb tungg re wa maemb ji.

21 Win b'ogil omni riga im ji yepim re yu win owoupand wekenyit,
mop nokip God opima wen ngor tamnikiny.

Win b'ogil omni riga im ji yepim re yu yii aenindam,
mop nokip win opima ngongong taenindam dem.

22 Win b'ogil omni riga im ji, ra Rigamna B'iga map rigap wen negir
yir ke yir tangranj, i kwa ra rigap wen kak teenanj, i wen tesadrenanj,
i dide waina nyi isaya teyenanj negir mos pila. 23 Si win b'ogla sam
kima ngolengole taenindam dide sam kima b'aturkenindam onggit
bibirind, mop nokip wa opima ukoi jog mira ebnainy de pumb tungg
wa. Mop nokip towaina b'uhwarip odede yipa ririrkip nya kena bageyam
ammenento.

24 Aji God ma sake win kima yepim re jogjog gasa kima wekenyit,
mop nokip win opima sam kima wimena akatenenindam onggit
gowukoyind.

25 God ma sake win kima yepim re yu win b'obogil ngor auka
wuwenyit,
mop nokip win opima owoupa tekenyit dem.

God ma sake win kima yepim re yu ngongong aenindam,
mop nokip win opima ukoi gar kopa kima yii taenindam.

26 God ma sake win kima,
ra komkesa rigap b'ogil yit nena tapurenanj wa gatab,
mop nokip towaina b'uhwar odede yipa ririr nya kena b'anyginena
bageyam ammenento.

Geja Riga Singi Iyenam

(Mat 5:38-48; 7:12a)

27 “Aji kon wen tamninyin yepim re ken nutkudunya, win b'ogla
singi teyenindam waina geja riga, i win b'ogla towa b'ogil mile
tamnikaenenindam yepim re wen singi kesa amnenanj. 28 I win b'ogla
ten b'ogil tamnenindam yepim re wen sake amnikanj, i win b'ogla yir
topmitenindam towa gatab yepim re wen negir yit ke amnenanj. 29 I ra
yipa rigat naska yipa tab anakakind mitpokis, si man b'ogla onggit rigam
ijgenaet kwa yipa tab ipokitam. I ra yipa rigat moina bau ke kobirgim
okas, si man goro tin iswanget moina wingir ke kobirgim okatam. 30 I
man b'ogla tagoninyit komkesa riga wa yepiya ra mitgekisi, i yet ra
moina gasa takasiny, man goro omnim da kor gasa nitendainyit. 31 I
win ija na riga wa gasa tamnikaenindam odede ringmim re win singi
aenindam nangga im ra rigap wa tamnikauranj. 32 I ra win riga singi
teyenindam yepim re wen singi eyenanj, si win nangga b'ogil isnawa e
okasya onggit waina singi b'iyena mile ke? Makwa ita, mop nokip negir

mile rigap toda kwa opima riga singi eyenanj yepim re ten singi eyenanj. ³³Ɔ kwa ra win riga wa b'ogil wiko tamnikaenenindam yepim re wa b'ogil wiko amnikenauranj, si ringma, win ririr e b'ogil isnawa okasya onggit waina b'ogil wiko omnika mile ke? Ma ririr e, negir mile rigap toda kwa opima odede mile amnikenenanj. ³⁴Ɔ ra win riga wa wulkip tagonindam ya pilkaim ra win singi da ton kwa mira wa tetendauranj, si ringma, win ririr e b'ogil isnawa okasya onggit waina mile ke? Ma ririr e, negir mile rigap toda kwa opima ninda negir mile riga wa wulkip agonenauranj, nokim da idenat toda kwa mira takatenanj onggit ogoni wulkip ririrind. ³⁵Aji win waina geja riga singi teyenindam, i towa b'ogil wiko tamnikaenenindam, i kwa towa wulkip tagonenenindam aji goro odede nony menamena kima da, 'Ton opima amaya mira sowa nitendauranj.' Ra win odede mile tamnikenindam, waina mira ra ukoi jog e tainy dem, i win kwa Pumbjog Godimna b'iga im taukindam. Mop nokip Ton re kear b'amnena Riga e towanim yepim re maka Tin siteket yit yomnikenenyi dide kwa yepim re negir jog mile amnikenenanj. ³⁶Si win b'ogla kear b'amnena riga taukindam odede yipa wip it re kear b'amnena Riga, wa B'u re dide.

Goro B'isagika Mile Tamnikinam

(Mat 7:1-5)

³⁷Ɔ win goro riga wa pilind b'isagika mile tamnikina, si wida makwa ita b'isagika okatenya dem. I win goro riga negir ma b'isagikand taramitenina, si wida makwa ita negir ma b'isagika okatenya dem. I win b'ogla ninda riga wa negir mile awir tamnikaenindam rinsim re wa amnikauranj, si God daka opima waina negir mile awir tamnikaeniny. ³⁸Win b'ogla tagonindam, si God kwa opima wa tagoniny. Mop nokip God opima wanim mira itendam odede yipa wip tondon wa takatenainy rija na re win riga wa tondon akatenautondam. Si Ton ma onggityam tondon ririr nena im wa tagoniny, aji Ton opima onggityam tondon ririrind yindangir tamnikiny, i temlandeniny, i tegiyatneniny, i dide taikinsiny tu isangendam. Seg Ton ket teyeniny wa pilwa dide wa yim kumbind taramkiny." ³⁹Ɔ Yesu kwa yipa tendam yit towa usekawonj da, "Ma, ririr e yirdidi rigat yirdidi rigand wip yii menonim? Si ringma, ma osiya ton nimognimog yipand sap totenjya de kip bora wa? ⁴⁰Ɔ b'auyaena b'iga re ma ita tina ouyaena rigand igwanjis pumb wa. Aji ra ton komkesa tina ouyaena kupkakupka takasiny, ton ija e ket wumir okas tina ouyaena riga re dide. ⁴¹Nangga pae man yir pipla yir yiyenyit moina rigamna yirkipind, aji kwa nangga pae man maka b'obogil wumir yokatenyit wulpas gatab moinajog yirkipind? ⁴²Rada man ma ita molenggyam itemb wulpas yir ongong yiyenyit rintu re yibim moinajog yirkipind, si ringma, ririr e man mor rigand odede omnyit da, 'Kor

riga! Mabe kon yir pipla mewaikitawin moina yirkip ke'? Si man re gim ke b'ogil aji ngor wa negir mile riga et. Si man naska moina yirkip ke wulpas yewaikite! I ingkaemb ket man onggityam yir pipla pitakipind yir onget rinte re yibim mor rigamna yirkipind, i ket man itemb yir pipla ewaikitaet mor rigamna yirkip ke.

Wul dide Tina Kip gatab Tendam Yit

(Mat 7:16-20; 12:33-35)

43 "I b'ogil wul nanggit ma opima negir kip tejagikiny, i toda kwa negir wul nanggit ma opima b'ogil kip tejagikiny. 44 Yipa yipa wul nangg ongwatam re towainajog ijagiki kip kaim. I rigap re ma wanja nangg kaim eakikenanj pig kip, i kwa ma wika nangg kaim eakikenenanj greip kip. 45 I b'ogil rigat b'ogiljog gasa im angapeneniny tina garind. I ingkaemb ton ket b'ogil mile pita wa apendeniny. I negir rigat daka tina ongapi negir gasam pilke negir mile im pita wa apendeniny. Mop nokip rigat tina tugim ke yit apureniny re tina garind yindangir auki nony menamena kaim.

Nimog Met Oranga Riga

(Mat 7:24-27)

46 "I win ita nyi nuwatanenya da 'Yonggyam, Yonggyam,' aji nangga paim win maka amnikenindam nangga im re Kon nindenenyin omnikam? 47 I Kon wanim tendam yit ke tauyaenyin onggit riga gatab yet ra Kor pilwa ik i Koina yitkak tutkundeniny dide omnikand b'itngaeny onggit yitkak ririrind. 48 Si ton re odede met oranga riga e yete re ngortod wa kip euka eyeniny rorte emkam, i danda kima rorte itot eyeniny, i dide met oranga yiyeny onggit danda rorte kumbind. Si ra ket ukoi ngiwir ik dide ngiwirit met uwongneny, aji makwa ita immneny, mop nokip itemb re b'obogil orangi met e. 49 Aji yet re Koina yitkak utkundeniny aji maka ra b'itngaeny onggit yitkak ririrind, ton re odede met oranga riga e yete re bab tumind kip euka eyeniny rorte emkam, i danda kesa rorte itot eyeniny, i dide ket onggit kumbind met oranga yiyeny. Si ra ngiwirit met uwongneny, odenja ket tosmulis dide ket ma sobijog e met tonygik."

Wan Andred (100) Roma Geja Riga Mopyamimna Gar ke Utkunda

(Mat 8:5-13)

7 1 I re Yesu Tina komkesa opurena undwasinonj utkunda riga wa pilwa, onggit kak ke Ton Kaparnaum taun wa yikonj. 2 I ademb de yipa wan andred (100) Roma geja riga mopyam yibnonj. I yipa tina nony ijai wiko riga re kopa na yibnonj momta uj. 3 Si re ket ton Yesum gatab yidir yit utkundonj, ton ket ninda Ju riga waina elda riga etmikisinonj Yesum pilwa odede erkena kima da, "Ringma ngai Man metket, i koina wiko riga kopa ke isakenjit." 4-5 I re ket

ton wuwonj Yesum pilwa, ton kea danda kima Tin yigekito da, “Ton meraina Ju yitam riga opima singi eyeniny, dide tonit kwa meranim yir opmitenapu met yoramongj. Si onggit paemb ton re iminjog riga e yena ra Man yim okaet odede isakenda mile ke.”⁶ Si Yesu ket ton kima yikonj onggit geja riga mopyamimna met wa. Si Yesu re ma pin na awonj tina met ke, i onggit geja riga mopyamit daka ninda ti rigawar etmikisinonj Ti pilwa, omnam da, “Yonggyam! Goro nony bebig tawim menonim kor met wa, nokip kon ma odede ririrkipjog riga en Men yit omnam da, 'Man b'itgaret koina met wingir wa!’⁷ Si onggit paemb kon kolenggyam b'angwasin da kon re ma ririrjog riga en menonim mor pilwa. Aji man yit nena yopulite, i idenat koina wiko riga b'itisakenj. ⁸Mop nokip koda re yipa juwai kima riga wira nate nibnyin dide kwa daka kor wirand opima geja riga nibnainy. Si ra kon yipa geja rigand ingaen da ‘Meke,’ si ton ita yik, i ra kon kwa yipa rigand ingaen da ‘Metkim,’ si ton ita ik. I kwa ra kon yipa koina wiko rigand ingaen da ‘Man itemb gasa yomnike,’ si ton ita omnik.”⁹ I re Yesu onggityam yit utkundonj, Ton kid kesa awonj ti gatab. I ket wip engendonj ukoi riga bobo wa pilwa yepiya re Tin yimta yundoko dide ket amninonj da, “Kon wen tamninyin da Kon maike ya pilnat odede iminjog gar ke utkunda riga yodarond Israel riga wa wingirind.”¹⁰ I re onggit geja riga mopyamimna itmikiti riga itekto de met wa, ton ket onggit kopa kima wiko rigand yodaro re kea kwa tina pipmet wa itendonj.

Yesu Yipa Mik Konggamna B'iga Uj ke Yutnyitonj

¹¹I onggit kak ke re Yesu yikonj de yipa taun wa ogenaya da Nain, si Tina b'auyaena riga dide ukoi riga bobo re kea Ton kima yipand wuwonj. ¹²I re Ton ket onggit taun mora wuswus wa awonj, rigap yipa uj b'iga titind iyo i taun mora ke yopendo. Itemb uj b'iga re ti mogim lesmita b'iga na, i ti mog re mik kongga na. I onggit taun ke ukoi riga bobo kea dikind ton kima ikonj. ¹³I re Yonggyam Yesu tin yir wongonj, Ton ma sobijog na tin kear womnonj. I ket tin womnonj da, “Goro yii tainim!” ¹⁴Seg Ton ket wus wa yikonj, i ket itemb uj riga iyenapu tit yesopayonj, si tit iyena rigap owinkito ngirpu Ton uj b'igand yomnonj da, “Kewar b'iga! Kon men motinyin da Utnyite!” ¹⁵I uj b'iga ket omitonj, dide ket yit opurena b'atomonj. Seg Yesu ket b'iga ti mogim wokawonj. ¹⁶Si komkesa rigap moga na yokato, i Godind yesoureno odede yit kima da, “Ukoi bageyam kea pita ainy mera wingirind.” Dide kwa endento da, “God kea Tina riga yir engendam tatupiny.” ¹⁷I itemb Yesum gatab yidir yit re kea warabag auka yikenonj kupka Yuda eriya wingirind dide komkesa wuswus eriya nata.

Baptiso Yoan gatab Yit (Mat 11:2-19)

¹⁸Si re Yoanimna b'auyaena rigap Yoanind wumir yomno komkesa onggityam mile gatab, Yoan ket nimog riga ara emokonj tina b'auyaena

riga wingirind. ¹⁹I ton ket ten etmikitonj Yonggyam Yesum pilwa odede igekitam da, “Yesu! Ma man Kerisotet yet ra Godim pilke ik? O minda sin yipa b'enga riga na yir ungauku?” ²⁰Si onggit nimog rigap ekonda Yesum pilwa, i ket Tin yomnonda da, “Baptiso Yoante sin nitmikis mor pilwa men igekitam da, ‘Yesu! Ma man Kerisotet yet ra Godim pilke ik? O minda sin yipa b'enga riga na yir ungauku?’” ²¹I onggit winind re ton Yesund yit yomnonda, odedend Ton ket jogjog riga esakenjinonj b'engabenga wip kopa ke, i jogjog negir wingawinga eaukeninonj negir wingawinga ke okati riga wa pilke, i dide Ton ket yirdidi riga yir epangkinonj. ²²I Yesu ket ten mira amninonj da, “Win eka Yoanim pilwa! I tin wumir omninya nangga na re win yir anginya dide utkunderya, odede opi re da yirdidi riga yir epangkanj, i gomgom riga menon akatenanj, i leprosi kopa riga kilkip kesa aukanj, i yipya dum dum riga utkundernanj, i uj riga utnikanj, i dide God ma b'ogil yirkokar bage yit pitapita auka yikeny gasa kesa riga wa pilwa. ²³Si God ma b'ogil ita ton kima yet ra onggityam Koina mile gatab yit tutkunj i ingkaemb ket ton maka sap totenj gar ke utkunda kesa mile wa.” ²⁴I re Yoanimna bageyam rigap yiwatonda, Yesu ket Yoanim gatab yit b'atomonj riga bobo wa pilwa da, “Win nanggamog gasa na yir ongongim yoponda wul kesa tungg wa? Rika rib ma itegreni bus na? ²⁵I rada maka, si win nanggamog gasa na yir ongongim yoponda? Rika otomanti b'ogil kobirgim b'ikoki riga na? Nayi, ma opima de. Aji odede b'ogil ngindngind kobirgim b'ikoki riga dide ukoi wulkip kima b'ogil gasa ingaena riga wekeny re king waina met nasim. ²⁶I rada maka, si win nanggamog gasa na yir ongongim yoponda? Rika bageyam na? Owi iminjog e, Kon wen tamninyin da ton re ukoi jog bageyam e, ma odede e it re naskanyam bageyam re dide. ²⁷Si ton re intemb ji riga ya gatab e odede yina peband iriki yibim da,
‘Yir, ita Koina bageyam itmikisin dem Mor naska nya wa,
yet ra Mor wip ke menon okas i Mornim menonim nya
motngonjenau dem.’

²⁸I Kon wen tamninyin, makwa ita yipa ukoi jog nyi riga odede Yoan re dide komkesa riga wingirind yena re konggap ukka eyenanj. Aji yete re sobijog jog nyi riga yibim God ma pumb tunggind, ton re ukoi jog nyi riga e aji Yoan re ma ukoi nyi riga e.” ²⁹I re rigap Tina yit utkundo, komkesa riga dide teks imdayam rigap baptiso yokateno Yoanim pilke, dide ket endento da God re negir kesa dimdimjog e. ³⁰Aji Parisai riga dide gog yit wumir jog riga maka Yoanim pilke baptiso yokateno, si ingkenaemb ton towalenggyam Godimna isamki singi b'isayo.

³¹I Yesu kwa yindenonj da, “Si nanggamog gasa kae Kon yipa ririrkip tamninyin riga yepim re yu wekeny onggit gowukoyind? Si ton nanggamog gasa kima im yipa ririr? ³²Ton re yipa ririrkip riga im odede ringmim ra b'iga sobijog omniki tekeny nimog bobond tungg aband, i

yipa bobo b'igawarip kwa yipa bobo b'igawar yit tugwatananj odede opurena kima da,

'Sin pop wa pate ara epayau, aji win makwa omarkindam.

I sin pop wa nony b'uowou kima ger atangau, aji win makwa yii wuwenyit.'

³³Mop nokip re Baptiso Yoan ikonj i ton maka owoujog aweneninonj ninda riga re dide, i maka ik anaikeneninonj, si win ti gatab endenenindam da, 'Ton re negir wingawinga ke okati riga e.' ³⁴I re Rigamna B'iga ikonj, i owou aweneninonj dide ik anaikeneninonj, si win endenenindam da, 'Yir, Ton re oba owou dide oba ik onaika riga e, i dide Ton re teks imdayam dide negir mileyam towa riga e.' ³⁵Aji komkesa riga yena re God Tina multekip ke angenkeneniny, tontemb iminjogim yomnenyit da Godimna multekip re negir kesa dimdimjog e."

Yipa Negir Mileyam Konggamna B'ogil Mile

³⁶I Parisai riga wingirind yipa rigat Yesund yigekitonj Ton kima diyam awowim. Si Yesu ket onggit Parisai riga ma met wa yikonj i omitonj owoupund. ³⁷I omanda onggit taunind yipa negir mileyam kongga wibnonj. Si re ton wumir awonj da Yesu ama diyam ainy onggit Parisai riga ma metind, ton kea ngirangngirang gaya yionj yipa otomanti alabasta gimo botolind. ³⁸Seg ton ket Yesum kak ke onyitonj Tina pis wusind, dide yii windonj ngirpu ket yirekip ke Tina pispam esankonj, i ket tinajog mopngii ke esurenonj. Seg ton ket Tina pispam amongnenonj, i dide ket ngirangngirang gaya ke esnikonj. ³⁹Aji re onggit Parisai rigat yet re Yesund yingaukonj yir yongonj onggityam mile, ton ti nony mana yindonj da, "Rada itemb Riga bageyam e, Ton kako wumir ainy da yeto ton, dide ridede konggato Tin yesopai, i itomb re negir mileyam kongga o." ⁴⁰Si Yesu tin mira yomnonj da, "Simon! Kor ita yipa yit mor usekam." I todaka yindonj da, "Ouyaena Riga! Nusekae!" ⁴¹Si Yesu yindonj da, "Rada ke yipa rigat nimog riga wa wulkip agoninonj mira itendam, yipa rigam pilwa re ukoi wulkip tri tausin (3,000) Kina na, i daka kwa yipa rigam pilwa re ma ukoi wulkip na tri andred (300) Kina na," ⁴²aji ton onggit nimog rigaina abitoro wulkip awir amnawonj ongandam, mop nokip ton ma ririr na awonda onggityam abitoro ongandam. Si ringma, onggit nimog riga wingirind yete onggit wulkip yonggyamind ukoi kana singi yiyeny?" ⁴³Simon mira yomnonj da, "Kon ija e nony aeny da inte riga yamana re ukoi jog abitoro wulkip awir yomnawonj ongandam." Si Yesu ket tin yomnonj da, "Si man re kea dimdim na mindenyit." ⁴⁴I Ton ket onggit konggam pilwa wip itaingitonj, i ket Simonim pilwa yindonj

^e 7:41 Grik peband da "paib andred (500) Denari" dide "pipti (50) Denari". I yipa Denari re yipa riga ma yipa bibir wiko mira na.

da, “Man ita ji onggit konggand yir wonget? Re Kon moina met wingir wa b'igaren, man maka Kor nyi nokaet pispam b'isekam. Aji ton onggit konggat Koina pispamind yirekip ke nisanik, dide ton ket tinajog mopngii ke nusureny. ⁴⁵Man makwa ngai nomongnenyit simesime omnam, aji re Kon moina met wa b'igaren, idenata ton itomb b'atom Koina pispam omongnena, i ton makaya seg ainy. ⁴⁶Man maka olib gaya ke Koina mop yeauket, aji ton itomb kea ngirangngirang gaya ke Koina pispam eawik. ⁴⁷Si onggit paemb Kon men wumir motinyin da God kea tina jogjog negir mile awir womnainy, mop nokip ton kea ukoi kana singi niyeny. Aji ya mana ra God sobijog kana negir mile awir omnainy, ton sobijog kana e Ken singi niyeny.” ⁴⁸I Yesu tin womnonj da, “Moina negir mile kemb awir auranj.” ⁴⁹I riga yepiya re Ton kima omnicto diyampund, endento towa wingirind da, “Yete ji onggityam riga, ite re ton kwa negir mile awir amnikiny?” ⁵⁰I Yesu ket onggit konggand womnonj da, “Moina gar ke utkundat kea mor yirkokar mokau, si man ngimbland meke!”

Yesu kima Meni Kongga

8 ¹Onggit kak ke re Yesu yikenonj taun nata dide tungg nata, Ton God ma pumb tungg gatab God ma b'ogil yirkokar bage yit pitapita amneninonj. I kwa twelp (12) itmikitijog riga kea toda Ton kima yipand wuwenonj. ²I dide kwa ninda kongga yamana re Yesu negir wingawinga eaukenainonj, dide yena re kopa ke esakenjinonj, opi re Mariya ogenaya da Magdala tunggam kongga ya pilkena re seben (7) negir wingawinga opekto, ³i Kujamna kongga Yoanna yet re Erodinma wulkip yir ipka riga yibnonj, i Susanna, i dide ninda kongga, opimemb komkesa kongga toda kwa kea Yesu kima yipand wuwenonj, dide ket towainajog gasa kena Yesu dide itmikitijog riga yim akaenento.

Tuny Igmarka Rigam gatab Tendam Yit

(*Mat 13:1-23; Mak 4:1-20*)

⁴I re komkesa taun ke riga wuwenonj Yesum pilwa, si kea ukoi riga bobo yipand b'eomto, Yesu ket yipa tendam yit usekawonj. ⁵“Yipa wala riga tina tuny igmarkam yikonj sopapu wa. I re ton egmarkinonj, ninda tuny isokto nyawind, si rigap kea onggityam igmarki tuny ipmindena eyento towa menamena wingirind dide ket pumbind ngenap auto. ⁶I ninda tuny isokto gimo gowind, i pok ikkito, aji nangg yarimyarim aukito, nokip itemb gou re ma ngimblakak na. ⁷I ninda tuny isokto wanja met wingirind, i wanja kima yipand owinkito, i ket wanjap opimemb nangg ekanginto. ⁸I kwa ninda tuny isokto b'ogil sal gowind, i pok ikkito ngirpu ingkek ket kip ejagikto yipa ke wan andred (100) kip.” I onggit yit seg ke, Yesu b'okta ara yikenonj da, “Yete re man wingawinga ke yipya kima, man utkunde!”

⁹Ɔ Tina b'auyaena rigap Tin yerkito da, “Nangga gatab tendam yit e ji?”
¹⁰Si Ton mira amninonj da, “God kea ji Tina pumb tungg gatab wigawiga yit wumir akainonj wanim nony aukam, aji ninda riga wanim re tendam yit nena kaim amneninyin, nokim da idenat bageyamimna yit ririrkip tainy, ode de yit da,

‘Ton yir ongong reyeninem, aji goro rangwataninem,
 i kwa ton rutkundeninem, aji goro nony raukinem.’

¹¹Si ija emb ji onggityam tendam yit. Tuny re God ma yitkak e. ¹²Ɔ opi re ji tuny nyawind isokto re insimemb ji riga yepim re God ma yitkak utkundenanj, i onggit kak ke daka Satana ik towa pilwa, dide ewaikuriny God ma yitkak towaina gar ke, nokim da idenat ton maka God ma yitkak gar ke utkunda ke okatenyi dide maka yirkokar okatenyi. ¹³Ɔ opi re ji gimo gowind isokto re insimemb ji riga yepim re God ma bage yit utkundenyi dide ket ton itemb yitkak sam kima yokatenyi, aji towa ma opima ap. Si onggit paemb ton sobijog ganggand God ma itemb yitkak gar ke utkunda ke yokatenyi, aji daka ra sobijog ganggand b'atonkena win ik, ton ket God ma itemb yitkak irari. ¹⁴Ɔ opi re ji wanja metind isokto re insimemb ji riga yepim re God ma yitkak utkundenanj, aji God ma onggityam yitkak kima wimena wingirind re ninda gar bebıg dide jogjog gasa singi i dide gowukoi sam milepim ten wıp awarkenanj, si tonsimemb ket ten ekangindenanj. Si onggit paimemb ton maka b'obogil inika wuweny kip ijagikam. ¹⁵Ɔ kwa opi re ji b'ogil sal gowind isokto re insimemb ji riga yepim re dimdimjog dide b'ogil gar ke onggityam God ma yitkak utkundenanj, dide kwa danda kima yitkak amorkenenanj musik wimena kima. Si onggit paimemb ton kip ejagikenenanj.

Lampa Uwonyitam Ororind

(Mak 4:21-25)

¹⁶“Makwa ita yipa rigat lampa so ominy dar ke ikangindam o kasa wirand oramitam. Aji ton oror nate uwonyis, nokim da idenat rigap ngaya yir ongi pitand, ra ton wingir wa b'itgarkanj. ¹⁷Mop nokip God ma komkesa nangga mile im egurki wekeny re onggit ngayand pitapita omnena mim, i dide nangga im komkesa God ma mile wumir kesa wekeny re pitapita omnena mim onggit ngayand. ¹⁸Si onggit paemb win b'ogla nonyik b'obogil b'amdeninam onggit yitkakim pilind rija im re yu win utkundenindam Kor pilke! Mop nokip yet ra Koina onggityam yitkak wumir okateny, God opima b'usaya kwa yitkak gatab ti wumir ogoniny. Aji yet ra maka okateny, God ita awir omnau nangga mog wumir rinte re ton nony ke yindenya da ton ita yowam.”

Yesu ma Mog dide Yingganwar

(Mat 12:46-50; Mak 3:31-35)

¹⁹Yesu ma mog dide yingganwar wuwonj Ti pilwa, aji towanim ma ririr na Ton kima yıpand awowim riga bobo map. ²⁰Si yipa rigat Tin

wumir yomnonj da, “Mor mog dide Mor yingganwar opima bau wa owinki wekeny men yir ongongim.”²¹ I Yesu riga esmonggainonj da, “Kor mog dide Kor yingganwar re tonpimemb ji yepim re God ma yitkak utkundenanj dide b'ingawand aramitenanj.”

Yesu Ukoi Rib Mumakesa Yomnonj

(Mat 8:23-27; Mak 4:35-41)

²²I yipa bibirind Yesu Tina b'auyaena riga kima gigand angitonj, i ket ten amninonj da, “Men wuyin sipa nata de yipa tab wa.” I ton ket giga nyi wa yururkito, i ket menon yokato. ²³I re ton gigand wuwonj, Yesu kea yit wegong. I onggit winind ukoi depu rib ikonj de onggit sipand, si giga re kea nyi b'angjika yikenonj, i ton ma sobijog bebig nat aukito. ²⁴Si ket Tina b'auyaena rigap Ti pilwa wuwonj dide ket yit opmura yiyeno odede yit kima da, “Ukoyam, Ukoyam! Yim nokaine! Men momta im negir taindam.” I Yesu ket utnyitonj dide itemb depu rib dide ukoi wuro samany eyowonj, ngirpu sipa mumakesajog awonj. ²⁵Seg Yesu ket ten amninonj da, “Rote waina gar ke utkunda?” Si ton ket moga na aukito, i ket towalenggyam towalenggyam kid kesa kima b'igekena wuwenonj da, “Si ridede riga e ji? Re Ton engau rib ake sipa, kea Tin yit yutkunja.”

Negir Wingawinga ma Okati Riga B'ogil Omna Gerasenind

(Mat 8:28-34; Mak 5:1-20)

²⁶I ton ket giga nya ijendo Gerasen eriya wa de Galili sipa yipa tab wa. ²⁷I re Yesu giga ke gil wa opendonj, yipa onggit taun ke rigat yet re negir wingawinga ma okati yibnonj, ton ket Yesund wipwip yomnonj. Onggit rigat b'ila ke maka kobirgim b'ikokenenonj, i dide metind yibnenenonj. Aji ton yibnenenonj re ninda gimo yiund eski gopmet wingir nat. ²⁸I re ton Yesund yir yongonj, ton ukoi ara kima irere awonj dide sap otendonj Ti wipind, ngirpu ton ket ukoi ara kima obailitonj da, “Yesu, pumbjog Godimna b'iga! Nangga e man singi yomnyit kor pilind? Kon metirkisin, goro ken negir notinim!” ²⁹Mop nokip Yesu kea negir kilkil wingawingand yingawonj opendam onggit rigam pilke. Negir wingawingat re kea naskand tin nenegir kana emorka yiyenenonj, si rigap tin b'engabenga kai ke dide sein kai ke yim dide pis ijebika yiyeneno, dide ket tin yir ipka yiyeneno yipa pipmetind. Aji ton kea kai epkeneninonj i sein kai anygikeneninonj, i negir wingawingat tin wip yiyenenonj dea ta wul kesa tungg nata. ³⁰I Yesu ket tin yigekitonj da, “Yete mor nyi?” Si jogjog negir wingawingap kea b'igarkito ti pilind, si onggit penaemb ton ket mira yomnonj da, “Ligiyonte.”^f ³¹I ton ket Yesund yigekenayo da, “Goro sin nitngainim menonim de ngortod wa

^f 8:30 Ligiyon re yipa ukoi Roma geja riga bobo nyi na, i ama rika siks tausin (6,000) geja riga na.

kuninkunin euki kip wa rokasim re negir wingawinga wekeny negir ma b'isagika okatam.”

³²Onggit winind kea jogjog ongeni b'om bobo wekenonj dor tabind. I onggit negir wingawingap ket Yesund yigekito da, “Sin ningaine onggit b'om wa pilwa b'igarkam.” Ngirpu Yesu ket ten engainonj b'igaram. ³³Seg negir wingawingap ket onggit rigam pilke opekto dide ket b'om wa pilwa b'igarkito. I opimemb b'om bobo b'ikto sipa yuru kumb wa, i ket sipa wa unykurto, ngirpu ket komkesa uj aukito. ³⁴I re onggit b'om ongena rigap yir yongo onggityam mile auki, ton ket b'ikento dide yidir yit yiyeno onggit taunind dide ninda tungg nata. ³⁵Si riga re kea wuwenonj onggityam auki mile yir ongongim. I re ton Yesum pilwa wuwenonj, ton kea yodareno itemb riga ya pilkena re negir wingawinga opekto. Aji ton kobirgim b'ikoki dide b'ogil nony menamena okateni kima na omi yibnonj Yesum wusind. Si ton ket moga na aukito. ³⁶I yepiya re towa yir ke yir yongo ridede na Yesu onggit negir wingawinga ma okati rigam yirkokar yokawonj, ton ket riga wumir omnena eyento. ³⁷Si re komkesa riga bobo yepiya re Gerasen eriya ke tuwonj, utkundeno towaina yit, ton kea Yesund danda kima yigekeno towa pilke ewakitam, mop nokip ton ukoi moga na aukito. Si ket Yesu giga wa angitonj dide ket yiwatonj. ³⁸I onggit winind re Yesu iwatam awonj, onggit rigat ya pilkena re negir wingawinga opekto, Yesund yigekitonj Ton kima menonim. Aji Yesu tin yitmikitonj odede yit kima da, ³⁹“Mor met wa itende, dide tesipkenainyit rija na re God mor ukoi mile momnikau.” Seg ton ket yiwatonj dide komkesa taunind pitapita amnenainonj rija na re Yesu ti ukoi mile yomnikawonj.

Yairomna Uj Ngimngai Yilo Okawam dide Kopa Kongga Isakendam
(*Mat 9:18-26; Mak 5:21-43*)

⁴⁰I re Yesu itendonj, riga bobop kea Tin simesime yomno, nokip komkesa riga re kea Ti yir ungawand wekenonj. ⁴¹I onggit winind yipa riga nyi da Yairo yet re Ju riga waina yir opmitenapu met mopyam yir ipka riga na yibnonj, ton ikonj Yesum pilwa. I ton Yesum wip ke kumsos b'amka kima b'amairenonj dide Tin yigekitonj menonim tina met wa. ⁴²Mop nokip ti yipaina nena na ngimngai b'iga yibnawonj ama rika twelp (12) kemag kima na dide ket momta uj okata nat wibnonj.

Si re Yesu Yairom met wa yiwatonj, riga bobop kea Tin iwatinidena yiyo pipmet b'isatena kima. ⁴³I kea dikind yipa kongga wikonj towa wingirind yet re kus opekenenonj twelp (12) kemag kima. [Si ton kea wikenenonj dokta yir ongongim dide tina kupka yirkokar esomnena yiyenenonj.] Aji makwa yet Tin wisakendonj. ⁴⁴Si itomb kongga Yesum kak ke wikonj dide ket Tina kobirgim petir yesopayonj. Seg ket odenja ket tina kus opekapu yira kesa awonj. ⁴⁵I Yesu riga arkisinonj da, “Yet ken nesopai?” I

re komkesa riga b'aento, Petro Tin yomnonj da, “Ukoyam! Riga bobopim men iwatinde na miyenyi dide mor wusind pipmet b'isatena wuweny.”
 46 Aji Yesu yindonj da, “Yipat ke ken nesopai, mop nokip kon ke b'ipinsin da danda re kea kor pilke ewaikis.” 47 Si ket itomb kongga b'angwatoni da, “Kon ma ririr e egisin pita omni kesa.” I ton ket kaktiti kima Yesum wip wa tikonj dide kumsos b'amkonj ngirpu ket komkesa riga wa wipind pitapita yommenainonj nangga pena Tin yesopayonj dide rija na re odenja Ton tin wisakendonj. 48 Seg Yesu tin womnonj da, “Ngimngai b'iga! Moina gar ke utkundate men misakenj. Meke ngimbla kima!”

49 I re Yesu onggit yit opurenand yibnonj, odedend ket yipa riga ikonj Yairom met ke, i Yairond yomnonj da, “Moina ngimngai b'iga kea uj ainy. Si goro man ouyaena rigand jabakipind il ongket menonim! Goro Tin isakaulisit!” 50 Aji re Yesu onggityam yit utkondonj, Ton Yairond yomnonj da, “Goro moga tawim! Gar ke utkunda nena yoramite! Ita mor b'iga b'itisakenj dor.” 51 Aji re ton tina met wa opekto, Yesu maka engainonj ninda riga b'igaram wingir wa Ton kima, aji ina Petro i Yoan i Yakobo i dide onggit b'igamna b'u ake mog. 52 I onggit winind, komkesa riga yii b'irinena nat wekenonj dide kom b'amoratena kima b'iaena wuwenonj ti gatab, aji Yesu ket ten amninonj da, “Goro yii taininam! Mop nokip itomb ngimngai b'iga re ma uj o, aji yit o weg.” 53 Aji rigap Yesund ngong na yengeno, nokip ton yir wongo re uj na. 54 I re ton b'igarto rikind re uj b'iga wibnonj, Yesu tin yimind wokatonj dide tin womnonj da, “B'iga! Utinyite!” 55 Seg ita ket tina wingawinga itendonj, i ton ket odenja utnyitonj. I Yesu engainonj ti owou okawam. 56 Si ti b'u ake ti mog re winga kesa na awonda. Aji Yesu danda kima b'ingawa yit yoramitonj da, “Goro yipat onggityam gatab yit pita omnikim!”

Twelp (12) Itmikitiyog Riga Itmikitam

(Mat 10:5-15; Mak 6:7-13)

9 1 I Yesu ket Tina Twelp (12) b'auyaena riga ara emokinonj b'eomam, i Ton ket ukoi danda dide juwai agoninonj komkesa negir wingawinga eaukenam dide komkesa kopa ke isagikam. 2 I Ton ket ten etmikisinonj God ma pumb tungg gatab bage yit pitapita omnenam dide kopa riga isagikam. 3 I re Ton itmikitam amninonj, Ton ten engainonj da, “Goro kwa nangga na eyinam wa menonim! Goro kutip kima, goro ga kima, goro owou kima, goro wulkip kima, i goro kobirgim talomam kima! 4 Ra win tuwenyit tungg yipayipa nata, i dide ra yipayipa met nata obai tamnenanj waina menon tungg wingirind, omanda tekenyit, ngirpu ra win tungg terarenindam dem. 5 I riga yepiya ra maka wen simesime tamnenanj dem, si win idenatemb ket onggit met ke o onggit taun ke iwasya. I onggit iwata winind win b'ogla waina pispamind sungar tedbenenindam towanim nony aukam da towaina negir mile b'isagikam win ita ik dem.” 6 Yit seg ke ton ket yiwato dide tungg nata wuwenonj. I rikind re ton

wuwenonj komkesa winind, ton kea God ma b'ogil yirkokar bage yit pitapita omnena yiyeno dide kopa ke riga isagika eyento.

Erodimna Nonsipsip Yesum gatab

(Mat 14:1-12; Mak 6:14-19)

⁷I re Galili eriya king Erod utkundenonj komkesa onggityam auki mile gatab, ton ma sobijog na nonsipsip aukonj. Mop nokip ninda rigap opurena eyento da baptiso Yoan kea uj ke utnyitonj, ⁸i kwa ninda rigap da bageyam Eliya kea pitapita awonj, i dide kwa ninda rigap da yipa b'ilap bageyam e utnyitonj. ⁹Aji Erod yindonj da, “Kon ke Yoanind mop yipendond, aji yetemb ji riga ya gatab im re kon onggityam yit utkudenyin?” Si ton nya oraka eyeninonj Yesund yir ongongim.

Yesu Paib Tausin (5,000) Riga Angeninonj

(Mat 14:13-21; Mak 6:30-44; Yoan 6:1-14)

¹⁰I re itmikitijog riga itekto, ton ket Yesund wumir yomneno komkesa gasa rina re ton amnikto.

Si Yesu ket ten eyinonj tentawar wa Ton kima de yipa taun wa ogenaya da Betsaida. ¹¹Aji riga bobop kea wumir yokato rikind re Yesu yibnonj, ton kea Tin oraka yiyo. Seg Ton ten simesime amneninonj dide ten yit atainonj God ma pumb tungg gatab, dide kopa riga esakenjinonj yena re Ton singi amneninonj isagikam. ¹²I re ket bibir win awir auka yikonj, Twelp (12) itmikitijog riga tuwonj Ti pilwa, i yomno da, “Riga bobo etmikenine, nokim da idenat ton wuswus tungg nata dide wungawungapu tungg nata wungapu pipmet dide owou oraka teyenanj! Nokip men re wul kesa tungg nasim wekenyin.” ¹³I Yesu ket esmonggainonj da, “Win towa owou agoninam!” Aji todaka ket yomno da, “Sowa insima paib (5) sana nganja dide nimog kabum nena wekeny. Si sin maka ra wuyin dide onggit komkesa riga ririrind owou temjindam, sin ma ririr im towa ogonam.” ¹⁴Ton odede penaemb onggityam yit apurento, nokip demb de ama rika paib tausin (5,000) rigajog na wekenonj. Aji Ton Tina b'auyaena riga amninonj da, “Komkesa riga b'ogla ama rika pipti (50) bobond omnika eyenina diyam awowim!” ¹⁵Seg ton ket Yesu ma onggit yit ririrind komkesa riga gowind omnikam amnento. ¹⁶I ket Yesu paib (5) sana nganja dide nimog kabum akasinonj, i pumb wa yir yikenonj dide ket Godind siteket yit yomnonj, ngirpu sana nganja epkikinonj dide kabum ipka eyenonj, i ket Tina b'auyaena riga wa agoninonj riga bobo wa yingg iyenam. ¹⁷I komkesa riga diyam auto re kea ngor aukito. Seg ket b'auyaena rigap riga wa pilke kombyam owou akatto dide ket kea twelp (12) wat yindangir amnikto.

Petro ma Pitapita Omni Yit dide Yesu ma Uj dide Utnyita gatab Bage Yit

(Mat 16:13-28; Mak 8:27-9:1)

¹⁸I yipa winind re Yesu Tinta yir opmitenonj, Tina b'auyaena riga re kea dikind Ton kima wekenonj. I Ton ket ten arkisinonj da, “Yena rigap

yomnikenenyi da yeten Kon?”¹⁹ I ton mira yomno da, “Rigap endenenanj da Man re baptiso omnikayam Yoantet, aji nindap da Man Eliyatet, i nindap da yipa b'ilap bageyam e utnyitonj.”²⁰ Aji Yesu ten egekisinonj da, “Aji widaka ringmim, win yena yomnikenenya da yeten Kon?” Si Petro ket mira yomnonj da, “Man re Godimna Kerisotet yena re God gaya yeaukonj Tina wiko omniam.”

²¹ I Yesu danda kima ten engainonj da, “Goro yena riga wumir tamnina Kor gatab!”²² Seg Yesu yindonj da, “Rigamna B'iga b'ogla jogjog b'idgotnena rakatenin, i Ju riga waina elda riga i yina mopyam si riga i dide Ju riga waina gog ouyaena rigap b'ogla isayi dem, ngirpu b'ogla onganji dem. Seg nowam bibirind Ton b'ogla kwa tutnyis dem uj ke.”

²³ I Ton ket komkesa riga amninonj da, “Yet ra man singi taet Ken yimta undokam, man b'ogla naska moina singi komkesa terarkinyit, i kwa man b'ogla ita bibir ririrind komkesa bebig takasinyit Godim wikond ngirpu moina uj wul b'agbagind, dide ket Ken yimta nutundoket.”²⁴ Mop nokip yet ra tilenggyam tina yirkokar yirgong omnika iyeny, ton ita itemb tina yirkokar dadal edamkis dem. I daka yet ra tina yirkokar edamkis Kor map, ton ita itemb tina yirkokar dadal okas dem.²⁵ I ra man komkesa gowukoi mornim okasit i dide onggit gowukoi map moina yirkokar edamkisit dem, si nangga b'ogil e man yir onget onggit gowukoi okati ke?²⁶ I kwa yet ra man Ken dide Koina yit gar ke ingar kima takasinyit riga wa wingirind, Rigamna B'igat daka men ingar kae motiny dem, ra Ton yina aneru kima ik dem Tina b'ogil inyomarena kima dide Ti B'u ma b'ogil inyomarena kima.²⁷ Aji Kon iminjog nitinjin da yepim re win owinki wekenyit dikind, wa wingirind ninda rigap makwa opima uj taukanj, ngirpu ra ton yir ongi dem God ma pumb tungg.”

Yesu ma B'enga Wip Inyomarena Yipa Dorind

(Mat 17:1-8; Mak 9:2-8)

²⁸ I onggityam gatab yit opurena seg ke re ket ama rika eitim (8) bibir awonj, Yesu ara emokinonj Petro i Yoan i dide Yakobo dide ket wuwonj de yipa dor kumb wa yir opmitam.²⁹ I re Ton yir opmitenonj, Tina wip re etama kima na aukonj dide Tina kobirgim ngaya pila na inyomarena kima bilbiljog aukonj.³⁰⁻³¹ I odedend ket nimog riga, Mose ake Eliya, pita awonda b'ogil inyomarenand dide Yesu kima yipand yitnono aenonda Tina gowukoi iraram gatab rinte ra ririrkip tainy dem Yerusalemind.³² Aji onggit winind Petro dide ton kima riga re ma sobijog yitpa pena yir uwonento. Aji re ton yir opngikto, ton kea yir angto Yesumna b'ogil inyomarena dide nimog riga Ton kima onyiti.³³ I re ton Yesund iraram yomnonda, Petro Yesund yomnonj da, “Ukoyam! Sin otomanti im wekenyin dikind. Si sin nowa plaimet raranginum, yipa Mornim, i yipa Mosem, i dide yipa Eliyam.” Aji ton maka nony awonj nangga mana ton

yindonj. ³⁴Si re ton onggityam yit apureninonj, rim ikonj dide ket ten ekanginjnonj. I re ton rim bora wa b'igarkito, ton kea moga aukito. ³⁵I ara ikonj onggit rim bora ke odede da, "Itemb ji Koina B'iga yena re Kon yobagendond. Si win Tin yutkunda!" ³⁶I onggityam ara seg ke ket, ton Yesu nena na yir yongo. Si ton nowa riga yit kesa na wekenonj onggit gatab, i onggit winind ton makwa yena ngai wumir ammento nangga na re ton yir angto.

Yesu Yipa Kewar B'igam Negir Wingawinga Yewaikitawonj
(*Mat 17:14-18, 22-23; Mak 9:14-32*)

³⁷I ispari ke ket re ton tuwonj dor kumb ke, ukoi riga bobo kea tuwonj Yesund wipwip omnam. ³⁸I odedend ket onggit riga bobo wingirind yipa rigat Yesund ara yiawonj da, "Ouyaena Riga-wii! Kon Men mitenaen da Man kor b'igand kear omnyit, nokip ton re kor lesmita b'iga e. ³⁹I negir wingawingat tin yemorkeneny dide indama kamil yowarkeneny, i tumol aembika kima tin kakwulwul yomnikeneny, ngirpu tin gou wa nenegir kana ingmandena yiyeneny, i ingkaemb ket tin yirareneny. Aji idenata irar ra tin gou wa ominy. Aji maka ra ton odede nenegir kana omnena iyeny, ton ma ita tin irarena iyeny. ⁴⁰Si kon ke pop Moina b'auyaena riga wa pilwa b'itena yoramisin negir wingawinga ewaikitam, aji ton ma ririr na." ⁴¹Si Yesu mira amninonj da, "Oo, gar ke utkunda kesa dide gar eskamki riga yepim re yu wekeny onggit gowukoyind! Ridede pin e Kon nitibnyin win kima dide ridede pin e Kon musik wimena okasin waina gar ke utkunda kesa mile gatab?" I Ton ket b'igam b'und yomnonj da, "Mor b'igand iyim Kor pilwa!" ⁴²I re itemb b'iga ikonj Ti pilwa, negir wingawingat tin gou wa yiskantonj dide ukoi kana kaktiti kima yijgindenonj. Si Yesu ket negir kilkil wingawingand samany yiyowonj, dide ket onggit kewar b'igand yisakendonj, ngirpu ti b'uim b'iga yokawonj. ⁴³Seg komkesa rigap winga kesa aukito Godimna ukoi jog danda gatab.

I re komkesa riga kid kesa aena wuwenonj onggityam komkesa mile gatab rina re Yesu amnikinonj, Ton Tina b'auyaena riga amninonj da, ⁴⁴"Win b'obogil onggityam Koina yitkak gar ke takasindam nangga gatab im ra Kon wumir tamninyin. Mop nokip Rigamna B'igand ita namb tib yii dem de rigaina yim kumb wa." ⁴⁵Aji Tina b'auyaena rigap maka nony aukito onggityam opureni yit gatab, dide onggityam yit re egiti na yibnonj towa pilke, si onggit penaemb ton maka yongwato. I ton kwa moga na aukito Tin igekitam onggityam opureni yitkak gatab.

Yete Ukoyam
(*Mat 18:1-5; Mak 9:33-40*)

⁴⁶I yipa yit b'ugwatena pita awonj b'auyaena riga wa wingirind da yete ukoyam yibim towa wingirind. ⁴⁷Aji Yesu kea wumir awonj

towaina garind onggityam yit b'ugwatena gatab, i Ton ket yipa b'iga sobijog yokatonj dide ket Ti yiu ke yonyitonj. ⁴⁸Seg Ton ket ten amninonj da, “Yet ra odede b'iga sobijog simesime ominy Koina nyi kima, ton re Kena simesime nominy. I dide yet ra Ken simesime notiny, ton re kea simesime yominy yet re Ken nitmikitonj. Mop nokip yet ra sobijogjog tainy komkesa wa wingirind, ton re ukoijog riga e.”

⁴⁹I Yoan ket Yesund yomnonj da, “Ukoyam! Sin yipa riga yir yongu Moina nyi kima negir wingawinga ewaikitand. Si sin tin yiswangu da, ‘Goro yimta ke odede omn timer dem!’ nokip ton ma ita yimta undoka miyeny sin kima.” ⁵⁰Aji Yesu tin yomnonj da, “Goro tin iswanga! Mop nokip yet ra maka wen tajgasiny, ton re wa tab ke riga e.”

Samariya Rigap Yesund Yisayo

⁵¹Si Yesum pumb wa menonim win re kea wus wa auka ikonj, i Ton ket danda kima yimjatonj menonim de Yerusalem taun wa. ⁵²I Ton ket naska nata ninda bageyam etmikisinonj Samariya eriya wa, si ton ket wuwonj dide ket b'igarkito yipa tungg wa Tinim gasa ongonjenam. ⁵³Aji demb de rigap maka Tin simesime yomno, mop nokip Ti menon yibnawonj re Yerusalem taun wa na. ⁵⁴I re Tina b'auyaena riga Yakobo ake Yoan onggityam mile yir yongonda, ton endonda da, “Yonggyam! Ma man singi et da sin wul ingaya wub kumb ke inkam dide ten so omnam?” ⁵⁵Aji Yesu ten wip awarkitonj, i samany eyowonj. ⁵⁶Ngirpu ton ket wuwonj b'enga tungg wa.

Yesund Yimta Undoka gatab Yit

(Mat 8:19-22)

⁵⁷I re ton menon yokato, nyawind yipa riga Yesund yomnonj da, “Kon ita men yimta undoka mitiyenyin ritata ra man metkenyit.” ⁵⁸Si Yesu tin yomnonj da, “Gongir wa opima towa wul bora wimenam, dide pumbind ngena wa kwa opima towa met, aji Rigamna B'igam re awir e kwa Ti wimenapu pipmet mop owaglitam.” ⁵⁹I Yesu kwa ket yipa rigand yomnonj da, “Yimta nundoke!” Aji onggit rigat Yesund yomnonj da, “Yonggyam! Kon yimta kae Mor pilwa titenjin aji naska kon kor b'und eungitam neken.” ⁶⁰Aji Yesu tin yomnonj da, “Toko wingawinga ke uj rigap gop raukinem towainajog uj riga, aji man meke God ma pumb tungg gatab God ma b'ogil yirkokar bage yit pitapita omnenam.” ⁶¹I kwa yipa rigat yindonj da, “Yonggyam! Kon men ita yimta mutundoken, aji naska Man ken ninjikite widaemb yit omnam riga yepim re wekeny koina metind.” ⁶²Si Yesu tin yomnonj da, “Yet ra yim taramis gou ungankapu gasa kumbind, i ra kak wa yir tetaingis, ton ma dimdim e unganka yiyeny. Si ton ma ririrkip riga e God ma pumb tungg wiko iyenam.”

Sebenti (70) B'auyaena Riga Itmikitam gatab Yit

10 ¹I onggit kak ke, Yonggyam abagenjinonj b'usaya Sebenti (70) riga,⁸ i Ton naska kana nimognimog etmikeninonj komkesa taun nata dide tungg nata ritata ra Ton ikeny dem. ²I re Yesu ten etmikeninonj, Ton ket ten yit etainonj da, “Erngokam re jogjog im, aji wiko riga re ma jog im. Si onggit paemb win erngoka Yonggyamind yigekita odede da, ‘Man wiko riga etmikisine Moina erngokapu gou wa.’ ³Win wuwe! Yir de, Kon wen etmikeninyin re odede wip im ringmim ra rigat mamoi tetmikisiny di yongg wa wingir wa. ⁴I goro eyina pauso, i goro ga, i goro yonginkak, i dide goro yena simesime omna nyawind. ⁵Ra win yipayipa met nata b'itgarenindam, naska win tendenindam da, ‘Ngimbla dikind onggit metind.’ ⁶I ra onggit ngimbla okatam ririrkip riga ibim demb de onggit metind, ita waina oramiti ngimbla ton kima ibim. Aji maka ra, ita titenj wa pilwa. ⁷I win omanda wimena tuwenyit onggit met nata, i win owou dide onaike teyenindam nangga gasa na ra ton ogona teyenanj. Mop nokip God ma wiko riga re ririrkip riga e odede nya ke tina wiko mira okatam. Goro metta metta tuwenim! ⁸I ra win yipayipa taun nata b'itgarenindam dide wen simesime tamnenanj, win owou nena teyenindam nanggamog im ra wanim wip ke taramkauranj. ⁹I kopa ke riga tesagikenindam demb de onggit taun nata, i ten yit tamnenindam da, ‘God ma pumb tungg re kea wa wus nate ainy’. ¹⁰Aji ra win yipayipa taun nata b'itgarenindam, i maka ra wen simesime tamnenanj, win tuwenyit onggit taun sobea nata, i tendenindam da, ¹¹‘Nangga ma ji onggityam sungar rina re b'ausikanj sowaina pispamind onggit taunind, si sin ket wanim mim onggityam sungar b'idbenenindam wen nonony omnam da b'isagika win ita ik dem wanim. Aji win b'ogla onggityam gatab wumir tekenyit da God ma pumb tungg re kea wus nate ainy.’ ¹²I Kon wumir wen tamninyin da ra b'isagika win ik dem, Sodom taunim ra ukoi bebig e okas dem, aji onggit taunim ra dem b'usaya mogjog bebig e okas dem.

¹³“God ma sake man kima Korajin, i God ma sake man kima Betsaida. Mop nokip rako Kon opimemb kid kesa kima danda wiko amnikinonj de negir kima Tiro taun ake Sidon taunind rina re Kon wa wingirind amnikeninonj, ton kako b'ila rongg b'ikokto dide ket wumbol kumbind omnikto negir mile ke engendam de Godim pilwa. ¹⁴Aji ra b'isagika win ik dem, Tiro ake Sidon towanim ra ukoi bebig e dem, aji wanim ra dem b'usaya mogjog bebig e okasya dem. ¹⁵I kwa man, Kaparnaum, ita man wub kumb wa b'uturowasit dem? Nayi, man ita tiglet dem de uj rigaina tungg wa.

⁸ 10:1 Ninda Grik peband da “sebenti tu (72)”.

¹⁶Yet ra wen yit tutkundeniny, ton Kena nutkundeny. I yet ra wen tesainy, ton Kena nisai. Aji yet ra Ken nitisai, ton Ti na yisai yet re Ken nitmikitonj.”

¹⁷Si ket sebenti (70) b'auyaena riga itekto sam kima, i endento da, “Yonggyam! Nangga ma ji negir wingawinga, ton kea sin yit nutkudento, re sin Moina nyi kima b'ingawa yoramitenonda.” ¹⁸I Yesu ten amninonj da, “Kon kea Satanand yir yongond wub kumb ke sap otendand odede it re ringma ra waral tokminjis. ¹⁹Kon ke wa danda akainond girem dide wirmogmog ipmindenam, dide gou wa omnenam komkesa geja rigaina danda. Si onggit paemb makwa yipat ita wen negir tamnikiny. ²⁰Aji goro win sam taininam onggityam gatab rina re negir wingawingap wen yit utkudento, aji win sam omnika yiyena onggitim da waina nyi re iriki im wekeny de pumb tungg wa.”

²¹I onggit winind re Yinayina Wingawinga Yesum pilind b'imuronj, Ton ma sobijog na sam yomnikonj, i Ton yindonj da, “Abu, wub ake gowukoyim Yonggyam! Kon siteket yit momnyin, nokip Man ke onggityam Moina danda dide yirkokar yitkak agurkinot riga wa pilke yepim re multekip kima dide b'ogil wumir kima wekeny. Aji Man kea onggityam Moina gasa towanim pitapita amnenainot yepim re b'iga sobijog pila wumir kesa wekeny. Abu! Iminjog e, Onggityam gasa aukonj re Moina b'ogil sam kima singi nasim. ²²Komkesa danda dide wumir re Kor B'uit Kor mana nogoninonj ingaenam. I makwa yipa ita yete wumir B'igam gatab, aji B'uta Tinta wumir. I makwa ita yete wumir B'uim gatab, aji tonpima wumir, B'iga dide riga yena re B'igat singi eyeniny B'und pita omnenam towa pilwa.” ²³I Yesu Tina b'auyaena riga wip awarkisinonj, i ten nena amninonj da, “Ton b'ogil omni yirkip im ji yepim re yir ongong eyenanj nangga im re win yir ongong eyenindam. ²⁴Mop nokip Kon wen wumir tamninyin da naskand jogjog bageyamip dide kingip singi aukenento yir ongongim nangga im re win yir ongong eyenindam, aji ton maka yir ongong eyento. I kwa ton singi aukenento utkundam nangga im re win utkudena eyenindam, aji ton maka utkundenento.”

B'ogil Samariya Riga gatab Tendam Yit

²⁵I yipa winind yipa gog yit wumirjog riga onyitonj Yesund otonkenam, si ton ket Tin yerkitonj da, “Ouyaena Riga-wii! Ringgityam wiko omnika kae kon owabinsin dadal ngirpu kesa yirkokar?” ²⁶I Yesu tin yismonggawonj da, “Ridede e Mosemna gog peband iriki yibim? I man ridede e yokatenyit moina ogenka wingirind?” ²⁷Seg ton yismonggawonj da, “Man moina Yonggyam Godind singi yiyene moina kupkakupka kid ke, i moina kupkakupka wingawinga ke, i moina kupkakupka danda ke, i dide moina kupkakupka nony ke! I singi yiyene mor rigand mada re dide!” ²⁸Si Yesu tin yomnonj da, “Kea man dimdimjog mira nomnyit. Onggityam yit ririrind yomnike! Si man ita

yirkokar mitibnyit.”²⁹ Aji ton singi na tilenggyam negir kesa d̄im̄dimjog riga tainy. Si ton Yesund yerkitonj da, “Si yete ji kor riga?”³⁰ Yesu yismonggawonj da, “Yipa riga Yerusalem taun ke yikonj de Yeriko wa, i nyawind raskolip ket tin yiwatinto dide ket tina kobirgin yotogiko, i tin nenegir kana yipowo, ngirpu gou yipo. Seg ton tin kokamkokam yiraro.³¹ I odedend yipa yina si riga onggityam nya imayonj, i re ket ton onggit rigand yir yongonj, ton kea tin nya yiwaponj.³² I odede yipa wip nya ke yipa Lebi gu riga todaka onggit pipmet wa ikonj dide ket tin yir yongonj. Seg todaka kea tin nya yiwaponj.³³ Aji yipa Samariya riga menon yokatonj, i ket ikonj rikind re itemb riga yibnonj. I re ton tin yir yongonj, ton kea gar ke tin kear yomnonj.³⁴ I ton ket ti wus wa yikonj, i ket ton olib gaya dide ik egmarkinonj tina ipoipu yirand^b dide ket unjoka yiyenonj. Seg ket ton tinajog dongki kumb wa tin yangitonj, dide ket yiyonj yipa wungapu met wa, ngirpu adea ket tin yir yengendonj.³⁵ I ispari ke ket ton twelp (12) Kina^a yokawonj onggit wungapu met yonggyamim, i yomnonj da, ‘Tin yir ipka iyeniyit. Ra man wewe wulkip tasomnonyit tin yir ipkand, kon ita ket mor mitendainyin onggityam wewe wulkip, ra kon titenjin dem.’³⁶ Si man ridede e nony aet? Ringma, onggit nowa riga wingirind, yete ti riga ainy onggit rigam yena re raskolip nenegir kana yipowo?”³⁷ Si onggit gog wiko rigat mira yomnonj da, “Tonit yet re tin kear yomnonj.” Seg Yesu tin yomnonj da, “Meke! Dide odede yipa wip mile na tamnikinyit.”

Marta ake Mariya

³⁸ I re ton wuwenonj, nyawind Yesu b'igaronj yipa tungg wingir wa. I ademb de yipa kongga nyi da Marta Yesund obai omnam yingaukonj.³⁹ I onggit konggam yipa kea wundoi wibnawonj wogenayo da Mariya. Si ti wundoi re Yonggyamimna pis wip nat omi wibnonj Tina yitkak utkundenam.⁴⁰ Aji Marta re nony bebig kima na guglam yondratenonj b'engabenga wip owou ongonjenam. Si ton Yesum pilwa wikonj dide ket Tin yomnonj da, “Yonggyam-wii! Man ma wumir et da kor wundoi kor nena mana wiko nirarkainy? Si be ngai wingae tin ken yim okawam!”⁴¹ Aji Yonggyam mira tin womnonj da, “Marta, Marta! Man nangga ma gar bebig dide nony negir ainyit jogjog owou ongonjenam?”⁴² Aji yipaina mile nena e b'ogiljog omnikam dikind. Mop nokip Mariya re kea b'ogil pipmet yokas, si makwa yete onggit pipmet ke tin tewaikis.”

Yir Opmita gatab Ouyaena

(Mat 6:9-15; 7:7-11)

11 ¹ I yipa winind Yesu yipa pipmet yokatonj, i ket yir opmitenonj. I re Ton yir opmita seg awonj, Tina b'auyaena riga wingirind yipa

^b 10:34 Onggit winind olib gaya re wai ngu omna gasa na dide greip kip ke omnik i re wayind guda ipowa gasa na. ⁱ 10:35 Grik peband da “nimog Denari”. I yipa Denari re yipa riga ma yipa bibir wiko mira na.

rigat Tin yomnonj da, “Yonggyam! Sida nouyaenine ridede e yir opmitena odede rija na re Yoan tina b'auyaena riga auyaeninonj!” ²Si Yesu ten yit etainonj da, “Ra win yir topmisindam, odede tendenindam da,
‘Abu! Moina nyi b'ogla yinam rain.

I Moina wip omnenapu pumb tungg b'ogla rinek onggit gowukoi wa.

³I bibir weanjweanj sowa owou notgoneneninyit bibir ririrind.

⁴I sin komkesa riga wa negir mile awir amnikaenindam yepim re sowa pilind negir mile amnikenenanj, si onggit paemb Man sowaina negir mile awir omnika teyeninyit.

I Man goro sin wip niyininim negir ma b'atonkena wa!’ ^j

⁵I Yesu ten amninonj da, “Rada wa wingirind yipa rigam ita ti yipa ti riga, i ton yik onggit ti rigam met wa sidirind, dide tin ominy da, ‘Kor riga! Nowa sana nganja nokaine, yimta ke toko mira metendainin.

⁶Nokip yipa kor riga kor pilwa ik paja tungg ke, aji kor awir e kwa nangga e kor yimind yibim ti okawam.’ ⁷I ti rigat met wingir ke tin yismonggawonj da, ‘Goro nitisakawim! Mora daka re kea idoki e yibim, i sin koina b'igawar kima ke yipa nasim b'ikangindi yutungi wekenyinin.

Si kon ma ririr e ket tutnyisin mor ogonam.’ ⁸Si Kon wen tamninyin da nangga ma ji rada ton re ti riga e yibim, ton ma ita tutnyis tinim ogonam ti riga map. Aji ra ton ingar kesa ti rigand ijenenawai, ton ita ket tutnyis ti ogonam nangga ma ton singi yoramis. ⁹I Kon kwa wen tamninyin da win erkena yiyena, i win ita okasya. I win oraka yiyena, i win ita ket odarya. I win mora odounena yiyena, i ita mora wanim tipangenj. ¹⁰Mop nokip komkesa riga yepiya ra erkena iyeniyi, ton ita okasi, i oraka iyeniyi, ton ita odari, i dide mora odounena iyeniyi, mora ita towanim tepangenj.

¹¹I wa wingirind yete re b'iga b'uowam, rada ti b'igat erkis kabumim, si ringma, ton girem e okau, o minda ma kabum e? ¹²I kwa rada paurokipim erkis, si ton ita okau wirmogmog? ¹³Si onggit paemb nangga ma ji rada win negirjog mile riga im, aji win wumir im wekenyit ridede e wa b'igawar wa ogonam b'ogil gasa. Si Abu yete re yibim pumb tungg wa, Ton re ma ija e it re win re dide, aji Ton opima iminjogjog Yinayina Wingawinga towanim takainy yepim re Tin yerkenyi.”

Yesu dide Beeljebul

(Mat 12:22-30, 43-45; Mak 3:20-27)

¹⁴I Yesu yewaikitonj negir wingawinga yet re yipa rigand yit kesa yomnikenenonj. Si re onggityam negir wingawinga opendonj, itemb yit kesa riga kea yit apureninonj. Seg ket riga bobo kea kid kesa aento. ¹⁵Aji

^j 11:4 Ninda Grik pebap yismondenyi da [aji Man sin nitringasine negirjog milem pilke.]

towa wingirind ninda riga endento da, “Ton negir wingawinga eaukeniny re negir wingawinga waina mopyam Beeljebulimna danda kaim.” 16I ninda rigap odede erkena kima Yesund yotonkeno da, “Man yipa kid kesa kima danda wiko omniket rinte ra pumb tungg ke ik. Si ingkaimemb sin Men gar ke motkasu.” 17Aji re Yesu towaina nonyik b'amdena wumir awonj, Ton ket ten amninonj da, “Ra yipa kantrind riga towalenggyam b'itpouranj gangga b'akalendam, itemb kantri ita negir tainy. I kwa ra b'ubigawar wingirind riga towalenggyam b'itpouranj, onggit b'ubigawar waina wimena re ita negir tawik. 18I ra Satanamna kantrind, Satana Ti wirand negir wingawinga teaukeniny, i towalenggyam b'itpouranj gangga b'akalendam, si ringma, ririr e itemb tina kantri tonyis? Kon nindenyin onggityam yit, mop nokip win endenindam da Kon negir wingawinga eaukeninyin re Beeljebulimna danda kena. 19Si win apurenindam da Kon Beeljebulimna danda kena negir wingawinga eaukeninyin, si daka waina b'igawar wingirind ninda riga, ton yaina danda kaim eaukenenanj? Godimna danda kaim. Si onggit mop paimemb ton ket taukanj ra wanim b'isagika riga im onggityam waina negir opurena gatab. 20Aji ra Kon negir wingawinga teaukeninyin Godimna danda yim ke, si God ma pumb tungg re kemb wa pilind au. 21I ra yimmasa kikib kima danda riga tinajog met aba yirgong omnika iyeny, tina gasa re b'ogil ima tekeny. 22Aji ra yipa ukoi jog danda riga ik dide onggit danda rigand gou wa ominy, tina geja gasa isamburiny ringkae re ton b'uwoga yikeny. Ngirpu ton onggit rigamna gasa komkesa b'asos tuweny ti rigawar kima. 23I yet ra maka Kon kima tainy, ton re Koina geja riga tab nate yibim. I kwa yet ra maka Kon kima yipand b'eomkena ikeny, ton re wetaweta omnika riga e.

24“I ra negir wingawinga topenj yipa rigam pilke, ton ket b'ugumarena ikeny nyi kesa pipmet nata dide oraka iyeny wiram wimenam pipmet, aji makwa ita odar. Si ton ket indeny da, ‘Kon kwa ama titenjin koina met wa rina re kon yiraren.’ 25I ra ton titenj, ton met odar ra b'obogil isagiki e dide b'obogil gasa ongonjeni im. 26Si ton ket yikeny dide arondeniny ninda seben (7) negir wingawinga yepim re ukoi kana negir milend wekeny ti pilke, i ket ton kima yipand b'igarkanj i dide dea de wimena wuweny. Si onggit rigamna kikitumpu wa wimena re ma ija e it re naskand re dide, aji itemb re ket negirjog e yibim.”

27I re Yesu onggityam yit opurenand yibnonj, riga bobo wingir ke yipa kongga ara wikenonj da, “God ma b'ogil onggit komim pilind yet re Men komind mowamonj dide ringgit ngompiya re Men ngom mokonda.” 28Aji Yesu yindonj da, “Iminjog e, aji tonsim iminjogjog God ma b'ogil kima riga yepim re God ma yit utkundenanj dide b'ingawand aramitenenanj.”

Rigaina B'arkita Kid kesa kima Danda Wiko gatab

(Mat 12:38-42)

29I re riga bobo b'aikindento, Yesu yindonj da, “Riga yepim re yu negirjog milend wekeny onggit gowukoyind, re negirjog mile riga im,

ton Ken nigekenyi kid kesa kima danda wiko omniam, aji Kon kid kesa kima danda wiko wa takainyin ra ina nena e rina re Yonam pilind aukonj. ³⁰Mop nokip onggityam kid kesa kima danda wiko rina re Yonam pilind aukonj re yipa mal na awonj Ninebe riga wa pilwa, si Rigamna B'iga Toda kwa odede yipa wip mal emb tainy towanim yepim re yu wekeny onggit gowukoyind. ³¹I ra b'isagika win ik dem, bargubo gatab ke kwini ita yipand gilgil towinyis dem onggit riga kima yepim re yu wekenyit onggit gowukoyind, i ton ita yir ungata riga tainy dem wanim negir ma b'isagika okatam. Mop nokip naskand ton tikonj re ma wuswus kantri kena Solomonimna b'ogil multekip ke yitkak utkundam, aji ita yete yibim dikind, Ton re ma sobijog b'ogil multekip kima e Solomonim pilke, aji win makaima Tina b'ogil multekip ke yitkak singi eyenindam utkundam. ³²I kwa Ninebe riga re kea Yonamna pitapita omnanyi God ma yitkak yutkundeno, i ingkenaemb ket negir milem pilke gar b'engento Godim pilwa. Aji ita dikind ukoijog riga yibim, si Ton re ma odede ukoi riga e it re Yona re dide. Aji riga yepim re yu wekeny onggit gowukoyind, ton ma opima Tina yit utkundenanj dide negir milem pilke gar b'engkiranj Godim pilwa. Si onggit paimemb Ninebe riga opima towinkanj dem Godimna b'isagikapu pipmetind yipand ton kima yepim re yu wekeny onggit gowukoyind, dide ket onggit Ninebe rigaina b'ogil milep ten negir ma b'isagikand taramitenanj dem.

Jiwim pilind Ngaya

(Mat 5:15; 6:22-23)

³³“Makwa yipa rigat ita lampa so ominy kopakak ke utwangkam o minda dar ke ikangindam. Aji ton lampa so ominy ra uwonyitapu ororind oramita ma, nokim da idenat ngaya yir ongi yepiya ra riga met wingir wa b'itgarenanj. ³⁴I waina yirkip re waina jiwim lampa e. Si rada waina yirkip b'ogiljog im, waina kupkakupka ji ra ngaya pita nasim tekeny. Aji rada waina yirkip negirjog im, si waina ji ra sibib ke ikangindi im tekeny. ³⁵⁻³⁶Si onggit paemb rada moina kupka ji ngaya nate yibim, dide makwa yipa kipear sibib ke ikangindi e yibim, si kupkakupka ji re ngaya pita nate yibim, odede it re ringma ra lampa ngayat men mitnyomareny.”

God ma Sake Parisai Riga dide Gog Wiko Riga wa pilind

(Mat 23:1-36; Mak 12:38-40; Luk 20:45-47)

³⁷I re Yesu onggityam yit apureninonj, yipa Parisai rigat Tin yingaukonj ton kima diyam awowim. Seg Yesu tina met wa b'igaronj dide ket omitonj diyamim. ³⁸Aji re onggit Parisai rigat yir yongonj Yesumna diyam mile, ton kid kesa na awonj, mop nokip Ton maka naska yim b'iseka mile yomnikonj diyam awowim Ju riga waina iseka mile ririrind. ³⁹I Yonggyam tin yomnonj da, “Yu win Parisai riga re kapo dide

pleto b'obogil im iseka eyenindam waina mile ririrind, aji wingir ke re win nonygor mile dide negirjog mile ke yindangir im wekenyit. ⁴⁰Win wumir kesa korirkorir riga! Godit gim ke yir ongong gasa atobarkinonj, si ringma, ma Tonit kwa atobarkinonj wingir ke yir ongi kesa gasa? ⁴¹Aji win kear gasa na agoninam gasa kesa riga wa rinsim re wekeny waina kapo dide pleto borand, si ingkaimemb ket komkesa gasa wanim kilkesa tekeny. ⁴²Aji God ma sake win kima Parisai riga, mop nokip win opima erngokenenindam kima i sili i dide b'engabenga wip b'eag, i ket onggityam sobijog gasa ten (10) ikalki wingirind yipa tab Godind wulpok yomnikeneya. Aji win yiukeneya dimdim mile omniam riga wa pilwa dide singi b'iyena mile omniam Godim pilwa. Aji win b'ogla omnikeneya onggityam mile, dide Godim yipa bobo wulpok omnika mile toda kwa b'ogla omnikeneya. ⁴³God ma sake win kima Parisai riga, mop nokip win singi aukenenindam isnawa kima pipmet okatam Ju riga waina yir opmitenapu met nata, dide isnawa kima simesime okatam riga wa pilke maketpu nata. ⁴⁴God ma sake win kima, mop nokip win re gopmet pila im rinsim re wigawiga yir ongi kesa egurki wekeny, dide rigap nony kesa pis b'amdena wuweny onggit kumbind. Si ingkaimemb riga kil kima aukenenanj Godim wipind."

⁴⁵I gog yit wumirjog riga wingirind yipat Yesund yomnonj da, "Ouyaena Riga! Re man onggityam yit apureninyit, Man ma sobijog negir yit na sin nomninyit." ⁴⁶Aji Yesu ten esmonggainonj da, "Win gog yit wumirjog riga! God ma sake win kima, mop nokip win gog yit kaim riga wa pilind bebig angurka eyenindam, aji win walenggyam makwa ngai opima ekak aramitenenindam onggityam gog yitimna bebig urowatenam. ⁴⁷God ma sake win kima, mop nokip win opima bageyam wa b'ogil gopmet arangkaenenindam, aji ton re wa b'uwar waina uj ondriki im. ⁴⁸Si win kemb yir b'ungasindam, dide wa b'uwar waina omniko mile yipand wa b'uwar kima yimjatenya, mop nokip tonpiyamb ten naska uj andrikto, aji winpim kwa ket gopmet arangkaindam. ⁴⁹Si onggit mop paemb God Tina multekip ke yindonj da, 'Kon opima tetmikeninyin towa pilwa bageyam dide itmikitijog riga, si rigap opima onggityam riga wingir ke ninda riga uj ondriki teyenindam dem, i ket bebig dide b'isadrena taramitenaauranj dem.' ⁵⁰Si onggit paimemb riga yepim re yu wekeny onggit gowukoyind, tonsim kokob takatanj komkesa bageyam waina kus rina re igmarkito onggit gowukoi otomapu ke ngirpu yu. ⁵¹Si naskajog kus yigmarkonj re Abelit, i ingkenaemb ket rigap ma yipa kima bageyam na kus igmarka teito, ngirpu kikitum kus yigmarkonj re Jakariyat yena re rigap yongando yina si omnikapu kap dide yina pipmet ganggand yinamet wingirind. Owi, Kon nitinjin da riga yepim re yu wekeny onggit gowukoyind re, tonsima onggityam komkesa mile kokob takatenanj dem. ⁵²God ma sake win kima, gog yit wumirjog riga, mop nokip winpiya Godim gatab

wumir ki yewaikitonda, si win walenggyam maka onggityam wumir wa b'igarkitondam, dide kwa da winpiya ogoka eyentondam riga yepiya re onggit wumir wa b'igaram wuwenonj.⁵³ I re Yesu opendonj onggit met ke, Ju riga waina gog ouyaena riga dide Parisai rigap ket Tin soro kima iwatinti yiyo dide ket Tin erkena yiyo jogjog gasa gatab Tin bebigind oramitam.⁵⁴ Si ton Yesumna opureni yitkak gatab mana yipya b'itkiti wekenonj da ra Ton opulis nanggamo gog erbeka yit, si ingkaim ket Tin yimind okasi.

B'auyaena Riga wa Nonony dide B'ugowa Yitkak

(Mat 10:26-33; 12:32; 10:19-20)

12 ¹I re ninda ten tausin (10,000) riga bobo yipand b'eomto, si rigata rigata towalenggyam pis b'akaski na wekenonj. I Yesu naska yit opurena b'atomonj re Tina b'auyaena riga wa pilwa na da, "Win yir kima tekenyit Parisai riga waina yist pila ouyaena. Itemb towaina ouyaena re gim ke b'ogil aji ngor wa negir mile kima negir ouyaena e. ²Aji God opima komkesa kupkakupka ikangindi gasa pita wa tapekiny dem, dide komkesa wigawiga egurki gasa wumir tamnikiny dem. ³Nangga na re win wigawiga apurentondam sibibind, opima bibirtikind rigap pitakipind tutkundenanj dem. I nangga na re win tu muma ke yipya borand usenentondam wigawiga pipmetind, opima pitapita tamneniny dem riga bajbajind.

⁴"Kor rigawar! Kon wen tamneninyin da, 'Goro moga tuwajinam ten yepim re riga ji nena uj andrikenenanj, si ton onggit kak ke ra makwa opima b'usaya nangga im omnika teyenanj.' ⁵Aji Kon wen tauyainyina yena ra win b'ogla moga uwajya, si win moga yuwada yama re Ti danda yibnau riga uj ondrikam dide onggit kak ke wul tungg wa iskokam. ⁶Si ringma, ma rigap paib (5) sobijog ngena im emdenenanj ten (10) Toya ke?^k Si ngena re ma ukoi gasa e. Aji Godim wipind makwa ita yipa odede ngena ngai nony b'edati yibim. ⁷Aji God re opima wen b'obogil yir ipka eyeniny, nangga ma ji da Ton opima kwa ogenka eyeniny komkesa mopngii waina mopind. Si win goro moga taininam, mop nokip win re ukoi jog isnawa kima im, aji ma ija im opi re jogjog sobijog ngena re dide.

⁸"I kwa Kon wen tamninyin. Yet ra riga wa wipind Ken pitapita notineny, Rigamna B'iga Todaka ita Godimna aneru wa wipind tin pitapita ominy dem. ⁹Aji yet ra riga wa wipind Ken oena nitiyeny, Koda ita tin oenyin dem Godimna aneru wa wipind. ¹⁰I kwa yet ra Rigamna B'igand negir yit ke ominy, God ti onggityam negir mile opima awir

^k **12:6** Towa wingirind ten (10) Toya re nimog kip koin na, i sobijogjog wulkip na ebnawonj.

omnainy dem. Aji yet ra Yinayina Wingawingand isadreny, God makwa ita onggityam negir mile awir omnau dem. ¹¹I ra rigap wen kot omnikam teyenanj Ju riga waina yir opmitenapu met wa i wip iyoi riga wa wip wa i dide ukoi nyi riga wa wip wa, win goro nony bebig taininam, ridede o nangga yitkak kaim b'itirmekindam, o nangga yitkak im tapurenindam. ¹²Mop nokip Yinayina Wingawingate ket onggit winind wen tauyaeniny nangga yitkak im win b'ogla tapurenindam."

Jogjog Gasa kima Korirkorir Riga ma Tendam Yit

¹³I riga bobo wingirind yipa rigat Yesund yomnonj da, "Ouyaena Riga-wii! Kon singi en Man kor nanyind ingaet da ton sowa b'uimna owabinden i gasa kon kima b'obogil takalenjiny." ¹⁴Aji Yesu tin yismonggawonj da, "Riga! Yet Ken nobagendonj b'isagika rigam o waina gasa ikalka rigam?" ¹⁵I Yesu ket riga amninonj da, "Win yir kima tekenyit, si win b'ogla walenggyam yir b'itipkindam komkesa b'engabenga wip nonygor mile wa pilke! Mop nokip rigamna yirkokar re ma indama b'inkiti yibim tina okati jogjog gasa wa pilind." ¹⁶I Ton kwa tendam yit ke ten amninonj da, "Yipa jogjog gasa kima riga yibnonj, i tina sopapund owoukip ijagikto re mog na pis. ¹⁷Si ton ti nony mana yindonj da, 'Ma kor awir e namb ukoi met nibnau onggityam jogjog koina owoukip ongapam? Si nangga e kon omniken?" ¹⁸Seg ton ket yindonj da, 'Kon ija e namb omniken. Kon onggityam koina owoukip ongapapu met b'iga tebogikinyin, dide ket owoukip ongapapu ukoi met im tarangkinyin. Si amimemb ket komkesa owou dide b'ogil gasa tangapinyin. ¹⁹Si kon ija emb ji ket kolenggyam tainy in da, "Mor ma yipa kima b'ogil gasa im ongapi mibnainy jogjog kemag kima ingaenam. Si man b'ogla wiram yokatene, i owou yiyand mibne, i onaika yiyand mibne, i dide sam nenand mibne!"' ²⁰Aji God ija emb tin ominy da, 'Korirkorir, Kon yu siwiny moina yirkokar ewaikisin dor mor pilke. Si opimemb moina b'obogil ongapi gasa ra yamim ket taukanj?' ²¹Ija emb ji tainy tinim yet ra tinim nena gasa ongapa teyenyiny dide maka ra Godim jogjog gasa oramkaeneniny."

Goro Nony Bebig Gim ke Gasa gatabim

(Mat 6:25-34; 6:19-21)

²²Seg Yesu ket Tina b'auyaena riga amninonj da, "Si onggit paemb Kon wen tamninyin da goro win odede nony kubir taininam da nangga owou im tawenenindam yirkokar wimenam, i kwa nanggamog kobirgim im b'itkokenenindam waina jiwind. ²³Mop nokip yirkokar re ukoi jog e owowim pilke, i kwa ji re ukoi jog e kobirgimim pilke. ²⁴Win b'ogla b'awar gatab nony menamena amnikinam! Ton makwa opima tuny igmarka eyenenanj, i makwa opima owoukip eakikenenanj. I kwa towa

awir e owou ongapapu met b'iga i dide kwa owou ongapapu bil. Aji Godte ten owou ke angenkeneniny. Si iminjog e da win re ukoijog im odede ngena wa pilke. ²⁵I wa wingirind yete ririr e tina nony kubir b'amnika ke tina yirkokar isonkis yipa sobijog win kima? ²⁶Si onggit paemb win ma ririr e walenggyam omniam odede sobijogjog gasa. Si nangga paim daka win nony kubir aenindam ninda gasa gatab? ²⁷Win b'ogla b'obogil temtem gatab nony menamena amnikinam rija im ton b'obogil ikaeneni owinkenenanj. Si ton ma opima kobirgim omniam tin kai eraskenenanj, i dide kwa ton ma opima kobirgim omnika eyenenanj. Aji Kon wen wumir tamninyin da king Solomon kea tina komkesa b'ogil inyamarena kima b'ajga yikenonj, aji tina b'ajga re makwa yipa ririrkip awonj yipa odede temtem re dide. ²⁸Si rada Godsim odede tibam tib ejga eyeniny rinsim re yapind yu yilo wekeny aji mep uj taukanj wul wa b'iskokam. Si ringma, ridede wip e ket God wen b'obogiljog ejga teyeniny? Si win goro sobijog gar ke utkundand tekenim! Ton opima wen b'obogiljog ejga teyeniny. ²⁹Si win goro odede gasa oraka teyeninam, opi re da nangga im win tawindam o nangga im win tanaikindam. I dide kwa win goro nony kubir taininam onggityam gasa gatab! ³⁰Mop nokip gowukoi gar ke utkunda kesa rigap insimemb komkesa gasa oraka eyenanj, aji wa B'u God wumir e da win b'ogla onggityam gasa tengaenenindam gowukoi wimenam. ³¹Aji win b'ogla God ma pumb tungg oraka yiyena. Si God ket wa tagoniny ra ma pumb tungg nena e aji daka kwa opima odede komkesa gasa tagoniny. ³²Si win, Koina sobijog mamoi bobo, goro moga taininam! Mop nokip wa B'u God re ma sobijog singi e aeny wanim pumb tungg okawam. ³³Si win asoginam wainajog gasa dide ket kear omnam agoninam ingaena gasa kesa riga wa. Si ingkaimemb win wanim pauso tamnikindam rinsim ra maka kep taukenenanj. Si onggityam re God ma pumb tunggind ongapi b'ogiljog gasa im rinsim ra wanim dadal tekeneny. I demb de pumb tungg wa awir im bebirip gasa negir amnikenenanj. ³⁴Mop nokip rokasim re waina b'ogiljog gasa wekeny, indamimaemb todaka waina kid tekeny.

B'ogil Nony Ijai Wiko Riga
(*Mat 24:45-51*)

³⁵“Win b'obogil b'angonjeni na wekene rob ke b'ibgi robmopind dide lampa so omni kima. ³⁶Si win odede riga na taindam opi re ringmim ra wiko rigap towaina yonggyamind yir ungaunenyi simesime omnam ra ton titenj sisil molkongga omna diyamdiyampu ke dide mora odouneny, nokim da idenat ton towa yonggyamim odenja mora ipangendai. ³⁷Si Kon iminjog wen tamninyin. Onggityam wiko riga re b'ogil omni im yena ra towa yonggyam yir epangki tadariny ra ton titenj. Si ra towa yonggyam

odede milend yir tanginy, todaka rob kae b'atijig, i ket ten tamisiny diyamim, i dide diyampu wa ik dide towanim ngole b'atindrik. ³⁸Ton re b'ogil omni wiko riga im yena ra yonggyam odede milend tadariny, ra ton titenj minda si giepind o minda sidirind. ³⁹I win wumir im da rada met yonggyam wumir ai e yibim da siwiny onggit win nate yurowamam riga ik tina met wa, ton ma ita yiyag ondras tina met iporkam. ⁴⁰Si wida kwa b'ogla b'angonjeni na tekenyit, mop nokip Rigamna B'iga ik ra dem waina ongwati kesa win nate dem.”

⁴¹I Petro ket Yesund yerkitonj da, “Yonggyam! Rika man onggityam tendam yit yopurenyit re sowanim ma, o rika komkesa riga wa ma?” ⁴²Si Yonggyam mira yomnonj da, “Si yete ji b'ogil multekip kima nony ijai mopyam wiko riga ya yim nat ra yonggyamimna metind komkesa gasa taramkiny yir ipkam? Si yonggyam ita ket odede nony ijai wiko riga obagenj komkesa tina wiko riga wip omnenam dide towa ita bibir win weanjweanjind owou ogonam towaina yingg ririrind. ⁴³Si ton re b'ogil omni wiko riga e yena ra tina yonggyam odar odede yipa wip mile omnikand ra ton titenj. ⁴⁴I Kon iminjog wen tamninyin da ti yonggyam ita odede wiko rigand obagenj komkesa tinajog gasa yir ipkam. ⁴⁵Aji rada yonggyam yipa negirjog wiko rigand tina komkesa wiko riga dide tina gasa yir ipka mopyamim obagenj, si ija emb ji ton ti nony mana indeny da, ‘Meda kor yonggyam ma wanakana e titenj.’ Si ingkaemb ton ket b'atom odede negir mile omnikam, opi re wiko riga dide wiko kongga ipowam i owou yiyand wimenam i onaika yiyand wimenam i dide ikpipind wimenam. ⁴⁶Si onggit wiko rigamna yonggyam titenj ra onggit bibir nate ridenat ra ton maka bibir wumir ibim, i onggit win nate ridenat ra ton maka win wumir ibim. Seg ti yonggyam ket tin mop owaras dide ket ti pipmet okau ra yipand utkunda kesa riga kima nenegir wimenam. ⁴⁷I rada onggit wiko rigat wumir e yibim ti yonggyamimna singind b'ingaenam, aji ra ton maka ti yonggyamimna singind gasa tangonjeniny dide tamnikiny, si ti yonggyam ket jogjogpyam e tin ipowa iyeney. ⁴⁸Aji rada yete re wumir kesa yibim ti yonggyamimna singi gatab, dide ra ton tamnikiny negir gasa rinsim re ririrjog e ipowa okatam, si ti yonggyam ket sobijog kana e tin ipowa iyeney. I yamim re yonggyam jogjog agoniny, toda yonggyam ra jogjog im towa pilke tadarkiny. I kwa yamim re yonggyam nony b'ijawa kima jogjog agoniny, toda yonggyam ra jogjog mim ten tarkeniny.

Ma Ngimbla mana aji Geja kima b'akalka mana

(Mat 10:34-36)

⁴⁹“Kon netkond re wul oramita mana onggit gowukoyind. I rada wul kemb so omni e yibim, makwa nangga e ket Kon singi yomnyin. ⁵⁰Aji Kor ita ujim baptiso nibnau rinte ra Kon okasin. Si ridede gar bebig kima e

Kon nibnenenyin, ngirpu Kon undwasin onggityam baptiso? ⁵¹Rika ija im win nony aindam da Kon riga wa ngimbla okawa mana netkond dikind onggit gowukoyind? Kon wen tamninyin da nayi, aji gangga b'akalka mana. ⁵²Mop nokip yu ke, ra yipa metind paib (5) riga tekeny, ton opima gangga b'atkalkenenanj towa wingirind, nowa rigap geja omnikenenyi nimog riga wa pilind, i nimog rigap geja omnikenenya nowa riga wa pilind.

⁵³"I kwa rigap gangga b'atkalkenenanj, b'uit geja omnikeneny ti riga b'igam pilind, i todaka riga b'igat ti b'uim pilind, i mogit geja omnikeneny ti ngimngai b'igam pilind, i todaka ngimngai b'igat ti mogim pilind, i dide mog konggat geja omnikeneny ti b'igamna konggam pilind, i todaka mea konggat ti leomna mogim pilind."

Win Ongwata gatab Yit

(Mat 16:2-3)

⁵⁴I kwa Yesu riga bobo amninonj da, "Ra win piro moi omgokand yir ongya kemag gatab ke, win odenja im ket tendenindam da, 'Ukoi piro e namb ik.' Si ita ket onggit yit ririrind tawik. ⁵⁵I kwa ra rib ikeny iye gatab ke, win ket tendenindam da, 'Ma sobijog pemb e namb tainy.' Si ita ket yit ririrind tawik. ⁵⁶Gim ke b'ogil aji ngor wa negir mile riga! Ra win gowind dide wubind gasa yir ongong teyenindam, si win ita naska kana wumir okatenya da ridede wip i gou ake wub tebnya. Aji ridede paim win maka wumir ainindam ongwatenam onggityam yunim win gatab?"

Moina Geja Riga kima Rigariga Aina

(Mat 5:25-26)

⁵⁷"I kwa nangga paim win maka walenggyam isagika eyenindam nanggamog e negir kesa dimdimjog mile omniam? ⁵⁸Si ra man mor geja riga kima yipand menon okasi majistretim pilwa kot omniam, si nyawind mada b'ogla iror tauket kot awir onnam dide rigariga awowim ton kima. Aji man maka ra odede omniket, ton ke men igonyigony mei de b'isagika rigam pilwa, i onggit b'isagika rigat ket men motramis sibibmet yir ipka riga yim wa, i dide onggit sibibmet yir ipka rigat ket men isanikesa mitigarik sibibmet wa. ⁵⁹Si Kon men motinyin da si man ma ita sibibmet ke topenjit, aji idenata ra man kikitumjog wulkip oramisit sibibmet mira undwatam."

Nonony Yitkak Negir Mile ke Engendam

13 ¹I onggit winind ninda riga kea dikind wekenonj, i ton ket Yesund wumir yomneno ninda Galili riga wa gatab yaina kus na re Pilato eslekinonj towaina si b'angga kima. ²Si Yesu ten amninonj da, "Ma win ija im nony ainindam da onggityam ninda Galili riga re ukoi jog negir mile riga im, aji ton ma ija im opi re komkesa Galili riga re dide, mop nokip ton

odede negirjog wip kenaemb uj yokateno? ³Kon wen tamninyin da nayi, aji wida kwa opima komkesa odede wip ke negir taukindam dem, ra win maka negir mile ke b'etngenjindam Godim pilwa. ⁴I kwa win wumir im onggityam eitn (18) riga yena re Silowam taun yir ipkapu pumbpumb metit epmikinonj uj tama na. Ma win ija im nony ainindam da ton re ukoijog negir mile riga im, aji ton ma ija im opi re komkesa riga yepim re wekeny de Yerusalem taunind? ⁵Kon wen tamninyin da nayi, aji wida kwa b'ogla komkesa odede wip ke negir taukindam dem, ra win maka negir mile ke b'etngenjindam Godim pilwa.”

Kip kesa Pig Wul gatab Tendam Yit

⁶I Yesu kwa onggityam tendam yit usekawonj da, “Yipa rigam yipa pig wul itliti yibnawonj tina greip sopapund, i ton ket yikonj onggityam pig wul mop wa, dide pig kip yirik yindamkenenonj, aji ton ma kip na yodarenenonj. ⁷Si ton onggit greip sopapu yir ipka rigand yomnonj da, ‘Wii, kon nowa kemag kima na pop nekenyimin onggityam pig wul mop wa, dide pig kip yirik yindamkenenyimin, aji kon makwa ngai kip yodarkenenyimin. Si nangga pae jaba onggit wulit jabakipind gou yesomneneny? Si onggit paemb man ket yige onggityam pig wul!’ ⁸Aji onggit sopapu yir ipka rigat ti yonggyamind yismonggawonj da, ‘Kor yonggyam! Mabe ngai onggityam pig wul nangg yirare b'usaya kwa onggityam yipa kemag kima! Mabe kon kwa b'obogil kibir omnika yeyenin sal omniam. ⁹Si kon wumir en ita kip tijagik dem sisil kemagind. Aji maka ra dem, man iget-a dem.’”

Yesu Kopa Kongga Wisakendonj Ju Riga waina Wiram dide Yir Opmitena Bibirind

¹⁰I yipa Ju riga waina wiram dide yir opmitena bibirind, Yesu riga ouyaena eyeninonj yipa Ju riga waina yir opmitenapu metind. ¹¹I demb de yipa kongga wibnonj yena re negir wingawingat okati wowamenenonj eitn (18) kemag kima. Si ton odede penaemb kopap b'imanti wibnenenonj dide ma ririr na aukenenonj mudakak kau b'itnikam. ¹²I re Yesu tin yir wongonj, Ton ket tin ara wemokonj, i ket tin pitapita womnonj da, “Kongga! Man kemb moina kopa ke b'isakenjit.” ¹³Ngirpu ket Ton ti kumbind yim aramisisonj. Si odenja ket ton kau b'itnikonj, i ket Godind yewangayonj. ¹⁴Aji Ju riga waina yir opmitenapu met mopyam rigat ma sobijog na soro awonj, mop nokip Yesu kopa kongga wisakendonj re towaina wiram dide yir opmitena bibir nat. Si ton riga bobo yit etainonj da, “Siks (6) bibir opi re meranim wiko mim. Si onggit paemb win b'ogla kopa ke b'isakendam tuwenenyit onggit bibir wingirind. Aji goro meraina wiram dide yir opmitena bibirind!” ¹⁵Si Yonggyam ket tin mira yomnonj da, “Gim ke b'ogil aji ngor wa negir mile riga, si ringma, wa wingirind yipayipa rigap towaina kau o dongki

kai itreka eyenenanj towaina kara bora ke dide bod wa eyenenanj nyi onaikam meraina wiram dide yir opmitena bibirind? ¹⁶Aji onggityam kongga re Abraamimna kus ke b'iga o, dide itomb ji kongga Satanat tin ijobiki wowamenenonj kupka eitini (18) kemag kima. Si ringma, ma ririrjog e tin itrekam onggityam Satanamna ijobikim pilke onggityam meraina wiram dide yir opmitena bibirind?" ¹⁷I re Yesu onggityam yit yopulitonj, komkesa rigap yepiya re Tinim geja riga de wekenonj, ingar na aukito, aji komkesa riga daka re ma sobijog na sam aukito komkesa b'ogil inyomarena kima gasa gatab rina re Yesum pilke aukito.

God ma Pumb Tungg gatab Tendam Yit

(Mat 13:31-33; Mak 4:30-32)

¹⁸Si Yesu yindonj da, "Nangga gasa e God ma pumb tungg kima yipa wip? Dide nanggamog gasa pila e Kon God ma pumb tungg yipa ririrkip otonainyin? ¹⁹Si God ma pumb tungg re yipa wip e odede it re mastad tuny re dide rina re yipa rigat yokatonj i ket yitlitonj tinajog ingkind. Si onggityam nangg owinyitonj i ket bia peago b'iskokonj, ngirpu pumbind ngenap onggit wul bia kumb nata met orangka eyento." ²⁰I Ton ket b'usaya yindonj da, "Nanggamog gasa pila e Kon God ma pumb tungg yipa ririrkip otonainyin? ²¹Si God ma pumb tungg re yipa wip e odede yist kima rina re yipa konggat yokatonj dide ket yipa ukoi baiko plawa kima yimikonj dampam, ngirpu kupkakupka dampa yinikonj dide yudburenonj."

Sobijogjog Mora

(Mat 7:13-14, 21-23)

²²I re Yesu menon yokatonj Yerusalem taun wa, Ton kea nyatnyata yikenonj taun nata dide tungg nata, dide ket riga ouyaena eyeninonj. ²³Ngirpu ket yipa rigat Tin yigekitonj da, "Kor Yonggyam! Rika ma jog rigapim yirkokar yokatenyi?" I Yesu ket riga amninonj da, ²⁴"Kon wen tamninyin. Win b'ogla danda yondratena sobijogjog mora nata b'igarenam, mop nokip jogjog rigap opima yirik unjomkena yiyenyi b'igarenam, aji towanim re ma ririr e b'igarenam. ²⁵Mop nokip ra met yonggyam tutnik dide mora islongkis, si onggit kak ke yepiya ra win bau ke owinki tekenyit mora odounenand, win pop igekenya da, 'Yonggyam! Be sowa mora yijge!' I ton ket ija im wen mira tamniny da, 'Win ringkaim? Kon ma wumir en wanim.' ²⁶I onggit winind, win ija im tendenindam da, 'Sin ke pop man kima diyam aukenentondam dide nyi anaikenentondam. I dide man kea sin kima mekenenot dide nouyaeneninot nya nata.' ²⁷Aji ton wen tesmonggainy dem da, 'Win ringkaim? Kon ma wumir en wanim. Win komkesa negirjog kaokao mile riga, ewaikisinam kor pilke!' ²⁸I ra yipa win ik dem, win opima yir tangindam dem Abraam i Isak i Yakob i dide

komkesa bageyam God ma pumb tunggind, aji win ra bau wa im tekenyit dem. Si demb de bau ke win opima yii kamil b'itiyoindam dem, dide kopa b'angnena kima or b'itiinikindam dem. ²⁹I komkesa gowukoyind riga opima tuweny dem ile gatab ke dide kemag gatab ke, i bargubo gatab ke dide iye gatab ke, i ket God ten tamisiny dem diyamdiyamim Tina pumb tunggind. ³⁰Si yir de, yepim re yu sobijogjog nyi riga opima yimta ke ukoijog nyi riga taukanj dem, i dide kwa yepim re yu ukoijog nyi riga opima yimta ke sobijogjog nyi riga taukanj dem.”

Yesu ma Gar Kopa Yerusalem gatab

(Mat 23:37-39)

³¹I onggit yipaina winind, ninda Parisai riga tuwonj Yesum pilwa, dide Tin wumir yomno da, “Man ewaikite, i ingkek menon yokate b'enga gatab wa, mop nokip Erod singi e Men ongandam!” ³²I Yesu ten amninonj da, “Win wuwe ti pilwa! I onggit rabem b'amnenayam sobijog di yongg pila rigand omnya da yu dide mep opima Kon negir wingawinga teaukeninyin dide kopa ke riga tesakenjinyin. I ket nowam bibirind Kon ita onggityam ril ririrkip omnyin nangga mana re Kon netkond dikind onggit gowukoyind. ³³Aji Kon b'ogla menon yakatin yu i mep i dide mep da mep, mop nokip itemb re makwa ririrjog e bageyam uj okas Yerusalem taun bau ke. ³⁴Oo! Yerusalem, Yerusalem! Yete re man bageyam uj ondrika eyeninyit, i opimemb riga gimo ke uj ondrika eyeninyit yena re God etmikeniny mor pilwa. Leamogpyam na Kon singi miyenyimim mor b'iga yipand kupokupo omnam odede ringmim ra mogyam paurot tinajog b'iga tama ke tuwopinsiny. Aji man singi kesa na aukenenyimit. ³⁵Yir de, waina met Yonggyam God ita wen terariny dem, si waina met ra ket kak e ibim dem. Kon wen tamninyin da win makwa ita ket Ken b'usaya yir notngya dem, ngirpu ra win tendenindam dem da, ‘God ma b'ogil Ton kima yete re Yonggyamimna nyi kima ik.’ ”

Kopa Riga Isakendam Ju Riga waina Wiram dide Yir Opmitena Bibirind

14 ¹I yipa Ju riga waina wiram dide yir opmitena bibirind re Yesu b'igaronj yipa Parisai mopyamimna met wa diyam awowim, rigap Yesund wuswus yir ipka yiyeno. ²I demb de yipa kopa riga yibnonj yaina yim ake pis re uboubo na wekenonj. ³Si Yesu gog yit wumirjog riga dide Parisai riga egekisinonj da, “Ringma, ma b'ogiljog e tainy kopa riga isakendam meraina wiram dide yir opmitena bibirind?” ⁴Aji ton re mumakesa na wekenonj. Si Yesu onggit kopa rigand yokatonj dide ket tin yisakendonj, ngirpu ket tin yitmikitonj. ⁵Seg Ton ten ramnin da, “Ra wa wingirind yipa rigamna b'iga o kau nyi kip wa tunykis meraina wiram dide yir opmitena bibirind, si ma ton idenata e tin oblenj nyi kip ke?” ⁶Si ton makwa ririr na auto mira yit opulitam.

Diyamdiyampund Ouyaena

7I re Yesu ingauki riga wa mile yir angawonj b'isnawa kima pipmet imdand, Ton onggit ingauki riga wa yipa tendam yit usekawonj odede da, 8“Ra man ya met wa obayim meket sisil molkongga omna diyamdiyampu wa, goro man b'isnawa kima pipmet okatim. Mop nokip ra met yonggyamit obai taminy men dide yipa ukoijog isnawa kima riga yaina isnawa re ma ija e it re mor re dide, 9i ra met yonggyam ik wa pilwa dide men motiny da, ‘Man ti yokae itemb isnawa kima pipmet,’ si onggit win natemb man ket ingar kima isnawa kesa goujog pipmet wa omitam meket. 10Aji ra man obayim meket, man b'ogla isnawa kesa goujog pipmet okasit. Mop nokip idenat met yonggyam yete re obai mominy, ik mor pilwa, dide men isnawa kima motiny da, ‘Kor riga! Nangga pae man onggit isnawa kesa goujog pipmetind omisit? Utnyite! Ade meke de isnawa kima pipmet wa omitam!’ Si onggit win natemb esourena mile pita tainy mor pilind komkesa man kima omi ingauki riga wa wipind. 11Mop nokip yet ra tilenggyam pumb wa b'utuwateny, God ita tin gou wa ominy. I kwa yet ra tilenggyam gou wa aena ikeny, God ita tin pumb wa uwateny.” 12Seg ket Yesu met yonggyamind yomnonj da, “Ra man diyam o uko i owou omniket diyamidamim, goro moina riga tengaukindam, i goro mor nany dide yingganwar, i goro mor kus ke dide kom ke wuswus riga, i dide goro mor met wuswus riga yepim re jogjog gasa kima wekeny. Ra man ten obai tamneninyit, todaka opima mira obai motinenyi. Si man re kemb mira yokasit. 13Aji ra man owou omniket diyamdiyamim, man b'ogla obai tamneninyit gasa kesa riga i kobkob riga i gomgom riga i dide yirdidi riga. 14Ra man odede mile omniket, God ma b'ogil re ita man kima, mop nokip ton ma ririr im men mira obai motinenyi. Aji idenate dem God mira motiny, ra Ton negir kesa dimdimjog riga tutnikiny dem.”

God ma Pumb Tungg Diyamdiyam gatab Yit

(Mat 22:1-10)

15I re onggit met obai riga wa wingirind yipa riga onggityam yit utkundonj, ton ket Yesund yomnonj da, “God ma b'ogil onggit rigam pilwa yet ra diyam tainy dem God ma pumb tunggind.” 16Aji Yesu tin yismonggawonj da, “Yipa rigat uko i owou yomnikonj diyamdiyamim, si ton re jogjog riga na obayim engaukinonj. 17I re onggit diyamdiyam win awonj, ton ket tina wiko riga yitmikitonj ten wumir omnam yena re ton obayim engaukinonj da, 'Win ket menonim! Komkesa gasa re ke ongonjeni im.’ 18Aji komkesa riga yipa wip opurena ke ognento da, ‘Sin ma ririr im menonim.’ Si naskanyamit tin yomnonj da, ‘Wii, kear nomne! Kon ke yipa gou kipol yokasin. Si kon amaemb neken onggit gou kipol

yir ongongim.’¹⁹ I kwa yipat yomnonj da, ‘Wii, ukoi kear. Kon ke ten (10) kau akasinyin wiko omniam. Si kon towaina wiko otonkena ma neken. Si kear nomne!’²⁰ I dide kwa yipat yomnonj da, ‘Kon yu nat kongga kima aen. Si onggit paemb kon ma ririr e neken.’²¹ Seg ket onggit wiko rigat itendonj ti yonggyamim pilwa, i ket wumir yomnenonj opimemb towaina mira gatab. Si onggit winind, met yonggyam ma sobijog na soro awonj, dide ket tina wiko rigand yomnonj da, ‘Otade man metkenyit ukoi nya nata i sobijog nya nata onggit taun wingirind. I man ket teyeninyit gasa kesa riga i kobkob riga i yirdidi riga i dide gomgom riga.’²² Re ket seg wiko rigat ket ti yonggyamind yomnonj da, ‘Yonggyam! Kon kea moina b'ingawa yit ririrind amnikinyimin, aji pipmet re opima komb omitam.’²³ I yonggyam ket ti wiko rigand yomnonj da, ‘Mekene nya nata i wungawungapu tungg nata onggit taun bau ke! I riga danda kima ugongnena teyeninyit iyenam, nokim da idenat koina met yindangir tainy!²⁴ Mop nokip kon wen wumir tamninyin da onggit riga wa wingirind yena re kon engaukinond, towa wingirind makwa ita yipat owou met otonkis dem koina diyamdiyampund.’ ”

Yesu ma B'auyaena Riga Awowim Bebig

(Mat 10:37-38)

²⁵ I re ukoi riga bobo Yesu kima yipand menon yokato, Ton ket towa pilwa wip engendonj dide amninonj da,²⁶ “Yet ra Kor pilwa ik Koina b'auyaena riga awowim, ton b'ogla Ken kupkakupka singi nitiyeny. Aji ra ton tinajog b'u ake mog i ti kongga dide ti b'igawar i dide ti nany dide yingganwar singi teyeniny, i dide kwa ra ton tinajog yirkokar ukoi kana singi iyeny, ton makwa ririr e Koina b'auyaena riga awowim.²⁷ I kwa yet ra maka komkesa tinajog bebig takasiny Godim wikond odede ringma ra rigat tina wul b'agbag urowas ujim dide maka ra Ken yimta nutundok, ton makwa ririr e Koina b'auyaena riga awowim.²⁸ Ra wa wingirind yipa riga singi tainy pumbpumb met orangam, ringma, ma awir e ton naska tomis isamkam dide mira wulkip ogenka teyeniny nokim da rika ti ririr im wulkip onggit met undwatam?²⁹ I maka ra ton onggityam mile omniam, ton ririr e rorte nena itot teyeniny. I ra tinim maka ra ririr tainy met undwatam, komkesa rigap yepiya ra yir ongong iyeny itemb kombkomb met, ton ma sobijog yitkar kima e tin ngong engena iyeny.³⁰ I rigap ija emb ket omneny da, ‘Onggit rigat ke pop met oranga yotomonj, aji ti ma ririr na undwatam.’³¹ O ra yipa king menon okas kwa yipa king kima geja b'iyenam, ringma, ma awir e ton naska tomis ninda tina geja mopyam kima, dide ton kima yit igleneny, nokim da rika tina ten tausin (10,000) geja riga wa ita danda wip owarkitam opimemb twenti tausin (20,000) geja riga yepim re tinim gejam tui?³² Aji rada ton ma ririr e yir b'ang wip owarkitam ton kima gejayam king yete

re paja wa yibim, si onggit win natemb ton ninda bageyam tetmikisiny yit iyenam ngimbla omniam. ³³Si onggit paemb odede yipa wip nya ke, win b'ogla terarkindam komkesa wainajog gasa Koina b'auyaena riga awowim. Aji maka ra, win makwa ririr im Koina b'auyaena riga taukindam.

Met kesa Sol gatab Tendam Yit

(*Mat 5:13; Mak 9:50*)

³⁴“Sol re b'ogil gasa e. Aji ra sol solmet kesa tainy, si ridede nya kae solmet kwa b'usaya titenj? ³⁵Onggityam met kesa sol re ma ririr e ingawam gou sal omniam dide side b'ogil sal omniam. Si rigap opima onggityam met kesa sol b'iskokenenanj.¹ Yete re man wingawinga ke yipya kima, man utkunde!”

B'edamkiti Mamoi gatab Tendam Yit

(*Mat 18:12-14*)

15 ¹I yipa winind, komkesa teks imdayam riga dide negir mileyam riga tuwonj Yesum wuswus wa Tina yitkak utkundam. ²Si Parisai riga dide Ju riga waina gog ouyaena riga yit b'ebongnento odede yit kima da, “Onggit Rigat negir mileyam riga im simesime amneniny dide ton kima yipand diyam ainy.” ³Si Yesu towa usekawonj onggityam tendam yit da, ⁴“Rada wa wingirind yipa rigam ibnainy wan andred (100) mamoi, i yipa mamoi b'etidamkis, ringma, ma ton awir im nainti nain (99) mamoi dikinda wul kesa tunggind yiyag tatkulisiny dide oraka iyeny itemb yipa b'edamkiti mamoi ngirpu ra ket ton odar? ⁵I ra ton ket odar, ton ket ma sobijog sam kima e onggit mamoyind tina pokirind b'itangis ⁶dide ket yii de met wa, i dide ket ti rigawar dide ti wuswusam riga ara teainy, i ngirpu ten tamniny da, ‘Win kon kima sam yomnika, mop nokip kon kemb ji koina b'edamkiti mamoi yodaren.’ ⁷Kon wen wumir tamninyin da, ‘Ra yipa negir mileyam riga tengenj tina negir mile ke Godim pilwa, God odede yipa wip nya kaemb ukoijog sam omnik pumb tunggind, aji ma Ton odede sam e yomnikeny negir kesa dimdimjog nainti nain (99) riga kima re dide yamim re awir negir mile Godim pilwa engendam.’

B'edamkiti Silba Koin gatab Tendam Yit

⁸“I ra yipa konggam ten (10) silba koin^m ongapi tibnainy, i ket yipa koin b'etidamkis, ringma, ma ton ita lampa enyoras, i met isagika iyeny, i dide

¹ 14:35 Onggit eriyand sol re gimo bora nat wekenenanj. Si ra sol gimo nyi wa isongg, solmet topekanj onggit sol gimom pilke, i itemb sol gimo tainy ra met kesa gimo nena e ket. ^m 15:8 Grik pebanda “Drakma”. I yipa Drakma re yipa riga ma yipa bibir wiko mira na.

b'obogil kana oraka iyeny itemb koin ngirpu ra ket ton odar? ⁹I ra ton ket odar, ton ket ti rigawar dide ti wuswusam riga ara teainy odede yit kima da, 'Win kon kima sam yomnika, mop nokip kon kemb ji onggityam koina b'edamkiti silba koin yodaren!' ¹⁰Kon wen wumir tamninyin da, 'God odede yipa wip nya kaemb Tina aneru wa wipind ukoi sam omnik, ra yipa negir mileyam tina negir mile ke tengenj Ti pilwa.' "

B'edamkiti B'iga gatab Tendam Yit

¹¹I dide Yesu kwa yipa tendam yit usekawonj da, "Yipa rigam yibnawonj re ti nimog riga b'iga na. ¹²I yingganyam b'igat ti b'und yomnonj da, 'Abu! Kor nogoninem gasa rinsim re kor wulpok wekeny owabintam!' Si ti b'u ket tina gasa ti b'iga nimog wa ekalkainonj. ¹³I ingkek ket yingganyam b'iga ma jog bibir na yibnonj, aji ton kea ninda gasa asoginonj dide ket komkesa tina gasa atabikinonj iyoyim. I dide ton ket paja tungg wa menon yokatonj ngirpu opimemb tina gasa esomnena eyeninonj tina nenegir kana wimenand. ¹⁴I re ton tina gasa komkesa esomnena seg amninonj, onggit eriyand ukoi jog sou aukonj. Si idenatemb ket ton pajogind awonj. ¹⁵Si ton ket yikonj yipa rigam pilwa yet re yipa taunind yibnonj onggit eriya wingirind, dide ket ti pilwa b'ausikonj, ngirpu ket onggit met yonggyamit tin yitmikitonj tina sopapu tungg wa b'om ongenam. ¹⁶I ton re ma sobijog na owoupa yibnonj, si ton ket singi aukenonj gujo puka ke ngor awowim rina re b'omip awenento, aji makwa ngai yipa rigat ti yokawonj owowim. ¹⁷Si ton tilenggyam ti nony mana yindonj da, 'Kor b'uim jogjog im namb ti mira kima wiko riga yepim re owou oraka kesand wekeny, aji it re dikind ke kon ukoi jog owoupa map uj rawin. ¹⁸Si kon tutnyisin, i neken kor b'uim tungg wa, i dide ket tin omnyin odede da, "Abu! Kon kea negir mile yomnikond wub kumb rigam pilwa dide mor pilwa. ¹⁹Si kon re ma ririrkipjog riga en moina b'iga ogenayam. Si man ken yipa mira kima wiko riga pila notinyit." ' ²⁰Seg ton ket utnyitonj dide ket ti b'u re menon yokatonj. I re ton paja tungg ke ikonj ti b'uim pilwa, ti b'u kea tin pajapaja yir yongonj, dide tin ma sobijog na gar ke kear yomnonj. Si ton b'ikonj ti b'igam pilwa dide yim ke tin yogawintonj kunand, ngirpu ket tin yomongnenonj. ²¹I ti b'iga ti b'und yomnonj da, 'Abu! Kon kea negir mile yomnikond wub kumb rigam pilwa dide mor pilwa. Si kon re ma ririrkipjog riga en moina b'iga ogenayam.' ²²Aji ti b'u ket tina wiko riga amninonj da, 'Wanaka, win b'ogiljogyam pinpin kobirgim itiyawa, i ket tin yikita! I ringi tina ekakind yikita, dide yonginkak tina pisind yikoka! ²³I gayagaya kau b'iga iya dide onganjya. Si men diyamdiyam im taindam, dide ukoi sam omniku. ²⁴Mop nokip itemb koina b'iga re uj wingir nat yibnyim, aji ton b'usaya kemb yilo yokas. Ton re b'edamkiti na yibnyim, aji yu ke openj.' Si ton ket mile yotomo sam kima.

²⁵ “Aji tina nanyamyam b'iga re sopapu wa na yibnonj. Si re ket ton itendonj met wa, i dikinda ket ton met wusind utkundenonj guglam rina re rigap ipaya gasa ara epaito dide omarkito met wingirind. ²⁶ I ket ton ara yiawonj yipa wiko riga, i dide ton yigekitonj da, ‘Nangga e awik?’ ²⁷ I ton ket tin yismonggawonj da, ‘Mor yingganit ik, i mor b'u ke yongandau yipa gayagaya kau b'iga sam omniam, mop nokip ton mor yingganind yokas re ma aengneni na.’ ²⁸ I ton ket ukoi soro na awonj, si ton b'isayonj met wingir wa b'igaram. Aji ti b'u met wingir ke opmarkitonj, dide ti b'igand ngimbla omnam yugowonj. ²⁹ Aji ti b'iga ti b'und mira yomnonj da, ‘Yir de, kon ma yipa kemag kima na b'asowa netkimin mornim wiko omniam, dide kon makwa ngai moina b'ingawa yit arbekeninyimin. Aji man makwa ngai yipa sobijog gout nokaumit, nokim da idenat kon sam omniam yipand kor rigawar kima. ³⁰ Aji re ji onggityam moina b'iga ik tungg wa, yet re yiyagiyag iyenapu kongga kima moina gasa asomneninonj, nangga pae man ket ti map gayagaya kau b'iga yonganjit?’ ³¹ Aji ti b'u tin yomnonj da, ‘Kor b'iga! Man re ita ita winind dikind kon kima, i komkesa koina gasa re mor mima. ³² Aji men b'ogla wibawiba taindam dide ukoi sam omniam, mop nokip itemb mor yinggan re uj wingir nat yibnyim, aji ton re ke yilo yokas. Ton re b'edamkiti na yibnyim, aji yu ke openj.’ ”

Met Yir Ipka Mopyam Wiko Riga gatab Tendam Yit

16 ¹ I Yesu ket Tina b'auyaena riga amninonj da, “Yipa jogjog gasa kima rigam re kea yipa met yir ipka mopyam wiko riga yibnawonj. I rigap onggit met yonggyamind wumir yomno odede da, ‘Onggit met yir ipka mopyam wiko rigasim asomneniny moina gasa.’ ² Si met yonggyam ket tin ara yemokonj, i yomnonj da, ‘Kon ke mor gatab yit utkunderinyin, si ridede na man odede mile yomniket? Si man kikitumam moina wiko gatab tagenkinyit rina re kon mingaenond omniam, mop nokip man ma ririr e ket b'usaya onggityam met yir ipka mopyam wiko riga mitibnyit.’ ³ Si onggit met yir ipka mopyam wiko rigat ti nony mana yindonj da, ‘Nangga e ket kon omniam, mop nokip kor yonggyam kanaemb ken onggityam met yir ipka mopyam wiko ke netwaikis? Kon ma naemb danda en sopapu wiko omniam, i kwa kon ingar en riga wa pilwa b'itenam. ⁴ Kon wumir en nangga e kon omniam kolenggyam yir b'ipkam, nokim da idenat ken rigap simesime notinenyi towaina met nata, ra kon onggit met yir ipka mopyam wiko ke tewaikisin.’ ⁵ Seg ton riga yipayipa ara emokinonj ya mana re abitoro gasa ebnauto ti yonggyamim pilwa, i ton ket naskanyam meni rigand yigekitonj da, ‘Leamog abitoro gasa im mor mibnainy kor yonggyamim itendam?’ ⁶ I ton ket mira yomnonj da, ‘Kor abitoro nibnainy re wan andred (100) olib gaya dramkak im tinim okawam.’ Si onggit mopyam wiko rigat ket tin

yomnonj da, 'Yokate moina abitoro peba, dide wanaka tomisit, i dide ket iriket pipti (50) dramkakim.' 7I kwa onggityam mopyam wiko rigat nimogim meni rigand yigekitonj da, 'Leamog abitoro gasa im modaka mibnainy itendam?' I ton ket tin mira yomnonj da, 'Wan andred (100) wit kip baiko im.' Si ton ket tin yomnonj da, 'Yokate moina abitoro peba, i iriket eiti (80) baikom.' 8I re met yonggyam utkundonj onggityam kaokao b'anyginena met yir ipka mopyam wiko rigamna mile, ton tin yesoulitonj, mop nokip ton b'ogil multekip kena wiko yomnikonj tilenggyam yir b'ipkam. Si onggit gowukoyimna kaokao mile rigap re odede b'ogil multekip kima im wiko omnika eyenanj towalenggyam yir b'ipkam. Aji ngayamna rigap towalenggyam yir b'ipkam wiko omnika eyenanj gowukoi wimena wingirind re ma odede b'ogiljog im opi re onggit gowukoyimna kaokao mile riga re dide. 9Si kon wen tamninyin. Win b'ogla onggityam gowukoi gasa tengaindam, dide ingkaimemb riga rigariga tamnenindam wanim yir b'ipkam. Nokim da idenat ton wen simesime tamnenanj dem de ngirpu kesa pipmet wa, ra dem onggityam gowukoi gasa wanim ingaena kesa taukanj dem. 10Yet ra sobijog gasa ingaenand nony ijai riga ibim, ton b'ogla jogjog gasa ingaenand kwa nony ijawa riga tainy. I yet ra sobijog gasa ingaenand kaokao b'anyginena mile riga ibim, ton b'ogla jogjog gasa ingaenand kwa kaokao b'anyginena mile riga tainy. 11Si onggit paemb ra win maka onggityam gowukoi gasa ingaenand nony ijai riga taukindam, si yete ket wen nony tejainy iminjog gasa ingaenam de pumb tungg wa? 12I ra win maka yipa rigamna gasa ingaenand nony ijai riga taukindam, yete ket wa tagoniny pumb tungg b'ogil gasa wainajogim owabintam? 13Makwa yipa met wiko rigat ririr e nimog yonggyam wa wiko tamnikainy. Mop nokip ton yama rika yipa yonggyamind singi kesa e omneny dide kwa yipa yonggyamind ra singi e iyeny, o ton yama rika yipa yonggyamind isnawa e iyeny, dide kwa ra yipa yonggyamind isnawa kesa e omneny. Si onggit paemb win ma ririr im wiko riga taukindam nimognimog, Godim dide onggit gowukoi gasam."

Parisai Riga wa Nonony Yitkak
(*Mat 5:31-32; 11:12-13; Mak 10:11-12*)

14I Parisai riga re wulkip singisingi riga na, si re ton onggityam komkesa yitkak utkudento, ton ma sobijog na Yesund ngong yengeno. 15Si Yesu ket ten amninonj da, "Win opi namb ji riga yepim re walenggyam riga wa wipind negir kesa dimdimjog riga nyi ke b'agenaindam. Aji God wumir e waina gar, mop nokip Ton soro kaim amneniny nanggamog im re rigap isnawa eyenanj gowukoi rigaina nony menamena nya ke. 16I God singi na da riga wimena tuweny gog yit dide bageyam waina iriki yitkak ririrind, ngirpu Yoan re wiko yotomonj.

Aji onggit kak ke God ma pumb tunggimna b'ogil yirkokar bage yit kea pitapita aena yikeny, si komkesa riga re danda e ondratena yiyeny b'igarenam. ¹⁷Aji itemb re wewa e wub ake gou b'eomnenam, aji gog yitim pilke makwa ita yipa iriki o yipa iriki mal b'eteomneny, itemb re bebíg e. ¹⁸Si yet ra ti konggand bondik tominy dide yipa b'enga konggand tokas ti konggam, si ton re gigir dide yigyig b'iyena mile e omnika yiyeny onggit sisil kongga kima. I daka yet ra onggit konggand tokas ti konggam yet re ti leond bondik yomnonj, todaka gigir dide yigyig b'iyena mile e omnika yiyeny onggit kongga kima.

Jogjog Gasa kima Riga dide Lajaro

¹⁹“I yipa jogjog gasa kima riga yibnonj, i ton b'ogil kuskus uwaluwal kobirgim dide otomanti ngimblakak kobirgim b'ikoki awamenenonj, i dide ton b'ogil wulkip darind ukoi sam kima yibnikenenonj. ²⁰Aji kea yipa gasa kesajog riga yibnonj nyi da Lajaro, si rigap re kea tin yoramiteneno onggityam jogjog gasa kima rigamna met mora dundand, nokip ton re jogjog wai ke ikangindi na yibnonj. ²¹I ton singi na da ngor okateny onggit jogjog gasa kima riga ma owou komb ke rina re ton b'iskokenenonj tina owoupu kasa kumb ke. Aji yongg kea kwa tina wai isenenam wuwenenonj. ²²Aji re ket gasa kesa riga uj awonj, i ket anerup yim titik yiyo pumb tungg wa de Abraamimna oskak kumb wa oramitam. I toda kwa kea onggit jogjog gasa kima riga uj awonj dide yeungito. ²³I re ton wul tungg wa ukoi b'idgotnenand yibnenonj, ton yir b'iskonj pumb wa, i kea ket pajapaja yir angonj Abraam dide Lajaro ti oskakind omi. ²⁴Si ton ket Abraamind ara yiawonj da, ‘Abu Abraam! Kear nomne-o! I man Lajarond yitmikite kor pilwa, nokim da idenat ton yim pumam petir nyi wa isongg dide koina weyatind oramis ngimbla omnam, mop nokip kon ma sobijog kopa b'angnena wingir nate nibnyin onggityam wul dimil borand.’ ²⁵Aji Abraam daka ket tin yismonggawonj da, ‘Kor b'iga! Man nony ae de re man akateninot b'ogil gasa moina yirkokar wimena wingirind de gowukoi wa, aji demb de Lajaro akateninonj re negirjog gasa na. Si ton ket yu b'ogil sam win e yokateny dikind, aji man re ukoi jog kopa b'angnena wingir nate nibnyit. ²⁶I ma onggityam gasa nena im, aji God kea yipa ukoi jog kuninkunin get yoramitonj sin dide win ganggand, nokim da idenat ton maka ririr taenanj opandenam yepiya ra singi taenanj ingkek ijendam de waina tab wa, i daka waina tab ke ijendam de sowaina tab wa.’ ²⁷Si ton ket Abraamind yomnonj da, ‘Abu! Ra odede ra, si kon men metirkisin da man b'ogla Lajarond itmikisit kor b'u ma met wa de gowukoi wa. ²⁸Mop nokip demb de kor opima paib (5) nany dide yingganwar. Si Lajaro b'ogla towanim pitapita ramnenain onggit wul tungg gatab, nokim da idenat toda kwa maka tui dem dikind onggit ukoi b'idgotnenapu pipmet wa.’ ²⁹Aji Abraam yismonggawonj da,

'Demb de opima Mosemna iriki yitkak dide bageyam waina iriki yitkak. Si ton inaemb rutkundeninem onggityam towaina yitkak.' ³⁰Aji todaka yomnonj da, 'Nayi, abu Abraam! Aji b'ogla ra yipa riga uj riga wa wingir ke yik towa pilwa, ton opima ket negir mile ke tengendanj de Godim pilwa.' ³¹Aji Abraam daka tin yomnonj da, 'Ra ton maka ra tutkundenanj Mosemna iriki yitkak dide bageyam waina iriki yitkak wa pilind, si nangga ma ji rada yipa riga uj ke tutnyis, ton makwa opima gar ke utkunda ke takatenanj tina yitkak.' "

B'auyaena Riga ma Mile Omnika gatab Ouyaena

(*Mat 18:6-7, 21-22; Mak 9:42*)

17 ¹I Yesu Tina b'auyaena riga amninonj da, "Opima onggityam mile tui rinsim ra negir mile omnika riga tatonkenanj. Aji God ma sake ita onggit rigam pilind yet ra odede mile tamnikiny. ²Si itemb re b'ogiljog e tinim, rako rigap tina kunakakind ukoi gimo danda kima yijobiko kai ke dide yisko ukoi sipa nyi bora wa ujim, aji itemb re ma b'ogiljog e, rako ton onggit sobijog riga wa wingirind yipa rigand negir mile omnika yingawonj. ³Si win walenggyam yir b'ipkinam! Rada yipa moina gar ke utkunda nanyit o yingganit negir mile omnika, tin samany iyowet. I ra ton tina negir mile ke tengenj Godim pilwa, man b'ogla tina negir mile awir omnainyit. ⁴I ra ton yipa bibirind sebenpyam negir mile tamnikiny mor pilwa, dide kwa sebenpyam mor pilwa titendeny men omnika da, 'Kon ke negir mile ke engenjin Godim pilwa, si koina negir mile awir nomnaine,' si man b'ogla tina negir mile awir omnikaenenyit."

⁵Si itmikitijog rigap ket Yonggyamind yomno da, "Sowaina gar ke utkunda b'usaya pinjog amnine!" ⁶I Yonggyam ket ten amninonj da, "Ra wa odede sobijog gar ke utkunda tebnainy mastad tuny re dide, si win ririr im onggityam manggo wulind omnya da, 'Man ap kima b'uromate, dide b'itlisit de sipand'. I ton ita wen yit tutkunjinjny."

⁷"Rada wa wingirind yipa rigam yipa wiko riga ibnau, i ra ton gou oska iyeny o mamoi yir ipka teyeniny, si ra ket ton sopapu ke titenij met wa, ringma, ita ti yonggyam tin ominy da, 'Otade, metkim, i omite diyam awowim!?' ⁸Nayi, ma ija e. Si ringma, ma awir e tin ominy da, 'Man be nanggamog owou na ngai nongonjenae diyam awowim, i man ija na b'obogil b'angonjeni yir netngenj it ngirpu ra kon owou dide onaya seg taen, i onggit seg ke toko madaka owou yowe dide nyi yonae!?' ⁹I ita ti yonggyam ti wiko rigand siteket yit ominy, nokip ton kea tina b'ingawa ririrind gasa amnikiny? ¹⁰I wida kwa b'ogla odede yipa wip mile tamnikindam. Si ra win komkesa gasa tamnikindam rina re wen wa Yonggyam engaeninonj omnika, si win b'ogla tendenindam da, 'Sin re esourena kesa wiko riga im, aji sin insima amnikindam wiko rinsim re sin b'ogla omnika.' "

Ten Leprosi Kopa Riga Isakendam

¹¹I re Yesu menon yokatonj Yerusalem taun wa, Ton yikonj re Samariya eriya dide Galili eriya inyiny gangga nat.

¹²I re Yesu sisil b'igaram awonj yipa tungg wa, nyawind ten (10) leprosi kopa rigap kea Tin paja ke yir yongo, i dikinda ta owinkito. ¹³Seg ton b'okta ara wuvenonj da, "Ukoyam Yesu-wii! Sin kear nomninem-o!" ¹⁴I re Yesu ten yir anginonj, Ton ten amninonj da, "Win wuwe waina ji ouyawam de yina si riga wa pilwa!" Si re ton ket menon yokato, nyawind ton kea kilkip kesa aukito. ¹⁵Aji onggit ten (10) riga wa wingirind, re yipa rigat ton b'isakendi yir b'angonj, ton ket Godind ma sobijog na auwam kima esourena yiyonj, ngirpu ket itendonj Yesum pilwa. ¹⁶Seg ton ukoi isnawa kima Yesum wipind sap otendonj Tin siteket yit omnena kima. I ton re Samariya riga na. ¹⁷Si Yesu samany kima yindonj da, "Ma komkesa ten (10) riga na kilkip kesa auranj? Ropim daka onggityam nain (9) kombyam riga? ¹⁸Ringma, ma onggityam Samariya kus riga nenat itenj Godind esourenam, i siteket yit yomnony?" ¹⁹I Yesu ket tin yomnonj da, "Utnyite, i meke! Moina gar ke utkundang kemb yirkokar mor mokau."

God ma pumb tungg Menon gatab Yit

(Mat 24:23-28, 37-41)

²⁰I ninda Parisai rigap Yesund yerkitito da, "Rie God ma pumb tungg ik?" Si Yesu daka ten ket mira amninonj da, "God ma pumb tungg ik ra ma odede nya kae rija im re rigap gasa yir ongong eyenanj towaina yirkip ke. ²¹I rigap ma ririr im odede tapurenanj da, 'Yir de ite ta God ma pumb tungg' o 'Yir de ama ta pumb tungg,' mop nokip God ma pumb tungg re wa wingir nate yibim."

²²I Ton ket Tina b'auyaena riga amninonj da, "Win singi ainindam wanaka onggityam bibir yir ongongim Rigamna B'iga ma bibir wingirind. Onggityam win ita ji ik dem, aji win ma ita yir ongya dem waina yirkip ke. ²³I rigap opima wen tamnenanj dem da, 'Yir de, ama ta Ton!' o 'Yir de ite ta Ton!' Aji win goro towaina yit gar ke takateninam dem, i goro towa pilwa tuwenim, i dide goro ten yimta tundoneninam dem! ²⁴Mop nokip ra Rigamna B'iga titenj Tina bibirind, Ton ija e wip tainy dem ringma re waral opngindeneny yipa wub gatab ke de kwa yipa gatab wa, si rigap ririr e tina inyomarena pitand yipapyam yir ongong iyeniy dem. ²⁵Aji Ton b'ogla naska jogjog b'idgotnena rakasin dide riga wa pilke b'isaya yakaten yepim re yu wekeny onggit gowukoyind. ²⁶Si ra Rigamna B'iga titenj Tina bibirind, si ija ima mile taukanj dem rija na re mile aukito Nowam winind. ²⁷Si Nowam winind riga odede mile nat wekenonj opi re owowind i onaikand i kongga imdand i dide leo imdand, ngirpu onggit bibirind re Nowa giga wa b'igaronj. I ingkek ket ngiwir

ikonj dide ket komkesa riga negir amnikinonj. ²⁸I kwa Rigamna B'iga ma bibir wingirind ija ima ji mile taukanj dem odede yipa wip rija na re mile aukito Lotimna bibir wingirind re dide. Lotimna winind riga odede mile nat wekenonj opi re owowind i onaikand i gasa imdand i gasa b'asogand i nangg itotind i dide met orangand. ²⁹Aji onggit bibirind re Lot Sodom taun yiraronj, wul dimil dide masis pila singba kima negir guda kima gasa salpa gimo ngindngind kana piro pila isokto wub kumb ke, ngirpu ket komkesa riga negir amnikinonj. ³⁰Si odede wip imemb mile taukanj onggit bibirind ridenat ra Rigamna B'iga pita tainy dem. ³¹Si onggit bibirind yet ra ton ibim wimenam met papkak kumbind, si rada tina gasa met wingir wa im tekeny, ton goro kwa rapin dem onggityam gasa imdam. Aji ton wanakana b'ek dem. I kwa odede yipa wip nya ke yet ra ibim dem sopapund, toda goro kwa ritend dem met wa tina gasa imdam. Aji ton wanakana b'ek dem. ³²Si win nonyik b'amjina Lotimna kongga gatab! ³³I yet ra tilenggyam yirkokar yirgong omnika iyeny, ton ita onggityam tina yirkokar dadal edamkis dem. Aji yet ra tina yirkokar edamkis, ton ita tina yirkokar yilom ominy dem. ³⁴Kon wen wumir tamninyin. Onggit siwinyind ra nimog riga yipaina darind gilgil tegya dem, God yipand ita yii dem pumb wa, i daka yipand indama irar dem. ³⁵I kwa ra nimog kongga yipand sana ikmikand tebnya dem, God yipand ita wii dem de pumb wa, i daka yipand indama tirar dem.” ³⁶(Awir e)ⁿ

³⁷I Yesumna b'auyaena rigap Tin yerkitu da, “Yonggyam! Rokateb ji onggityam mile tawik dem?” I Ton ten kikitum b'isagika gatab tendam yit ke amninonj da, “Rokate ra ujjim ibim, yimbyak toda indamima bobo taukanj.”

Mik Kongga dide B'isagika Riga gatab Tendam Yit

18 ¹I Yesu Tina b'auyaena riga tendam yit ke amninonj, nokim da idenat ton ita winind yir topmitenenanj, i idenat kwa maka gar ke utkundand danda kesa taukenenanj. ²“Yipa taunind yipa b'isagika riga yibnonj yet re maka Godind moga yuwadenenanj dide maka riga esnaeneninonj. ³I kea de yipa mik kongga wibnonj onggit taunind, i ton kea siram b'irari kesa onggit b'isagika rigand erkenam yopenenanj odede yit kima da, ‘Koina geja rigat kaokao nya kae negir nomneneny. Si man yim nokae, i kor bebig awir nomnae!’ ⁴Aji ton kea naska ninda winind b'isaenenonj onggityam mikimna b'arkita gatab. Aji kikitumpu wa ton ket ti nony mana yindonj da, ‘Kon ma ita Godind moga yuwadenenyin dide kwa kon ma opima riga esnaeneninyin. ⁵Aji onggit mik konggato ken siram b'irari

ⁿ 17:36 Ninda Grik peband da [I dide kwa ra nimog riga yipaina sopapund gilgil waland tebnya dem, yipand ita yii dem de pumb wa, i daka yipand indama irar dem.]

kesa b'ogil wimenand nisakaureny. Si mobe kon b'ogla tina bebig awir omnam dimdim wamnikawin. Nokim da idenat ton maka tina siram b'irari kesa menimenip gim dinderkak notinkeneny.'” ⁶I kwa Yonggyam yindonj da, “Win utkundam nanggamog e re onggit kaokao b'isagika rigat yindeny. ⁷Si ringma, ma ita God Tina obagiki rigaina bebig awir omnam gasa dimdim tamnikainy yepiya ra ita bibir dide siwiny nyi uwatenenyi? I ringma, ma ita Ton wanaka ten mira tamniny? ⁸Kon nitinjin da God opima wanakana ten mira tamniny. Aji ra Rigamna B'iga titenj dem, rika Ton ririr e odaram odede wip gar ke utkunda mile onggit gowukoyind? Nayi, ma ita.”

Parisai Riga dide Teks Imdayam Riga Towaina Yir Opmita

⁹Aji daka Yesu ninda riga tendam yit ke amninonj yepiya re towalenggyam iminjog aento da ton re negir kesa dimdimjog riga im, dide kwa riga yirik esaenento. ¹⁰“Nimog riga ekonda yinamet wa yir opmitam, yipa re Parisai riga na i yipa kwa re teks imdayam riga na. ¹¹I onggit Parisai rigat tinta pipmet wa onyitonj, i ket odede yir opmitonj da, ‘God! Kon Men siteket yit momnyin nokip kon ma odede riga en opi re ninda riga re dide, raskol riga, kaokao negir mile riga, gigir dide yigyig b'iyena riga, o kwa ite odede teks imdayam riga. ¹²I kon kwa owou uwabika win yokatenenyin re nimogpyam i ita sande wingirind. I dide kwa kon ita ket ten (10) bobond akalkeneninyin komkesa gasa rinsim re kon akateneninyin, i Mornim onggityam ten (10) bobo wingirind yipa bobo wulpok momnikeneninyin.’ ¹³Aji teks imdayam rigat, ton onyitonj re paja wa na dide makwa wip pumb wa b'urowatonj, aji ton ina tina dorkak nena gar kopa kima yodowatenonj odede yit kima da, ‘God! Kear nomne! Kon re negir mile riga en.’ ¹⁴Kon wen wumir tamninyin da onggityam teks imdayam rigam re Godit negir kesa dimdimjog riga nyi yokawonj, i ton yikonj tina met wa. Aji God maka onggit Parisai rigam yokawonj negir kesa dimdimjog riga nyi. Mop nokip yet ra tilenggyam pumb wa b'uturowateny, God ita tin gou wa omneny, aji yet ra tilenggyam gou wa aena ikeny, God ita tin pumb wa urowateny.”

B'iga Sobijog B'ogil Omnam (*Mat 19:13-15; Mak 10:13-16*)

¹⁵I ket rigap towaina papa b'iga daka Yesum pilwa eyento odede nony kima da Yesu ten tasopainy b'ogil omnam. I re Tina b'auyaena rigap onggityam mile yir yongo, ton kea ket ten samany kima riga ogoka eyento b'iga iyenam Yesum pilwa. ¹⁶Aji Yesu opimemb riga ara emokinonj yepiya re b'iga teito, i ket daka Tina b'auyaena riga amninonj da, “Tou b'iga sobijog Kor pilwa. Goro b'iga ogoka eyenindam, mop nokip odede b'iga wa maemb ji God ma pumb tungg.” ¹⁷Kon iminjog wen wumir tamninyin

da yet ra maka ra God ma pumb tungg iminjog ke okas odede b'iga sobijog re dide, ton makwa ita b'itgarik dem onggit pumb tungg wa.

Jogjog Gasa kima Riga dide Pumb Tungg B'igaram
(*Mat 19:16-30; Mak 10:17-31*)

¹⁸I yipa Ju riga waina mopyam rigat Yesund yigekitonj da, “B'ogil Ouyaena Riga-wii! Nangga e kon omniken dadal ngirpu kesa yirkokar owabintam?” ¹⁹Aji Yesu tin mira yomnonj da, “Nangga pena man Ken nogenaet da b'ogil riga? Makwa ita yete b'ogil riga aji Godta tinta yipaina. ²⁰Man wumir et ji opi re God ma b'ingawa yit, goro gigir dide yigyig b'iyena mile omnikim, goro riga ongandim, goro yurowam, goro riga gatab yir ungati kesa b'anyginena yit usekim, tesnaet mor b'u ake mor mog.” ²¹Seg ton ket Yesund yomnonj da, “Kon kea komkesa onggityam b'ingawa yit yimta undoka teyinyimin koina kewar win ke ngirpu yu.” ²²Aji re Yesu onggityam yit utkundonj, tin yomnonj da, “Man yipa gasa e yesungaet. Si nangga gasa im re mor mibnainy man tasoginyit, i dide ket man komkesa osogi wulkip ogona teyeninyit gasa kesa riga wa. Ra man odede mile omniket, yimta ke ket mor jogjog b'ogiljog gasa opima mitibnainy dem de pumb tungg wa. Seg ket man metket Kor pilwa dide ket yimta nutundoket!” ²³Aji re ton utkundonj onggityam yitkak, ton ma sobijog na gar bebig awonj, mop nokip ton re ukoi jogjog gasa kima riga na yibnonj.

²⁴Aji re Yesu tin gar bebigind yir yongonj, Ton kea riga amninonj da, “Jogjog gasa kima rigam b'igaram de God ma pumb tungg wa, itemb re ma sobijog bebig e. ²⁵Mop nokip ukoi ji b'angga kamelim b'igaram de nidil bora wa, itemb re ji ma bebig e, aji jogjog gasa kima rigam God ma pumb tungg wa b'igaram, itemb re ji ukoi jogjog bebig e.” ²⁶I ket utkunda rigap endento da, “Si yete ririr e yirkokar okatam?” ²⁷Si Yesu daka ket esmonggainonj da, “Nanggamog im re riga wa ma ririr im omnikam, onggityam komkesa gasa re Godim ririr im ti omnikam.” ²⁸I Petro Yesund yomnonj da, “Yir de, sin komkesa gasa erarkitondam dide ket mena yimta undoka miyenyu.” ²⁹Seg Yesu ket ten amninonj da, “Kon iminjog wen tamninyin da yepiya ra God ma pumb tungg wiko omnika map terarenenanj towa met, o towa konggawar, o towa nanywar, o towa yingganwar, o towa b'uwar ake mogwar, o minda towa b'igawar, ³⁰si komkesa odede rigap opima onggit gowukoi wimena winind jogjogpyam takatenanj onggityam gasa rina re ton erarkito, dide ton kwa dadal ngirpu kesa yirkokar okasi dem de sisil gowukoi wa rinte ra ik dem.”

Yesumna Nowam Bage Yit Tina Uj dide Utnyita gatab
(*Mat 20:17-19; Mak 10:32-34*)

³¹I Yesu Tina twelp (12) itmikitijog riga eominonj Tintawar wa, i ket ten amninonj da, “Yir de, men menon yokasu re Yerusalem ma, i

amimemb de komkesa yitkak ririrkip taukanj dem rina re God bageyam waina yim ke erikinonj Rigamna B'iga gatab. ³²I Ju rigap ket Tin yiyi dem de God ma obagiki kesa riga wa pilwa. I ton ket Tin ngong engena kima ji malik omnika iyenyi dem, i Tin ingar kima negir gim omnika iyenyi dem, i Tin auya itmanji dem, ³³i Tin iraski dem, ngirpu Tin onganji dem. Aji Ton uj ke tutnyis dem nowam bibirind." ³⁴Aji itmikitijog rigap makwa nony aukito onggit yit gatab. I onggityam opureni yit re towa pilke upuki na yibnonj dide ton makwa wumir aukito nangga gatab yit na Ton yindonj.

Isakendam Yirdidi B'ijenena Riga Yerikond

(Mat 20:29-34; Mak 10:46-52)

³⁵I re Yesu Yeriko taun wuswus wa awonj, yipa yirdidi riga omanda nya yiund omi yibnenenonj wulkip b'ijenenam. ³⁶I re ton riga bobo waina menon ngele utkundonj, ton ket riga ara eainonj da, "Nangga mile e awik?" ³⁷I ton tin mira yomno da, "Najaret tunggam Yesute opanjis." ³⁸Seg ton ket b'okta ara yikenonj da, "Dawidimna B'iga, Yesu-wii! Kear nomne-o!" ³⁹I naskanyam menonyamip tin samany ke yomneno da, "Muma kesa ae!" Aji ton kea ket ara yoikindenayonj da, "Dawidimna B'iga-wii! Kear nomne-o!" ⁴⁰Seg ket Yesu omanda onyitonj dide ket riga engainonj tin iyoyim Ti pilwa. I re ton Yesum wus wa awonj, Yesu tin yigekitonj da, ⁴¹"Nangga ma man singi aet Kon mornim omnikam?" I ton ket mira yomnonj da, "Yonggyam! Kon singi en yir opngendam." ⁴²Si Yesu ket tin yomnonj da, "Yir opngende! Moina gar ke utkundate men misakenj." ⁴³Seg odenja ket itemb yirdidi rigat yir b'iskenonj dide ket Godind esourena kima Yesund yimta yundokonj. I re komkesa rigap onggityam auki mile yir yongo, toda kwa kea Godind esourena yiyo.

Yesu ake Jakayo

19 ¹I Yesu ket Yeriko taun wa b'igaronj, i ket onggit taun nata opantonj. ²I demb de onggit taunind yipa riga yibnonj nyi da Jakayo, i ton re mopyam teks imdayam riga na dide jogjog gasa kima riga na. ³I ton nya oraka yiyenonj Yesund yir ongongim nokim da ton wumir okas da ija e Ti wip, aji ton ma ririr na Tin yir ongongim, mop nokip ton re kutkut riga na dide riga bobopiya Tin yulungayo. ⁴Si ton b'ikonj naska wa Yesund nya owamam, i ket yipa sikomo pig wul ijonj, nokim da idenat ton Tin b'obogil yir ong ra Ton topanjis onggit nyawind. ⁵I re Yesu onggit pipmetind awonj, Ton ti pilwa yir b'iskonj, i ket tin yomnonj da, "Jakayo! Wanakana gou wa inke! Mop nokip yu dor Kon b'ogla nitibnyin moina metind." ⁶Seg ket Jakayo odenja gou wa inkonj, dide ket Yesund ukoi sam kima simesime yomnonj. ⁷I komkesa riga yepiya re Yesund yir yongo tina met wa b'igarand, ton ket yit b'ebongnento odede da, "Ton kea obayim b'igarik negir mileyam rigamna met wa." ⁸Aji

Jakayo ket onyitonj dide ket Yonggyamind yomnonj da, “Yir de, Yonggyam! Kon takalenjinyin komkesa koina gasa i tab tagoninyin gasa kesa riga wa. I rada ke kon ya pilke nanggamog gasa na akasinond nenegir nya ke, kon opima ket powapyam mira towa tetendenawainy in koina okati gasa ririrind.”⁹ Si Yesu ket tin yomnonj da, “Yu bibirind, God ma yirkokar okawa mile kea onggit metind pita ainy, mop nokip onggityam riga toda re yipa Abraamimna b'iga e.”¹⁰ Mop nokip Rigamna B'iga ikonj onggit gowukoyind re b'edamkiti riga oraka mana dide towanim yirkokar okawa mana.”

Gold Koin gatab Tendam Yit

(Mat 25:14-30)

¹¹I re rigap onggityam yit utkundo, Yesu kwa b'usaya yipa tendam yit towa usekawonj, mop nokip Ton kea Yerusalem taun wus wa awonj, dide rigap nonyik b'amdento da God ma pumb tungg pita tainy odenja ra Ton b'itgarik Yerusalem taunind. ¹²Si Ton yit yotomonj da, “Yipa ukoi jog nyi riga menon yokatonj paja tungg wa de mopyam kingim pilwa, odede tilenggyam nonyik b'amdena kima da idenat ton king pipmet okas ti pilke i titenj onggit king nyi danda kima tina tungg wa. ¹³I re ton iwatam awonj, ton ket tinajog ten (10) wiko riga ara emokinonj dide ket towa agoninonj ten (10) gold koin,^o ngirpu ten amninonj da, ‘Win b'obogil onggityam wulkip tengaenindam b'usaya mira oikindenam ngirpu ra kon titenjin dem.’ ¹⁴Aji riga yepiya re tina danda wirand wekenonj, tin yisayo, i ket ninda riga abagikto dide ton ket ten etmikurto ti yimta nya de ukoi jog kingim pilwa odede yit kima da, ‘Sin ma singi im ji itemb riga sowanim king pipmetind ibim.’ ¹⁵Aji re onggit ukoi jog nyi rigat king nyi yokatonj mopyam kingim pilke, ton ket itendonj tina tungg wa, ngirpu ton ket engaukinonj opimemb tinajog wiko riga ya mana re ton gold wulkip agoninonj, nokim da idenat ton wumir okas ridede na ton onggityam wulkip engaenento b'usaya mira oikindenam. ¹⁶Si naskanyam ikonj ti wip wa, i yindonj da, ‘Yonggyam! Kon moina yipa gold koin ke b'usaya mira ainginsinond re ten (10) gold koin na.’ ¹⁷I ket ti yonggyam tin yismonggawonj da, ‘Oo, b'ogil wiko riga! Otomanti e. Man re kea sobijog gasand nony ijai jog wiko yomnikot, si onggit paemb kon mor danda motkaen ten (10) taun wip omnam.’ ¹⁸I nimogimyam ikonj, dide yindonj da, ‘Yonggyam! Kon moina yipa gold koin ke amnikinond re paib (5) gold koin na.’ ¹⁹I kwa daka ket onggit rigand ti yonggyam mira yomnonj da, ‘Madaka paib (5) taun wip omna riga e taet.’ ²⁰I kwa yipa riga ikonj, i ket yindonj da, ‘Yonggyam! Itemb moina yipa gold koin rina re kon ponpon upuki yowamenenond kobirgim borand. ²¹Mop nokip kon men moga na muwadenenond, nokim da man re wip inggrawa kesa riga et. Si man jabajaba im gasa emdeneninyit nangga na re man maka aramkinot, dide

^o 19:13 Grik peband da “Muna”. I yipa Muna re wan andred (100) wiko rigaina yipa bibir wiko mira na.

man erngokeneninyit nangga na re man maka esinot.’ 22 I ti yonggyam ket tin yismonggawonj da, ‘Man, negirjog wiko riga! Kon men mitisagiken ra moina tugimjog ke opureni yitkak kae dem. Ma man ija e wumir aet da kon re wip inggrawa kesa riga en, si kon jabajaba im gasa emdeneninyin nangga na re kon maka aramkinond, dide kon erngokeneninyin nangga na re kon maka esinond? 23 Si nangga penaemb man maka koina wulkip yoramitot bengk wa? Rako man ket bengk wa yoramitot, kon kakoa ingkenaemb koinajog wulkip yokatond onggit oikinti wewe wulkip kima.’ 24 I ket ton ti wusind owinki riga amninonj da, ‘Yisata onggityam yipa gold koin rinte re yibim ti pilind, dide onggit rigam yokawa yete re ten (10) gold koin awaminy!’ 25 Si ton ket towa yonggyamind yomno da, ‘Yonggyam! Ton re opima ti awaminy ti ten (10) gold koin.’ 26 Seg yonggyam tedaka amninonj da, ‘Kon wen tamninyin da komkesa riga yepiya re towa b’ogil wiko ke b’usaya ninda mira aikindento, Kon opima towa ninda kwa tumind tagoninyin. Aji yepiya re ton maka b’usaya mira aikindento, kon opima ten tesamburinyin nanggamog im re ton awamanj. 27 Aji win opimemb koina geja riga teyinam dikind yepiya re ken nisayo towanim king awowim, i ket kor wipind ten uj tama na mop epkinam!’ ”

Yesu ma B’ogil B’igara Yerusalem wa
(*Mat 21:1-11; Mak 11:1-11; Yoa 12:12-19*)

28 I re ket Yesu onggityam yit opurena seg awonj, Ton ket Ti rigawar wa wip ke naskanaska na yikonj, re Ton menon yokatonj Yerusalem taun wa. 29 I Ton ket Betpage tungg dide Betaniya tungg wus wa awonj de yipa dor wa ogenaya da Olib dor. I ingkenaemb ket Yesu Tina nimog b’auyaena riga etmikitonj 30 odede yit kima da, “Win eka onggit tungg wa rinte re wip ke yibim! Ra win onggit tungg wa b’itgarya, win ita odarya dor yipa dongki b’iga rinte re ijobiki yibim, dide makaya yipa rigat angis ti teskak kumbind. Si win ket kai itrekya dide iya dor dikind. 31 I ra yipa rigat wen tarkis dor da, ‘Nangga pae win kai yitrekya?’ win odede wumir omnya da, ‘Yonggyam Ton onggityam dongki b’iga singi e yominy ingawam.’ ” 32 I re osiemb ji itmikiti riga ekonda demb de onggit tungg wa, ton ija na dongki b’iga yodaronda rija na re Yesu ten yit amnenonj. 33 I re ton onggityam dongki b’iga kai yitrekonda, onggit dongkim yonggyamwarip ten amno da, “Nangga pae win dongki b’iga kai yitrekya?” 34 Si ton ket yonggyamwar esmonggainonda da, “Yonggyam Ton singi e yominy onggityam dongki b’iga ingawam.” 35 I ton ket itemb dongki b’iga yiyonda de Yesum pilwa dide towaina tumind kobirgim dongki b’iga kumbind aramkinonda dide ton ket Yesund yim yokawonda angitam. 36 Seg re ket Yesu menon yokatonj, rigap kea towaina kobirgim Tina menonpu nyawind ondrika eito ukoi isnawa kima.

37 I re Yesu Olib dorind paga wa egwarendam awonj, komkesa Tina yimta undoka riga bobo b’atomto ukoi sam kima dide b’okta auwam

kima Godind esourenam. Mop nokip ton kea yir angenento komkesa Tina kid kesa kima danda wiko rina re Ton amnikeninonj. ³⁸Si ton odede yit kima esourena yiyeno da,

“Ita God ma b'ogil onggit Kingim pilwa
yete re ik Yonggyamim nyi kima!

Ton yiyeny ngimbla mera pilind dide pumb tungg wa,
dide b'ogil inyomarena pumbjog Godim pilwa!”

³⁹I riga bobo wingirind ninda Parisai rigap Yesund yomno da, “Ouyaena Riga! Samany eyowine moina b'auyaena riga!” ⁴⁰I Yesu ket ten mira amninonj da, “Kon wen tamninyin da ra onggityam riga mumakesa taukanj dor, gimopim ket b'okta arara taenanj dor.”

⁴¹I re Yesu Yerusalem taun wus wa awonj, Ton kea onggityam taun yir yongonj ngirpu Ton ket yii yiyagikonj, ⁴²odede yit kima da, “Rako maka yu onggityam bibirind wumir aet da, ‘Onggit gasate ngimbla nitiyau.’ Aji yu onggityam gasa re moina yirind egiti e yibim. ⁴³Ita ji yipa win ik dem. Moina geja rigap ita men metwatinsi dem dide gou kipol ke ukoi kara orangi dem moina taun kara bau ke, i dide men inyiny wa motinyi dem, ngirpu komkesa gatab ke geja rigap men mutwopinsi dem. ⁴⁴I kwa moina geja rigap men dide mor wingirind komkesa rigawar gou wa taskandenanj dem. Si ton moina taunind makwa ita ngai yipa orangi motir irari dem goujog motir kumbind, aji komkesa ra eomneni e ibim dem. Mop nokip man maka yongwasit onggityam win ite re yu God men yirkokar okawam motup.”

Yinamet Kil kesa Omnam

(Mat 21:12-17; Mak 11:15-19; Yoan 2:13-22)

⁴⁵I re Yesu yinamet kara bora wa b'igaronj, Ton kea ket eaukeninonj b'asoga riga yepiya re asogenento si b'angga dide riga yepiya re yinamet teks wulkip sensi amnenento yir opmitenapu aband. ⁴⁶I ten amninonj da, “God ma yina peband ija emb ji yinamet gatab iriki yibim da, ‘Koina met tainy ra yir opmitenapu met e.’

Aji winpim itemb yinamet wip yomnikya da raskol waina wimenapu met e.”

⁴⁷I Yesu ket ita bibirind riga auyaeneninonj yinametind. Aji yina mopyam si rigap dide Ju riga waina gog ouyaena rigap i dide Ju riga waina mopyam rigap nya oraka eyento Yesund ongandam. ⁴⁸Aji ton makwa nya yodaro ridede wip e Tin onganji, mop nokip komkesa riga re Tina yit b'obogil utkunda mana b'ausika wuwenonj Ti pilwa.

Yesu ma Danda gatab Otonkena Yit

(Mat 21:23-27; Mak 11:27-33)

20 ¹I yipa bibirind re Yesu riga auyaeninonj yinametind dide God ma b'ogil yirkokar bage yit pitapita yomnenonj, ton ket yina

mopyam si rigap dide Ju riga waina gog ouyaena rigap, yipand Ju riga waina elda riga kima Ti pilwa tuwonj. ²Si ton ket Yesund yerkito da, “Man sin wumir nomnine! Man nangga juwai kaim onggityam gasa amnikinyit, o yetemb ji riga mor onggityam juwai mokawonj?” ³I Yesu ket ten mira amninonj da, “Si Kodaka yipa yit gatab e wen tarkisinyin. Win b'ogla mira notinya! ⁴Ringma, Yoanimna baptiso Godim pilkae ikonj, o minda rika riga wa pilkae?” ⁵Aji ton towa wingirind yit b'iglenena wuwenonj odede yit kima da, “Ra men mira omnyu da ‘Godim pilkae,’ si Ton opima netirkisiny dor da, ‘Si win nangga pena maka Yoanimna baptiso gatab gar ke utkunda ke yokatonda?’ ⁶Aji ra men jaba nitinjindam da ‘Riga wa pilkae,’ si komkesa rigap ke men gimokip ke nedrikine. Mop nokip ton komkesa Yoanind iminjog kae yokatenyi da ton re God ma yipa bageyam na.” ⁷Si ton ket mira yomno da, “Sin ma wumir im be ringkae.” ⁸I Yesu daka ket ten mira amninonj da, “Si Kodaka ma opima wen wumir tamninyin nangga danda kaim Kon onggityam gasa amnikinyin.”

Negir Wala Riga gatab Tendam Yit

(Mat 21:33-46; Mak 12:1-12)

⁹Si Yesu ket onggit tendam yit ke riga amninonj da, “Yipa rigat greip nangg itot eyeninonj tina gowind. Seg ton ket ninda wala riga kima yitnono aento dide tirir yomno da, ‘Ra kip win okas dem, yonggyam kip opima sopapu mira takateniny dem.’ Yit seg ke ton ket sopapu towa akainonj, dide ket menon yokatonj b'enga kantri wa. ¹⁰I re kip win yokatonj, yonggyam yipa tina wiko riga yitmikitonj wala riga wa pilwa, nokim da idenat wala rigap ti sopapu mira greip kip okauranj. Aji onggit wala rigap tin ipowa yiyeno, dide yitmikito mira omni kesa. ¹¹I ton kwa b'usaya yipa tina wiko riga yitmikitonj. Aji onggit wala rigap tidaka kwa ipowa yiyeno, dide ingar kima nenegir kana yomneno, ngirpu ket tin yitmikito mira omni kesa. ¹²I ton b'usaya kwa yipa tina wiko riga nowam yitmikitonj. Aji daka ton tin kus yowarindeno, dide ket yiskanto sopapu bau wa. ¹³Seg onggit greip sopapu yonggyam ti nony mana yindonj da, ‘Nangga e ket kon omniken? Si kon ket itmikisin koina b'iga e yena re kon singi yiyenyin. Ton yama ita koina b'igand isnai dem.’ ¹⁴Aji re onggit sopapu wiko rigap towa yonggyamimna b'iga yir yongo, ton towa wingirind apurento da, ‘Itemb b'iga re tina sopapu owabinta riga e. Si men b'ogla tin yangandu, nokim da idenat men onggit sopapum owabinta riga taindam.’ ¹⁵Seg ton ket tin yiskanto greip sopapu bau wa dide uj tama na yongando. Si onggit paemb, nangga e ket onggit greip sopapu yonggyamit towa pilind omnik dem? ¹⁶Si ton ita ik dem onggit wala riga wa pilwa dide ket ten uj tama na tanganjiny dem. I ton ket onggityam greip sopapu takainy dem b'enga riga wa pilwa.” I rigap onggityam tendam yit utkundi kak ke endento da, “Goro odede

rawik!” ¹⁷Aji Yesu towa pilwa yir sapsap owinkonj, dide amninonj da, “Si nangga ma ji onggityam iriki yitkak yinden yit re da,
 ‘Yipa Motir met oranga rigap b'isayo met orangam,
 aji God ket yimta ke met wugind yoramitonj onggit met emorkam.
 Si Ton ket iminjog isnawa kima Motir na awonj onggit met oranga wingirind’?

¹⁸Komkesa riga yepiya ra sap totendanj onggit Motir kumbind, ton opima kak tiposkanj. I ya kumb nat ra itemb Motir sap totenj, onggit Motirit ita tin iimik dem.” ¹⁹Seg re ket onggit winjog natemb Ju riga waina gog ouyaena riga dide yina mopyam si rigap nya oraka eyento Yesund yimind okatam, mop nokip ton wumir na da, “Sina onggityam tendam yit ke nomneniny.” Aji ton riga bobo na moga uwadto.

Kaisam pilwa Teks Oramka gatab Otonkena Yit
(Mat 22:15-22; Mak 12:13-17)

²⁰I re onggityam Ju riga waina gog ouyaena riga dide yina mopyam si rigap Yesund yir itena yiyeno, ton ket ninda wigawiga bageyam emdito, i yit ataito da, “Win walenggyam b'ogla b'anyginena nya ke gim ke negir kesa dimdimjog riga wip taindam dor Ti wipind.” I dide ton ket ten etmikurto Yesum pilwa, nokim da idenat ton Yesumna negir opuliti yitkak okasi dide Tin yiyi de Roma gabmani mopyamim pilwa, i idenat onggit mopyamit ket tina gabmani gog ke dide tina danda ke Tin isagik. ²¹Seg ton ket tuwonj Yesum pilwa, i Tin yerkitto da, “Ouyaena Riga-wii! Sin wumir im da man dimdim im apureninyit dide auyaeninyit. I man ma gowukoi nya kaim riga yirik eyeninyit, aji man Godimna nya kaim iminjog yitkak ririrind riga auyaeninyit. ²²Si ringma, Roma kantri mopyam king Kaisam teks ogonam, ton sowanim ririrkipjog mile e, o minda negirjog e?” ²³I Yesu kea towaina b'anyginena nony menamena angwatawonj, si ket ten amninonj da, ²⁴“Yipa Roma kantri wulkip Denari koin iya, dide kor nouyawa! Yaina wip e dide nyi e iriki i ji onggit wulkipind?” Ton yismonggawo da, “Roma kantri mopyam king Kaisamna i.” ²⁵Si Yesu ket ten amninonj da, “Si onggit paemb, win Kaisam ogonindam nangga im re Kaisa ma ogenaya gasa, aji Godim ogonindam nangga im re God ma ogenaya gasa.” ²⁶Si ton ma ririr na aukito negir yit okatam Yesumna opurena wingirind rina re Ton riga wa wipind apureninonj. Aji re ton utkundeno Tina mira yit opurenand, ton kea kid kesa aento, dide ket mumakesa na wekenonj.

Uj ke Utnyita gatab Otonkena Yit
(Mat 22:23-33; Mak 12:18-27)

²⁷I Sadukai riga wingirind ninda riga tuwonj Yesum pilwa yepiya re apurenento da, “Riga ma opima uj ke tutnikanj dem.” I ton ket Yesund

yerkito da, ²⁸“Ouyaena Riga! Mose God ma yina peband erikinonj meranim omniam da, ‘Ra yipa riga uj tainy dide ti konggand tirar b'iga oraki kesa, ti nanyit o ti yingganit tokas itomb mik i ti nanyimna o ti yingganimna nyi kima im b'iga tarakiny.’ ²⁹Si ket seben (7) nanyingganwar wekenonj, i nanyam rigat yipa kongga wokatonj dide b'iga oraki kesa uj awonj. ³⁰Si ti wus ke yingganit ti nanyimna mik wokatonj. ³¹I dide daka onggit wus ke yingganit tin wokatonj, i ija na onggityam seben (7) nanyingganwarip tin okatena tiyo, dide b'iga oraki kesa uj aukito. ³²Seg ket kikitum itomb kongga todaka uj awonj. ³³Si onggit paemb ra utnyita win ik dem, itomb kongga opimemb seben (7) nanyingganwar wingirind yama iminjog kongga tainy dem? Mop nokip komkesa seben (7) nanyingganwarip kea itomb kongga towa konggam b'isatena tiyo.” ³⁴I Yesu ket ten mira amninonj da, “Riga onggit gowukoyind opima kongga imda mile dide leo imda mile amnikenenanj. ³⁵Aji riga yena ra b'isagika winind God danda tagoniny dem b'igaram sisil gowukoi wa rinte ra ik dem, dide kwa danda tagoniny uj ke utnyitam, ton ma opima kongga okata mile dide leo okata mile tamnikanj dem. ³⁶Mop nokip ton ma ririr im kwa b'usaya uj taukanj dem. Mop nokip ton aneru kima yipa wip im taukanj dem. I ton kwa God ma b'iga im taukanj dem, mop nokip Godsim ten uj ke tutnikiny dem Tina b'iga awowim. ³⁷Aji Mose daka tina peband pitapita yomnonj uj riga utnyita gatab yit rina re ton Sinai dorind onggit so omni b'uwaepind yokatonj. Si ton ija emb ji Yonggyamind yogenai da Abraamimna God e, i Isakimna God e, i dide Yakobimna God e. Si Abraam, i Isak i dide Yakob re yilo im wekeny de pumb tunggind utnyita win yir ungawand. ³⁸Si God re ma uj rigaina God e aji yilo rigaina God e. Mop nokip komkesa riga Ti pilind wekeny re yilo im.” ³⁹I ninda Ju riga waina gog ouyaena rigap yismonggawo da, “Ouyaena Riga! Man otomanti na mindenyit.” ⁴⁰Si makwa yipa rigat ririr na Tin erkitam, nokip Tina mira yitit kea towaina gar mogam amninonj.

Dawidimna B'iga gatab B'arkita

(Mat 22:41-46; Mak 12:35-37)

⁴¹I Yesu ket towa pilind b'arkita yoramitonj da, “Ridede ma paim rigap opurena eyenanj da Keriso re Dawidimna B'iga e? ⁴²Mop nokip Dawid tilenggyam yindeney Ger peband da,

‘Yonggyam God yindeney kor Yonggyamim pilwa da,

“Omite Koina yimjog yim tab ke juwai kima pipmetind,

⁴³ngirpu ra ket Kon Moina komkesa geja riga gou wa tamninyin dem dide taramisinyin dem Moina pis wirand moina danda ondratenam towa kumbind.” ’

⁴⁴Si Dawid tina tugim ke Kerisond yogenayonj da, ‘Kor Yonggyam,’ si ridede nya kae Keriso Dawidimna B'iga tainy? Si Ton re Dawidimna B'iga e aji kwa ti Yonggyam e.”

Ju Riga waina Gog Ouyaena Riga gatab Nonony Yit
(*Mat 23:1-36; Mak 12:38-40*)

45 I re komkesa rigap Yesumna yit utkundento, Ton Tina b'auyaena riga amninonj da, 46 “Win yir kima tekenyit meraina gog ouyaena riga gatab. Ton singi im aenanj b'ogil pinpin kobirgim kima menamenam, i ton kwa singi aenanj riga wa pilke simesime okatam maketpu nata, i ton kwa ukoi jog wip ke pipmet akatennenanj meraina yir opmitenapu met nata, i dide kwa ton ukoi jog isnawa kima rigaina omitenapu kasand omitenenanj ukoi diyamdiyampu pipmet nata. 47 I ton mik kongga waina gasa endwatananj, dide kwa riga ouyawam dide yir ongongim pinpin kana yir opmitenenanj. Si odede rigap opima ukoi jog negir mira takatenanj dem b'isagika winind, aji ninda riga re ma odede ukoi negir mira im takatenanj dem ton re dide.”

Yipa Mik Kongga ma Godim Singi Wulkip
(*Mak 12:41-44*)

21 I re jog jog gasa kima rigap wulkip oramka eyento wulkip oramkapu boks bora wa, Yesu kea towaina mile yir ipka eyeninonj. 2 I Ton kwa yipa gasa kesa mik kongga yir wongonj re ton nimog kip sobijog uj peni aramitonj onggit wulkip oramkapu boks bora wa. 3 Seg Yesu ket yindonj da, “Kon iminjog wen tamninyin da onggit gasa kesa mik konggat ukoi jog wulkip aramis onggit komkesa riga wa wingirind. 4 Mop nokip opimemb komkesa riga towaina ukoi wulkip wingir ke sobijog wulkip nena na aramkiranj onggit wulkip oramkapu boks bora wa. Aji itomb mik kongga re komkesa tina wulkip aramis tina wulkip kesa wingirind. Onggityam tina oramiti wulkip re tina kupka yirkokar naemb ji.”

Gowukoi Kikitum Win gatab Yit
(*Mat 24:1-31; Mak 13:1-27*)

5 I ninda Yesumna b'auyaena rigap ija naemb ji opurena eyento yinamet gatab da, “O meraina yinamet otomanti motir kae dide ninda rigaina Godim ogoni apig kae ejgi yibim!” 6 Aji Yesu yindonj da, “Ita ji yipa win ik dem, si rinsim re ji win yu yir angindam, makwa ita yipa motir ibim dem dikind onggit goujog motir kumbind, komkesa onggityam ukoi jog motir opima tosmurkanj dem.”

7 Si ton Yesund yigekito da, “Ouyaena Riga! Si riim onggityam mile pita taukanj dem? I ra onggityam gasa momta taukanj dem, nanggamog im ji ongwata gasa taukanj dem?” 8 I Yesu mira amninonj da, “Win b'obogil yir kima tekenyit! Ke rigap wen b'anyginena nya ke wip ramneninem. Mop nokip jog jog riga opima tuweny dem Koina nyi kima, dide jog jog riga

ugungatena teyenanj dem odede yit kima da ‘Kon itemb Keriso,’ i dide da ‘Undwatapu win re ke momta e.’ Aji win goro ten yimta tundoneninam dem. ⁹I win ra ik dem, win opima tutkundenindam dem tiriba geja yit dide tiriba geja gatab bage yit. Aji win goro moga taininam! Mop nokip onggityam mile opima naska taukanj dem, aji kikitum win ra dem ma wanakana e tainy.” ¹⁰I Ton b'usaya ten amninonj da, “I b'engabenga yitam opima gejam owinka tuweny dem ninda b'enga yitam kima. I kwa daka kantri b'engabenga opima gejam owinka tuweny dem ninda b'enga kantri kima. ¹¹I opima kwa ukoi jijig dide sou win i dide rukoruko kopa taukanj dem gowukoi b'engabenga winind. I kwa daka moga kima mile taukanj dide kwa ukoi kid kesa kima danda wiko tuweny dem wub kumb ke. ¹²Si yimta kaim onggityam gasa taukanj dem, aji naska rigap opima Kor nyi map wa pilind yim oramka teyenanj dem negir omnikam dide wa pilwa odede bebig dide b'isadrena mile oramka teyenanj dem, opi re da ton wen teyenanj dem de Ju riga waina yir opmitenapu met nata b'isagikam, dide ket oramka teyenanj dem sibibmet nata, i dide ton wen teyenanj dem king wa wip wa dide ukoi gabmani mopyam riga wa wip wa. ¹³Aji onggityam milend God opima wa gangga takainy Kor gatab yir ungata yit pitapita omnenam. ¹⁴Si onggit paemb win goro tulatula b'atngonjeninam waina garind da, ‘Ridede im sin b'irmeka yit tapurenindam towa wipind.’ ¹⁵Mop nokip Kon opima wa yitkak dide b'ogil multekip tagoninyin wanim opurenam. Si ingkaim waina geja rigap maka ririr aena tuweny wen wipind danda kima ismonggaenam. ¹⁶Aji waina b'u ake mog i waina nany dide yingganwar i waina kus ke rigawar i dide wa rigawar opima wen tib teyenanj dem negir ma b'isagikam, i ingkaim ket wa wingirind ninda riga uj ondrika teyenanj dem. ¹⁷I komkesa rigap opima wen singi kesa tamnenanj dem Koina nyi map. ¹⁸Aji win makwa ngai ita yipa mopngii edamkisy a dem waina moptekip ke. ¹⁹I win b'ogla waina gar ke utkunda danda kima owama teyenindam onggityam b'idgotnena wingirind, si idenat win waina wingawinga yirkokar okatenya dem.

²⁰“I yipa winind wa gejayam riga opima tui dem, i ket Yerusalem taun iwatinsi dem. Si ra win odede mile yir ongya dem, win b'ogla wumir okasya dem da, ‘Itemb ke onggit taun negir omniam win ke momta e au.’ ²¹Si onggit winind yepiya ra tekeny Yuda eriyand, win dor wa na mogamoga b'itkenindam dem. I yepiya ra tekeny dem Yerusalem taunind, b'ogla ritringkinem dem onggit taun ke, i dide kwa yepiya ra tekeny dem wungawungapu tungg nata, goro b'egarkinem dem onggit taun wa. ²²Mop nokip itemb re negir ma b'isagika win e dem rina ra God onggityam taun b'isagikand oramis dem komkesa yitkak ririrind rinsim re yina peband iriki wekeny. ²³Onggit winind God ma sake towa pilwa yepiya ra ngor kima kongga dide papa b'iga kima kongga tekeny dem.

Mop nokip ukoijog b'idgotnena e pita tainy dem gowukoyind dide kwa Godimna ukoi soro kima b'isagika pita tainy dem onggit riga wa pilind. ²⁴Si towa gejayam rigap ten towaina giri ke oswanka teyenanj dem, dide komb riga teyenanj dem komkesa God ma obagiki kesa rigaina tungg wa. I dide God ma obagiki kesa rigap Yerusalem taun owabinsi dem dide negir omnika iyenyi dem, ngirpu rokate ra towaina win ririrkip tainy dem.

²⁵“I kid kesa kima b'enga wip mile opima taukanj dem lomkongga i mobi i dide iki wa pilind. I kwa onggit gowukoyind kantri b'engabenga moga im taukanj dem, nokip riga nony menamena kesa im taukanj dem sipa wuwam dide wuro map. ²⁶Si rigap opima mogapip mop b'askena tuweny dem, dide ton opima nonyik b'amdenda tuweny dem da, ‘Nanggamog im ket auka wuweny onggit kupka gowukoyind.’ Mop nokip danda gasa rinsim re pumb wa wekeny opima b'utuwongnenanj dem. ²⁷I onggit winind dem rigap ita Rigamna B'iga yir iyi dem moi borand menonind ukoi danda kima dide b'ogil inyomarena kima. ²⁸Si ra onggityam mile b'atomkiranj dem aukam, win b'ogla towinkindam dem dide waina as pumb wa turowasindam dem. Mop nokip waina komkesa gowukoi b'idgotnena ke b'itraram win re momta e tawik.”

Makwa Yete Wumir Kikitum Bibir dide Win gatab
(*Mat 24:32-36; Mak 13:28-32*)

²⁹I Yesu ket towa yipa tendam yit usekawonj da, “Win yir angina pig wul dide komkesa wul! ³⁰Rada wul ngimb kemb ikkanj, win walenggyam yir ongong eyenindam, si win ita win ongwasya da, ‘Kemb momta e pembpemb win.’ ³¹Si ra win odede gasa yir tangindam dem aukand rinsim re Kon wumir amneninyin, win nony ke ongwasya dem da, ‘God ma pumb tungg re kemb momta e wa wus wa tainy.’ ³²I Kon iminjog wen tamninyin da riga yepim re yu onggit gowukoyind wekeny yimta kaim uj taukanj dem, aji naskajog onggityam komkesa gasa towa liyal im taukanj dem. ³³Si wub ake gou osiya b'eteomnanya dem, aji Koina yitkak makwa ngai opima b'eteomnenanj dem.

³⁴“I win b'obogil walenggyam yir b'itipkindam. Aji ra win maka ra b'obogil yir b'itipkindam, win tuwenyit ra dem b'engabenga negir omnika singi nasim i ikpik wimena mile nasim i dide gowukoi yirkokar singind ukoijog nony menamena nasim. Si waina gar ra ipindena kesa im tekeny dem. Si onggit paemb onggityam win re kid kesa kima e wanim pita tainy dem odede ringma ra girimit b'angga usunas. ³⁵Mop nokip onggityam win pita tainy ra dem komkesa riga wa wip nate dem yepim re wekeny kupkakupka gowukoi win wingirind onggit gowukoyind. ³⁶Si win b'ogla yir kima tekenenyit, dide yir na topmitenindam onggityam win yir ungaukand. Nokim da idenat win ririr taindam b'iwatam

onggityam komkesa mile wa pilke rinsim ra pita taukanj dem dide ket onyitam Rigamna B'igam wipind.”

³⁷I Yesu ita bibirind riga auyaeninonj yinametind, aji Ton Yerusalem taun ke opendenonj de yipa dor wa ogenaya da Olib dor, dide ita siwiny adea de yibnikenenonj. ³⁸Si komkesa rigap re kea sitawarjog utnikenento dide wuwenenonj Yesum pilwa Tina yitkak utkundenam de yinamet wa.

Yudas Yimjatonj Yesund Tib Iyoyim
(*Mat 26:1-5; Mak 14:1-2; Yoan 11:45-53*)

22 ¹I re Yist kesa Bred Win, o kwa ogenaya da Ju riga waina Uj Igwanti Nony Iyena Diyamdiyam Win re ket wus wa auka ikonj, ²yina mopyam si riga dide Ju riga waina gog ouyaena rigap pop ninda nya oraka eyento ridede wip e Yesund onganji, aji ma ririr na aukito, mop nokip ton riga na moga uwadto. ³I onggit winind Satana b'igaronj twelp (12) itmikitijog riga wa wingirind yipa riga Yudas Iskariyotim pilind. ⁴I ton ket ewaikitonj Yesum pilke, dide yikonj de yina mopyam si riga wa pilwa dide yinamet yir ipka geja riga wa pilwa, ngirpu ton ket ton kima yitnono aenonj ridede wip e Yesund tib yii towa pilwa. ⁵Si ton ma sobijog na sam aukito, i yimjato ti tib iyoi mira wulkip okawam. ⁶I Yudas daka ket ton kima tirir yit yimjatonj Yesund tib iyenam. Seg ton ket b'ogil gangga oraka yiyenonj ridenate ton riga kesa warind Yesund tib yii towa pilwa.

Ju Riga waina Uj Igwanti Nony Iyena Diyamdiyam Ongonjena gatab Yit
(*Mat 26:17-25; Mak 14:12-21; Yoan 13:21-30*)

⁷I Yist kesa Bred Win re Ju riga waina mamoi onganda win na Towaina Uj Igwanti Nony Iyena Diyamdiyam omniam. I re onggityam win awonj, ⁸Yesu ket etmikitonj Petro ake Yoan odede yit kima da, “Win eka dide ket meranim Uj Igwanti Nony Iyena Diyamdiyam omniam pipmet ongonjenya dor, nokim da idenat men onggityam diyamdiyam omniku.” ⁹Aji ton Yesund yomnonda da, “Rokate dikind man singi aet sin ongonjenam?” ¹⁰I Yesu ket ten amnonj da, “Yir de, ra win onggit taun wa b'itgarya dor, win ita yipa rigand wipwip omnya dor nyikak iyoyind. Si win tin yimta undoka yiya dor onggit met wa rokate ra ton b'itgarik dor. ¹¹I win ket onggit met yonggyamind wumir omnya dor da, ‘Ouyaena Rigat men mominy da, “Rote ji Koina obai rum rokate ra Kon Koina b'auyaena riga kima meraina Uj Igwanti Nony Iyena Diyamdiyam omniken?” ’ ¹²I ita ton wen tauyau dor pumb ke tula ongonjeni ukoi rum. Si win indamaemb ongonjenya dor.” ¹³Seg ton ket yiwatonda, dide ket gasa ija na adarinonda ringma na re Yesu ten amnenonj, ngirpu demb de ket ton Ju riga waina Uj Igwanti Nony Iyena Diyamdiyam yongonjenonda.

Areto gatab Yit

(Mat 26:26-30; Mak 14:22-26; 1Kor 11:23-25)

14 I re ket onggityam diyamdiyam win awonj, Yesu omitonj diyamim, i kea daka Tina itmikitijog riga omnikto yipand Ton kima. 15 I Yesu ten amninonj da, “Kon ukoi jog singi na aenenond odede da Kon yu meraina Uj Igwanti Nony Iyena Diyamdiyam naska owen win kima, i onggit kak ke b'idgotnena okasin. 16 Mop nokip Kon wen wumir tamninyin da Kon makwa ita b'usaya owen dem onggityam diyamdiyam, ngirpu onggityam diyamdiyam mile ririrkip tainy God ma pumb tunggind.” 17 I Yesu yipa kapo yokatonj, dide ket Godind siteket yit yomnonj. Seg ket Ton yindonj da, “Ite mb kapo yokata dide ket wa wingirind yingg yiyena! 18 Mop nokip Kon wen wumir tamninyin da Kon makwa ita b'usaya greip kip ke omniki wain onaen dem yu ke ngirpu ra God ma pumb tungg ik dem.” 19 Seg re ket Yesu yipa sana nganja yokatonj dide ket Godind siteket yit yomnonj, i dide ket yipkikonj, ngirpu ket towa agoninonj odede yit kima da, “Ite mb re Koina ji e rinte re wanim b'ogilim akainy in. Si win b'ogla omnikenenya onggityam mile Ken nony iyenam.” 20 I diyam seg ke ket Ton odede yipa wip nya ke kwa yipa kapo yokatonj, dide ket yindonj da, “Ite mb kapo re Koina kus ke oramiti sisil outinti tirir omnijog mal e, ite re Kon yigmarken wanim b'ogilim. 21 Aji yir de, yipa rigat Ken ita tib niyeny yaina yim e re yipand b'uwangenj Koina yim kima owoupu kasa kumbind. 22 Mop nokip Rigamna B'iga Godimna tirir omni yit ririr nate menon yokateny ujim, aji God ma sake onggit rigam pilind yete re Tin tib yiyeny.” 23 Seg ket itmikitijog rigap towalenggyam b'igekena wuwenonj da, “Yete kwa ji riga mera ganggand onggityam mile omnika yiyeny?”

Ukoi Nyi Riga Awowim Yit B'ugwatena

24 I Yesu ma itmikitijog riga wa wingirind yit b'ugwatena pita awonj odede da, “Yete ukoi jog riga mera wingirind.” 25 Aji Yesu ten amninonj da, “Gowukoi kingip towaina kantri riga kumbind danda yondratenyi riga wip iyenam. I rigap opima agenairanj odede king yepim re wip iyenam towa kumbind danda yondratenyi da, ‘Ton re b'ogilijog wiko riga im meranim.’ 26 Aji wa wingirind mile omnikam re ma odede im opi re gowukoi rigaina mile re dide. Aji wa wingirind ukoi jog nyi riga b'ogla sobijog nyi riga pila tainy, dide mopyam riga b'ogla riga wa wirand wiko riga pila tainy. 27 Mop nokip yete ji ukoi riga, minda tonte yete re omi ti yibim owowim, o minda tonte yete re riga owou yingg iyena wikond yibim? Si, ma inte ukoi riga au yete re omi ti yibim owowim? Owi, intemb ukoi riga onggit gowukoyind. Aji Kon wa wingirind inte aen yete re riga owou yingg iyenam yibim.

28 “I wida kwa re insimemb ji riga aindam yepim re Kon kima yipa pipmetind wekenyit Koina b'atonkena wingirind. 29 Kor b'u kea Kor pumb

tungg nokawonj wip iyenam. Si Kodaka kwa odede yipa wip nya kae wa onggityam pumb tungg takainyin wip iyenam. ³⁰Nokim da idenat win diyam taindam dide nyi tanaikindam Koina owoupu kasand de Koina pumb tungg wa, i dide kwa idenat win tomnikindam kingimna wip omnenapu kasand Israel twelp (12) gu riga isagikam.

Petromna Yesund Oena gatab Bage Yit

(Mat 26:31-35; Mak 14:27-31; Yoan 13:36-38)

³¹“Simon, Simon! Yir de, Satana kea Godind yigekitonj wen otonkenam odede ringma ra rigap kip tegegenanj au kesa omnam. ³²Aji Kon kea yir opmitond mor gatab, nokim da idenat moina gar ke utkunda maka gou wa tigomenj. Aji man ita gou wa tigomenjit dor, i ra man tengenjit onggityam egomenda kak ke, man b'ogla danda tagoninyit moina gar ke utkunda nany dide yingganwar.” ³³Aji Petro Yesund yomnonj da, “Kor Yonggyam! Kon b'angonjeni e nibnyin man kima menonim de sibibmet wa i dide kwa uj okatam.” ³⁴Aji Yesu daka tin yomnonj da, “Petro! Kon men wumir motinyin da man yu siwiny nowapyam e Ken notiyenyit dor da, ‘Kon ma wumir en Ton,’ i seg ket pauro ara ikeny dor.”

Pauso, Ga dide Giri gatab Yit

³⁵I kwa Yesu Tina b'auyaena riga amninonj da, “Ringma, re Kon wen etmikeninond pauso kesa i ga kesa i dide yonginkak kesa, ke win nanggamog gasa mana b'araktondam ingaenam?” I ton ket mira yomno da, “Rawir kwa nanggamog mana.” ³⁶Seg Yesu ket ten amninonj da, “Aji yu yete re pauso kima riga, ton b'ogla yei, i kwa da ga yei. I ya mana ra giri maka ra ibnau, ton b'ogla tina kobirgim yasog dide giri yakat onggit wulkip ke. ³⁷Mop nokip Kon wen wumir tamninyin da onggityam yitkak b'ogla ririrkip rain Kor pilind rinte re yina peband iriki yibim da, 'Rigap Tin b'isagikam yomno odede gog erbeka riga kima yipand.' I mop nokip nangga im re Kor gatab iriki wekeny yina peband re kemb ririrkip auka tui.” ³⁸I b'auyaena rigap Yesund mira yomno da, “Yonggyam! Yir de, sowa osiya ke nimog giri.” I Yesu ket gar bebig kima esmonggainonj da, “Seg aina! Yebikau!”

Yesumna Yir Opmita Olib Dorind

(Mat 26:36-46; Mak 14:32-42)

³⁹I re Yesu Yerusalem taun ke opendonj, i menon yokatonj Olib dor wa Tina siram b'irari kesa omnika mile ririrind, Tina b'auyaena rigap kea daka ket Tin yimta yundoko. ⁴⁰I re ton opekto de Tina pipmet wa, Ton ket Tina b'auyaena riga amninonj da, “Win b'ogla yir topmitenindam, nokim da idenat win maka negirimna b'atonkena wa tegomendenindam.” ⁴¹I Yesu sobijog paja wa b'isonkitonj towa pilke odede pin na ringma ra

rigat gimo b'itisik, i demb de kumsos b'amkonj, i dide ket yir opmitonj. ⁴²Si ton yindonj da, “Abu! Rada ita Mor singi mibnau, si Man Kor pilke yewaikite onggityam ujimna b'idgotnena kapo! Aji goro Koina singind, aji Moina singi ke rawik.” ⁴³Ngirpu ket aneru pita awonj pumb ke Yesum pilwa, dide ket Tin danda yokawonj. ⁴⁴I Ton ma sobijog na yir opmitand isanikesa danda kima b'unjora yikenonj ukoi danda kima dide iror kima. I Tina wimirkip kusim b'engkito, i kus popokip pila na gou wa isokto. ⁴⁵I re Ton yir opmita seg awonj, Ton utnyitonj dide itendonj b'auyaena riga wa pilwa. Aji Ton odede win natemb ten adarinonj, re ton gim yarimip yutungand wekenonj. ⁴⁶Si Yesu ten amninonj da, “Nangga paim win yutungand wekenyit? Utnikina, i yir opmitenina, nokim da idenat win maka negirimna b'atonkena wa tegomendenindam.”

Rigap Yesund Yokato

(Mat 26:47-56; Mak 14:43-50; Yoan 18:3-11)

⁴⁷I re Yesu yit opurenand yibnonj, riga bobo tuwonj. I twelp (12) itmikitijog riga wa wingirind yipa riga, yogenayo da Yudas, riga wip teyinonj, dide ket Yesund wip yowarkitonj Tin omongnenam. ⁴⁸Si Yesu ket tin yomnonj da, “Yudas! Man Rigamna B'iga omongnena kae tib yiyenyit?” ⁴⁹I re riga yepiya re Yesum wusind wekenonj, yirik b'unjomkento da nanggamog mile e tawik, ton endento da, “Yonggyam! Ma sin giri ke tepkindam?” ⁵⁰Si towa wingirind yipa rigat giri yingawonj yina mopyam si rigamna wiko rigam pilwa, i ton ket yipmarkitawonj tina yimjog yim tab ke yipya rom. ⁵¹Aji Yesu Tina b'auyaena riga amninonj da, “Omandemb seg aina! Goro ket b'usaya omnika!” Seg ket Ton onggit rigamna yipya rom yesopayonj dide ket tin yisakendonj. ⁵²I Yesu ket amninonj yina mopyam si riga i yinamet yir ipka geja riga i dide Ju riga waina elda riga yepiya re tuwonj Tin okatam da, “Win nangga paim Ken okatam notupya giri dide kibam kima odede it re ringmim re rigap raskol emdenenanj? ⁵³Re Kon ita bibirind win kima nibnikenenyimin yinametind, win maka yim aramitenomam Ken okatam. Aji onggityam win re kea wa ma ainy dide sibibimna danda wira nasim ket aindam.”

Petro Yesund Yoenonj

(Mat 26:57-58, 69-75; Mak 14:53-54, 66-72; Yoan 18:12-18, 25-27)

⁵⁴I ton Yesund yokato i ket yimtitik yiyo de yina mopyam si rigamna met wa, ngirpu met kara bora wa b'igarkito. Aji Petro re pajapaja na yimta undoka yiyonj. ⁵⁵Aji re ket rigap wul yitano aba inyinyind, ton ket yipand omnika wuwenonj. Si Petro toda kwa kea omitonj towa wingirind. ⁵⁶Aji re Petro omitonj ngaya wip ke, yipa wiko ngimngayit kea tin yir yongonj. I ton ket Petronj yir pinpin yomnikonj dide ket windonj da, “Itemb riga re toda kea Yesu kima yipand yibnenenonj.” ⁵⁷Aji Petro b'aenonj da, “Kongga!

Kon ma wumir en Ton.”⁵⁸ I sobijog win kak ke kwa yipa rigat Petron d yir yongonj, i tin yomnonj da, “Mada kwa itemb Yesu ma yipa yimta undoka riga et.” Aji Petro mira yomnonj da, “Riga! Kon ma onggityam ogena riga en.”⁵⁹ I ama rika re ket yipa awa yigoukitonj, kwa yipa rigat daka danda kima yimjatonj da, “Iminjog e. Itemb riga toda kwa kea Ton kima yibnenedonj, mop nokip ton re kwa Galili tunggam e.”⁶⁰ Aji Petro yismonggawonj da, “Riga! Kon ma wumir en nangga gatab im man apureninyit.” I re ton yit apureninonj, odedend ket pauro ara yikenonj.⁶¹ I ngirpu ket Yonggyam wip engendonj Petrom pilwa, dide ket yir kakkipi yidrikonj. Si Petro kea ket onggityam Yonggyamimna opuliti yitkak nonyik yomdonj rina re Ton yomnonj odede da, “Yu siwiny yimta kena pauro nimogim ara tuweny dor, aji man naska Ken ita nowapyam notiyenyit dor.”⁶² Seg ton ket bau wa opendonj dide ket ma sobijog na gar kopa kima yii yindonj.

Yesund Ji Malik Omnika gatab Yit

(Mat 26:67-68; Mak 14:65)

⁶³ I riga yepiya re Yesund yir yiteno, ton ket Yesund ipowa kima ji malik omnika yiyeno.⁶⁴ Si ton ket Tin wip yutwangko, dide ipowa yiyeno odede igekena yit kima da, “Man b'agenae! Yete Men mipou?”⁶⁵ I ton kwa kea Tin yit omnena yiyeno jogjog b'engabenga isadrena yitkak ke.

Ju Riga waina Membap Yesund Yisagiko

(Mat 26:59-66; Mak 14:55-64; Yoan 18:19-24)

⁶⁶ I re ket bibir yisparkonj, Ju riga waina elda riga, yina mopyam si riga i kwa Ju riga waina gog ouyaena rigap yipand b'eomkurto. Seg rigap ket Yesund yiyo onggityam towaina Sanedrin kot wa b'isagikam.⁶⁷ I ton ket Yesund yingawo da, “Rika man Kerisotet? Si sin wumir nomnine!” Aji Yesu ten esmonggainonj da, “Ra Kon wen wumir tamninyin, win makwa ita gar ke notkasya.⁶⁸ I ra Kon wen tarkisinyin, win makwa ita Ken mira notinya.⁶⁹ Aji yu ke Rigamna B'iga ita omi ibim Komkesa Dandam Rigib Riga Godimna yimjog yim tab ke juwai kima pipmetind.”⁷⁰ Seg komkesa rigap ket yigekito da, “Si iminjog man Godimna b'iga et?” I Yesu ket ten esmonggainonj da, “Owi, win iminjog na endenindam. Kon itemb ji Riga.”⁷¹ I ton ket endento da, “Nangga mim men ket b'usaya ninda yir ungata yit tarakindam? Mop nokip men kemb merainajog yipya ke utkundenindam Tina tugim ke opureni Godind isadrena yitkak.”

Yesu B'isagikam Onyitonj Pilatom Wipind

(Mat 27:1-2, 11-14; Mak 15:1-5; Yoan 18:28-38)

23 ¹ Seg komkesa onggityam riga bobo owinkito, i ket Yesund yiyo Roma gabmani mopyam Pilatom pilwa.² I ton ket Pilatom ril yogenkauto Yesund kot wa oramitam odede yit kima da, “Sin ke Ti

yodarkautondam odede negir mile opi re Ton sowaina Ju yitam rigaina mile b'anyginena nya ke engka eyeninonj, i Ton kwa riga ogoka eyeninonj Roma mopyam king Kaisam pilwa teks oramkam, i dide Ton Tilenggyam b'agenaenonj da, 'Kon King Kerisoten.' ” ³Si Pilato ket Yesund yigekitonj da, “Ma Man Ju riga waina King et?” I Yesu tin mira yomnonj da, “Owi, kemb man mindenyit.” ⁴Ngirpu Pilato ket yit pitapita yomnonj yina mopyam si riga wa pilwa dide riga bobo wa pilwa da, “Kon makwa onggit Rigam pilind negir ma b'isagikam ril yodaren.” ⁵Aji ton uko danda kima endento da, “Tonit riga nenegir kana urunyuny omnena eyeninonj Tina ouyaena ke kupka Yuda eriya nata. Si Ton Galili eriya kena b'atomonj onggityam ouyaena, ngirpu ket ikonj dikind Yerusalem taunind.”

Yesu B'isagikam Onyitonj King Erodin Wipind

⁶I re Pilato onggityam yit utkundonj, ton riga arkisinonj da, “Si rika Ton Galili ke riga e?” ⁷I re ton wumir yokatonj da Ton onggityam eriya kena ikonj rinte re Erodin danda wirand yibim. Si ton ket Yesund yitmikitonj Erodin pilwa, nokip onggit winind Erod kea de toda kwa yibnonj Yerusalem taunind. ⁸I re Erod Yesund yir yongonj, ton ma sobijog sam na awonj, mop nokip ton ma emb ji singi aukenenonj Yesund yir ongongim nokip ton kea get ke utkundenonj Ti gatab yidir yit, i dide kwa ton singi na yir ongongim Tina omniki kid kesa kima danda wiko rinte ra Ton omniki ti wipind. ⁹Si Erod Yesund yerkenonj re jogjog b'engabenga gatab kena, aji Yesu makwa ngai tin mira yomnenonj. ¹⁰Aji yina mopyam si riga dide Ju riga waina gog ouyaena riga owinkito, dide ket ma sobijog danda kima na Yesum ril ogenka yiyenauto negir ma b'isagikam. ¹¹Si Erod Yesund ngong engena kima yitkar omnika yiyenonj tina geja riga kima, i ji malik yomnikonj, i dide ket kingimna ngindngind pinpin kobirgim yikitonj, ngirpu ket Tin yitmikitonj Pilatom pilwa. ¹²Erod ake Pilato naska re geja riga na ebnonda, aji onggit bibir natemb ket ton rigariga awonda.

Pilato Yesund Ujim Yisagikonj

(Mat 27:15-26; Mak 15:6-15; Yoan 18:39-19:16)

¹³Si Pilato yipand ara emokinonj yina mopyam si riga i Ju riga waina memba i dide Ju riga. ¹⁴I Pilato ten amninonj da, “Win onggit Rigand kor pilwa iya odede negir ril ogenka kima na da Ton re riga b'anyginena nya ke engka Riga e. Yir de, kon ke wa wipind yigekenyin waina ogenki negir ril gatab, aji kon makwa ngai onggit Rigam pilind yodaren yipa negir mile. ¹⁵Si Erod toda kwa makwa nangga negir na yodarau, mop nokip Tin itenda nena yominy sowa pilwa. Si win kemb yir yongya da makwa ita yipa negir mile yibim Ti pilind rinte ra ririrkip tainy uj ma b'isagikam. ¹⁶Si onggit

paemb kon Tin irasken, i ingkek ket Tin openjin.”¹⁷ (Awir e)^p ¹⁸Aji komkesa riga yipand b'okta ara wuwenonj da, “Onggit Rigand uj tama na yeomnene! Aji Baraband sowa yopende!”¹⁹ Itemb riga Baraba re sibibmet nat oramiti yibnonj nokip tonit onggit taunind ukoi nyi riga kima soro kima bebig mile yomnikonj dide riga uj andrikinonj. ²⁰Aji Pilato b'usaya kwa towa pitapita amnawonj, nokip ton singi na awonj Yesund opendam. ²¹Aji ton ija na ara yoikindenayo da, “Wul b'agbagind yidrike! Wul b'agbagind yidrike!”²² Aji Pilato nowam ten amninonj da, “Nangga pae? Nangga ukoi negir mile na yomnikim? Kon makwa ngai Ti pilind yodaren yipa uj okatam negir mile. Si onggit paemb kon Tin irasken, i ingkek ket Tin openjin.”²³ Aji rigap kea Pilatond il onгка yiyeno ukoi jog obairena ara kima, dide yigekeno Yesund wul b'agbagind idrikam. Si onggityam towaina obairena arap kea Pilatomna singi gou wa yomnonj. ²⁴Seg ket Pilato kikitum b'isagika yit yindonj towaina b'arkita ririrkip omnam. ²⁵Si Pilato kea ket Ju riga waina b'arkita ririrind Baraband yopendonj yet re sibibmetind oramiti yibnonj soro kima bebig mile omnika map dide riga uj ondrika map. Aji ton Yesund yoramitonj towaina singi ririrind Tin wul b'agbagind idrikam.

Yesund Wul B'agbagind Yidriko

(*Mat 27:32-44; Mak 15:21-32; Yoan 19:17-27*)

²⁶I re Roma geja rigap Yesund yiyo, ton ket yipa Kurene tunggam Simonind yusunato yet re ikonj wungawungapu tungg ke, dide ket Yesumna wul b'agbag ti kumbind yoramito Yesum kakind iyoyim.

²⁷I ukoi riga bobop Tin yimta yundoko, i towa wingirind ninda kongga re dor b'ipowa na wuwenonj dide gar kopa kima na yii aento Tinim. ²⁸I Yesu onggit kongga wa pilwa wip engendonj, dide ket ten amninonj da, “Yerusalem taun kongga! Goro Ken yii niyagikya! Aji win yii b'eagikinam wanim dide waina b'igawarim. ²⁹Mop nokip ra b'idgotnena win ik dem Yerusalem taunind, rigap opima tendenanj dem da, ‘Ton b'ogil omni kongga im ji yepim re popam i b'iga ukki kesa kom i dide b'iga ngom okki kesa ngom.’

³⁰“I onggit winind rigap opima b'idgotnena moga map dor tamnenanj dem da, ‘Sin nipmikinam!’ i sukak tamnenanj dem da, ‘Sin ujim nikanginjinam!’ ³¹Mop nokip rada ton yu odede nenegir mile im omnika eyenanj Kor pilind yete re wul nangg pila yilo nibnyin, si nangga e ket tawik wa pilind dide waina b'igawar wa pilind, ra onggityam wul nangg uj tainy?”

³²I ton kwa nimog negir raskol riga daka yipand Yesu kima eyo wul b'agbagind idrikam.

^p **23:17** Ninda Grik peband da [Mop nokip Pilatom kea yipa get ke mile yibnawonj odede da ton yipayipa sibibmet riga apendeninonj Ju riga wanim ita onggityam Ju riga waina Uj igwanti Nony Iyena Diyamdiyam Winind.]

³³I re ton opekto onggit pipmet wa ogenaya da, “Uj Rigamna Mopkak Wimenapu Tungg”, ademb de ket Yesund wul b'agbagind yidriko, i dide osiemb nimog raskol riga daka edriko yipa re Yesu ma yimjog yim tab kena i kwa daka yipa re Tina sawai yim tab kena. ³⁴I Yesu yindonj da, “Abu! Towa negir mile awir amnaine, mop nokip ton ma wumir im nangga e ton yomniki.” I geja rigap Yesumna kobirgim itaika eyento pes b'arena ke. ³⁵I rigap owinki Yesund yir yipko, i Ju riga waina membap kea daka Tin ji malik omnika yiyeno da, “Ton ninda riga wa yirkokar akaeneninonj, si rada itemb Riga Godimna obagendi Keriso e, Ton b'ogla Tilenggyam yirkokar yakat.” ³⁶I kwa geja riga Ti wus wa tuwonj, dide ket todaka Tin ji malik yomniko, i dide ket Ti tokiltokil wain yokau onayam. ³⁷I ton ket endento da, “Rada Man Ju riga waina king et, Man b'ogla Molenggyam yirkokar b'akae!” ³⁸I kwa ija naemb ji Yesumna wul b'agbag pumb ke iriki yibnonj da,

“Itemb Riga re Ju riga waina King e.”

³⁹I yipa wul b'agbagind idriki raskol rigat Yesund yisadrenonj da, “Ma Man Kerisotet? Si Molenggyam yirkokar b'akae, dide sowa da yirkokar nokae!” ⁴⁰Aji daka yipa raskol rigat tin yismonggawonj odede samany yit kima da, “Awir e man Godind moga yuwajit? Men re Ton kima yipa ririr negir ma b'isagika nasi. ⁴¹Si onggityam negir ma b'isagika re meranim dimdimjog e, mop nokip men yokasya re meraina omniki mile ririr nate. Aji itemb Riga re makwa nanggamog negir mile na yomnikonj.” ⁴²I ton ket Yesund yomnonj da, “Yesu! Man ken nonyik notimjit ra Man meket Moina pumb tungg wa!” ⁴³Si Yesu tin mira yomnonj da, “Kon iminjog men wumir motinyin da man yu Kon kima ita mitibnyit dor de otomanti samsam tungg wa.”

Yesu ma Uj Wul B'agbagind

(Mat 27:45-56; Mak 15:33-41; Yoan 19:28-30)

⁴⁴I re ket amaya lomtik yokatonj, sibibit kupka gowukoi yikangindonj, ngirpu ama re ket tri (3) kilok awonj simana gatabind. ⁴⁵Si lomkongga ngaya re kea osmantonj. I kwa ket ukoi gutomgutom kobirgim rina re yinametind ewirinti yibnenenonj yinayina pipmet dide yina pipmet ganggand, ton inyinyind b'inyowendonj. ⁴⁶I Yesu ket ukoi kana ara yikenonj da, “Abu! Kon Koina wingawinga Mor yim kumb nate yoramisin.” I onggit yit seg ke ket Ton uj awonj. ⁴⁷I re Roma wan andred (100) geja riga mopyamit mile yir ongong yiyenonj rina re aukonj, ton Godind yesoulitonj odede da, “Iminjog e, itemb Riga re negir kesa dimdimjog Riga e.” ⁴⁸I komkesa riga bobo yepiya re yipand wuwenonj onggityam mile yir ongongim, ton kea mile yir angto rina re aukito, dide ket ton gar bebig map dor b'ipowa kima itendento. ⁴⁹I komkesa riga yepiya re Yesum wumir wekenonj dide kongga yepiya re Galili ke Tin yimta undoka yiyo, ton paja kena owinki wekenonj onggityam mile yir ipkam.

Yesumna Ujgim Eungita gatab Yit
(*Mat 27:57-61; Mak 15:42-47; Yoan 10:38-42*)

⁵⁰⁻⁵¹I yipa riga nyi da Yosep, ton re Arimataya tungg ke riga na Yuda eriya wingirind. Ton re b'ogil riga na dide negir kesa dimdimjog riga na yibnonj, i dide ton God ma pumb tungg na yir yungaenenonj. I kwa ton re yipa Ju riga waina Sanedrin memba na yibnonj, aji ton maka yimjatonj rina re Ju riga waina Sanedrin membap tirir yomno Yesund ongandam dide makwa b'ingaenonj onggityam towaina omnika mile wingirind. ⁵²I onggit rigat ket yikonj Pilatom pilwa, i ket tin yerkitonj Yesumna ujgim okatam. ⁵³Seg ton ninda riga kima Yesumna ujgim wul b'agbag kumb ke yijgendo gou wa, dide ket kobirgim ke ujgim ponpon yomniko, ngirpu ket yoramito gimo yiund eski gopmet wa rikind re maka yipa ujgim oramiti yibnonj. ⁵⁴I itemb bibir re b'angonjena bibir na awonj Ju riga waina wiram dide yir opmitena bibirim, i dide ket win re wus wa na auka ikonj onggityam bibir otomam.

⁵⁵I kongga yepiya re Yesu kima yipand tuwonj Galili eriya ke, ton Tin yimta undoka yiyo. Si ton kea yir yongo rikind re Yesumna ujgim yoramito. ⁵⁶I re kongga itekto, ton ket angonjento ngirangngirang gasa dide gaya ujgimind oramkam. Seg ton ket wiram wekenonj Ju riga waina wiram dide yir opmitena bibirind God ma b'ingawa yit ririrind.

Yesumna Utnyita gatab Yit
(*Mat 28:1-10; Mak 16:1-8; Yoan 20:1-10*)

24 ¹I re Ju riga waina wiram dide yir opmitena bibir kak ke naskajog bibir awonj, sitawarjog konggap eito ngirangngirang gasa Yesumna gopmet wa rina re ton angonjento Yesumna ujgimind oramkam. ²Aji ton kea yir yongo onggityam ukoiog gimo rina re ururkiti yibnonj onggityam gimo yiund oski gopmet mora ke. ³I re ton gimo yiund oski gopmet wingir wa b'igarkito, ton makwa Yonggyam Yesumna ujgim yodaro. ⁴Si ton re onggit gatabim nonsipsip na wekenonj, odedend ket nimog riga onyitonda towa wusind yepiya re inyomarena kima kobirgim b'ikoki awaminonda. ⁵Si re kongga mogapip as iroukito gou wa, onggit rigap ten amninonda da, “Nangga pae win yilo ai Rigand oraka yiyenya gopmetind uj riga wa wingirind. ⁶Ton awir e dikind, aji ke utnyis. Win nonyik b'amjinam rija na re Ton wen wumir amninonj, re Ton win kima yibnenenonj Galili eriyand. ⁷Ton odede yindonj da, ‘Rigap b'ogla Rigamna B'iga negir mile rigaina yim kumb wa oramisi dem, dide ket onggit negir mile rigap Tin wul b'agbagind idriki dem, i ingkaemb ket nowam bibirind Ton ket tutnyis dem.’” ⁸Si konggap omandemb ket nonyik amdito Yesumna opureni yitkak. ⁹I re ket ton itekto gopmet ke, ton kea onggityam komkesa mile usenenauto

ileben (11) itmikitijog riga wa pilwa dide komkesa riga wa pilwa yepiya re wekenonj ton kima. ¹⁰Si opimemb ji kongga, Magdala tunggam Mariya i Yoanna i Yakobom mog Mariya i dide ninda kongga yepiya re wekenonj ton kima. Si tonpiyamb usenauto onggityam yit itmikitijog riga wa pilwa. ¹¹Aji onggityam towaina opureni yitkak re ija na wip aukito itmikitijog riga wa wipind da nony kesa rigaina opureni yitkak im, si onggit penaemb ton maka ten gar ke akatto. ¹²Aji Petro utnyitonj dide ket b'ikonj de gopmet wa. Seg ton ket uwontonj, i ket kobirgim nena na yir anginonj, ngirpu re ket ton gopmet ke ewaikitonj, ton nony sindamara kima na yikonj onggityam auki gasa gatab.

Yesu Pitapita Awonj Emmao Nyawind

(Mak 16:12-13)

¹³I Yesu ma b'auyaena riga wingirind nimog rigap menon yokatonda Yerusalem taun ke de yipa tungg wa nyi da Emmao ama rika ileben (11) kilomita pin na yibnonj Yerusalem taun ke. ¹⁴I ton ket towa wingirind yit b'usenena ekonda onggityam komkesa mile gatab rina re aukito. ¹⁵I re ton towa wingirind yit b'usenena ekonda dide yit iglenena eyinonda, Yesu ket towa wus wa awonj, dide ket ton kima yipand yikonj. ¹⁶Aji Godit towaina yirkip utwangkinonj. Si onggit penaemb ton maka Yesund yongwatonda. ¹⁷I Yesu ket ten arkitonj da, “Nanggamog yitkak im win iglenena eyinya nyawind?” I ton osiyamb ket onyitonda gar bebìg kima. ¹⁸I towa wingirind yipa riga nyi da Kleopa Tin yismonggawonj da, “Ma Manita Menta obayam wumir kesa mibnyimit Yerusalem taunind onggit gatab rina re onggit taunind mile aukonj onggityam diyamdiyam winind?” ¹⁹Si Yesu ten arkitonj da, “Nangga gasa na aukonj?” I todaka ket Tin mira yomnonda da, “Najaret tunggam Yesum gatab gasa na. Ton re bageyam na yibnonj, si Ton wiko amnikeninonj dide yitkak apureninonj re danda kima na Godim wipind dide komkesa riga wa wipind. ²⁰Aji meraina yina mopyam si riga dide meraina membapiya Tin uj ma b'isagakam yoramito, si ket Tin wul b'agbagind yidriko. ²¹Sin nony b'ijawa yoramitonda Ti pilind da Ton ita mera Israel kantri itringenj meraina geja riga wa pilke. I kwa tumind indondim da yu kemb nowam bibir e ainy onggityam mile auki seg ke. ²²I b'usaya kwa tumind indondim da sowa wingirind ninda konggap sin kid kesa nomnanj. Ton sitawarjog na wui de Yesumna gopmet wa, ²³aji ton makwa Tina ujgim yir yongi, i re ton itekanj, ton ket sin wumir nomnanj da, ‘Sin aneru kea liyalliyal yir angu yepiya re endenya da Ton ke yilo e ainy.’ ²⁴I kwa sin kima wimena riga wingirind nimog riga kea ekya de onggit gopmet wa, dide ket ija na gasa adarkinya rija na re konggap b'agenairanj, aji ton maka Yesund yir yongya.” ²⁵I Yesu ket ten amnonj da, “Win nony menamena kutjog riga i. Si win il b'angnena kana im bageyam waina

komkesa opureni yitkak gar ke akateninya. ²⁶Ma onggityam mile b'ogil im ririrkip taukanj Kerisom pilind? Si onggit paemb Ton b'ogla onggityam b'idgotnena rakatenin dide Tina b'ogil inyomarena wa b'egarik.” ²⁷I Yesu ket yit b'atomonj Mosemna peba ke ngirpu de komkesa bageyam waina peba wa, i ket towa esipkenawainonj komkesa Ti gatab iriki yitkak onggityam peba wingirind.

²⁸I re ton onggit tungg wus wa aukito ritade re ton ekonda, Yesu ija na wip awonj da onggit tunggind topanjis-a de yipa tungg wa. ²⁹Aji nimog rigap danda kima Tin yognenonda da, “Omanda sin kima itende, nokip ke momta e si imoka, i lom da ke awir e auka yik!” Seg Yesu ket itendonj dide b'igaronj yipa met wa ton kima wimenam. ³⁰I re Yesu omitonj ton kima diyamim, Ton ket yipa sana nganja yokatonj, i ket Godind siteket yit yomnonj, i ket yipkikonj dide towa akawonj. ³¹Si omandemb ket God nimog rigaina yirkip apngenjinonj, si ingkenaemb ket ton Tin yongwatonda. Ngirpu omandemb ket Yesu towa yirind b'eommenonj. ³²Seg ton towalenggyam b'arkena ekenonda da, “Ma kea Tina yitit men isanikesa gar nokateny, re Ton nyawind men yit nomneny dide peba yit mera esipkeniny?” ³³I ton odenja ket utnyita nena awonda, dide ket itendonda de Yerusalem taun wa. Seg ademb de ton ket b'eomi adarinonda ileben (11) itmikitijog riga dide ninda riga yepiya re ton kima wekenonj. ³⁴I ileben (11) itmikitijog riga dide ninda riga yepiya re ton kima wekenonj towa usekawo da, “Yonggyam ke iminjog utnyis, dide kea Ton pitapita ainy Simonim wipind.” ³⁵Ngirpu todaka nimog rigap ket usekainonda nanggamog mile na re aukonj nyawind dide rija na re ton Yesund yongwatonda, re Ton sana nganja yipkikonj.

Yesumna Utnyiti Ji Ouyawam

(Mat 28:16-20; Mak 16:14-18; Yoan 20:19-23; Itai 1:6-8)

³⁶I re ton onggityam yit ipnenand wekenonj, odedend ket Yesu towa wingirind onyitonj dide ket ten simesime amninonj da, “Ngimbla win kima.” ³⁷Aji ton re winga kesa na dide moga na aukito, i ton ija na nony aukito da, “Sin wingawinga e yir yongu.” ³⁸Si Yesu ten amninonj da, “Nangga paim win moga aindam, i nangga paim win waina garind nonsipsip aukindam? ³⁹Itenemb ji Kon Riga. Win yir anginam Koina yim dide pis. Win Ken nesopaya dide yir nonga! Wingawingam ma opima ti mi dide kak, aji Kor opima mi dide kak odede rija e re win Ken yir nongya.” ⁴⁰I re Ton onggityam yit apureninonj, Ton ket towa auyainonj idriki yira Tina yimind dide pisind. ⁴¹I re ton ukoi samind wekenonj, ton makwa Tin gar ke yokato, aji ton kid kesa na aento. Odedend ket Yesu ten egekisinonj da, “Ita wa nangga e owowim dikind yibim?” ⁴²Si ton ket kabum ogni kib Ti yokawo. ⁴³Ngirpu Yesu ket yokatonj dide ket towa wipind yongonj.

44Ɔ Yesu ket ten amninonj da, “Inaemb ji Kon yit apureninond wanim, re Kon nibnenenond win kima da komkesa yitkak b'ogla ririrkip taukanj rinsim re iriki wekeny Kor gatab Mosemna gog peband i bageyam waina peband i dide Ger peband.” 45Ɔ onggit winind ket Yesu towaina gar epangkinonj onggit yina peba yitkak isipmaram. 46Ɔ Yesu ket ten amninonj da, “Ija emb ji yina peband iriki wekeny odede da Keriso ita b'idgotnena okas dem dide uj ke tutnyis dem Tina uj kak ke nowam bibirind. 47Ɔ dide rigap opima negir mile ke engenda gatab yit pitapita tamnenanj dem Tina nyi kima, nokim da idenat God towaina negir mile awir tamnainy. Si onggityam pitapita omnena mile b'atom ra dem Yerusalem kae de komkesa b'engabenga yitam riga wa pilwa. 48Ɔ Si win re onggityam gasa gatab yir ungatayam riga im. 49Ɔ Si yir de, Kon ita Yinayina Wingawinga itmikisin dem wanim yena re Kor B'u tirir yomnonj wanim itmikitam. Si onggit paemb win omanda tekenyit onggit taunind, ngirpu ra Ton Tina danda ke wen tekokiny dem rinte ra pumb ke tinik dem.”

Yesu ma Menon Pumb Tungg wa

(Mak 16:19-20; Itai 1:9-11)

50Ɔ re ket Yesu Tina b'auyaena riga wip eyinonj ngirpu de Betaniya tungg wus wa, Ton Tina yim urowatonj, ngirpu Ton ket ten b'ogil amninonj. 51Ɔ re Ton ten b'ogil amnikinonj, odedend ket Ton towa pilke yiwatonj, i God ket Tin yiyonj de pumb tungg wa. 52Ɔ Seg ket Tina b'auyaena rigap Tin kumsos yemko, ngirpu ton ket ukoiog sam kima itekto de Yerusalem taun wa. 53Ɔ ton ket ita winind yinametind wekenenonj dide Godind yesoureneno.